

WANTOK

NIUSPEPE, BILONG DISPELA WIK, LONG PAPUA NIUGINI STRETI - 27 YIA NAU

32 pes Namba 1,226 Wik i stat long Fonde Desemba 25, 1997 50 toea

**TOKSAVE
LONG OL
RITA**

• Toksave i go long ol rita olsem bikos long Krismas Holide, bai gat senis long ol de em Wantok bai kam aut. Neke wik Wantok bai kam aut long Tunde 23. Na long las wik bilong Desemba, Wantok bai kam aut long Mande 29.

Tupela indipenden memba long Skate gavman egens nupela Mujo Sefa ripot

MUTRUS KANAGE
BILONG DISPELA WIK
KATIM NA SALIM IKAM!

KANAGE

"Em nau, narapela wik bilong mi ken"

• Kanage em i wanpela hapkas mangi. Olsem na em i wanpela bikhet mangi stret Mama i bilong Kande, na papa i bilong Blu Maunten. Na ol save kolim em ainman.

Wanpela apinun, Kanage wantaim biksis bilong em, tupela sindaun long living rum bilong haus. Na biksis i stori long Kanage long taim God i wokim Heven na Graun, na bihain em i wokim Adam na Eve.

Biksis i tok: "God i wokim yumi long graun tu". Kanage sindaun harim stori olsem God wokim yumi long graun tu na i no wanbel. Olsem na em tok: "Nogat ya, God i no wokim mi long graun, God wokim yu long graun, tasol mi, God wokim mi long ain ya".

Rex Maya
KIMBE

WINA BILONG DISPELA WIK EM
Rex Maya
KIMBE

Sapos yu ting yu gat wanpela gutpela pani stori, orait katim hap pepa antap i makim "Mutrus Kanage bilong dispela wik" na salim wantaim stori bilong yu i kam long WANTOK NIUSPEPE, P.O. BOX 1982 BOROKO PNG.

Putim nem na adres bilong yu long pas na bai yu gat sans long kamap wina bilong "MUTRUS KANAGE BILONG DISPELA WIK" na winim wanpela praiz, SANS, YAH!

Stori na nem bilong yu bai kamaut long wanwan wik so noken lus tingting long baim Wantok niuspepe na painimaut! SEKIM NEM BILONG TUPELA ARAPELA WINA LONG PES 11 na 12


"Long bilip bilong mipela, ol pati lida i yusim mani bilong pati bilong ol long bungim mipela, [na i no bilong Mujo Sefa]"

WENCESLAUS MAGUN I raitim


TUPELA mausman bilong Indipenden blok bilong Skate-Naii gavman, Pater Loiur Ambane na Helt Minista, Ludger Mond i tok ol i no save long olupela pren bilong PM na Ostrelia bisnismen, Mujo Sefa, na tu ol i no kisim mani long em.

Pater Ambane, Gavana bilong Simbu, na Mista Mond, Memba bilong Sinasina Yongamugl, i kros tu long Praim Minista Bill Skate i mekim wok wantaim Mista Sefa. Dispela ol toktok bilong tupela i bihainim wanpela ripot em susa pepa bilong dispela niuspepe, The Independent i bin autim long las wik.


"Praim Minista i mekim bikipela asua insait long su bilong em. Mi ting em i lain-



• Gavana bilong Simbu.



• Praim Minista Bill Skate.



• Helt Minista Ludger Mond.

im pinis skul bilong em. (Skate should have been very careful in engaging Sefa)," Mista Mond i tok.

"Planti bilong mipela i nupela. Olsem na mipela i pasim tingting long stap wantaim olsem wanpela Indipenden Grup na go insait long gavman. Mipela i wari long gavman. Mipela i no wari tumas long Sefa o husat man i wok long baksait bilong piksa," Mista Mond i tok.

Em i tok: "Long bilip bilong mipela, ol pati lida i yusim mani bilong pati bilong ol long bungim mipela," na i no bilong olupela bisnis pren bilong Mista Skate, Mujo Sefa. Tasol Mista Mond i tok, sapos toktok bilong Sefa i tru, ating olsem wanpela grup, dispela tok i tru. Tasol olsem wanwan memba, em i tok em i no save.

Tupela memba bilong Simbu provins i tok tu olsem, Mista Skate i tokaut pinis olsem hevi bilong Skate long vidio tep em Mujo Sefa i wokim i stap pinis long han

bilong ol plisman na Ombudsmen Komisen. Olsem na i nogat wanpela as bilong Mista Sefa long pulim planti toktok long dispela hevi. Na bagarapim gutnem bilong Papua Niugini long arapela kantri.

"Praim Minista i tok wanem samting ol plisman na Ombudsmen i painim, ol i noken bringim i go long em. Tasol bringim i go long kot na kot i ken painimaut husat tru i asua," Mista Mond i tok.

Pater Ambane na Mista Mond i tok, Mista Skate i mekim gutpela disisen bilong larim ol plisman na Ombudsmen long glasim dispela hevi, na i no putim long han bilong Komisen ov Enkwairi.

"Mipela i bilip olsem Komisen ov Enkwairi i yusim bikipela mani bilong gavman. Na tu planti taim ol wok painimaut bilong Komisen ov Enkwairi i no save karim kaikai," tupela i tok.

Long stretim tok bilong Mista Sefa olsem PM i baim ol loya bilong Ostrelia long

makim em long kot, tupelai tok, dispela em i rait bilong Mista Skate. "PM i gat olgeta rait long lukautim em yet. Na sapos em i bilip long wanem loya i makim em long kot dispela em laik bilong em. Dispela i no min olsem ol loya bilong PNG i no fit long ol loya bilong Ostrelia".

Tupela i tok tu olsem tok tok bilong Mista Sefa olsem em i makim wok minista bilong ol memba em i no tru.

"Planti bilong mipela i no save long em (Mista Sefa). Mi bilip em tu i no save long planti bilong mipela. Na olsem wanem bai em i givim wok minista long mipela, taim em i no save long mipela," Mista Mond i tok.

Tupela i bilip PM Skate i makim wok bilong minista long ol memba na ating Mista Sefa i mekim tasol wok bilong raitim ol dispela i go daun long buk. Long wanem, pasin bilong makim ol minista em ol praim minista tasol i save mekim, na no ol man i wok aninit long PM, tupela i tok.

INSAIT

- Oposisen bungim mosen long PM Skate mas risain p2
- Ol setelmen lain long Madang egen-sim gavana long rausim ol p3
- Las sans nau long filim WANTOK ASKIM long pes 19, na salim i kam long winim ol top praiz.



MUTRUS

MAJOR SPONSA BILONG RAGBY LEAGUE INSAIT LONG PAPUA NIUGINI

GOVERNMENT WARNING: SMOKING IS DANGEROUS TO HEALTH

DUA RIPO

MOSBI: Tripela bikhet man i bin holim na paitim meri bilong olpela praim minista bilong Papua Niugini Sir Julius Chan long Fraide moning long Ela Beach Mosbi. Oltaim Mista Stella Chan i save go stapim ka long hap na i save ron long moning. Inap long Fraide las wiken tasol samting olsem 7 kilok long moning, tripela man ya i bin bungim em na paitim em.

Ripot i tok ol i bin paitim Ledi Chan na arapela manmeri i bin sanap lukluk tasol ol i no bin mekim wanpela samting long helpim em, maski em i bin singaut long kisim helpim.

Wanpela plis kam i bin kamap bihain na kisim em i go long haus sik. Tasol ol tripela man ya i bin ronawe wantaim ka bilong Ledi Chan na go pinis. Ripot long haus sik i tok em i orait tasol ol skin bilong em i pen yet na wanpela finga long lek bilong em i sua.

LAE: Plis long Lae i kamautim pinis sampela smok mariwana ol i planim long Seken Seven blok ausait tasol long Lae Siti.

Lae plis i tok dispela hevi bilong planim spak brus i wok long kamap bikpela long Lae na Morobe provins nau we ol yangpela i save kisim sids bilong spak brus na planim long gaden.

Ripot i tok ol i save mekim olsem long mekim mani, tasol lo bilong gavman i tambu tru long dispela bikos em i no gutpela samting long bodi bilong yumi ol manmeri.

Plis ripot i tok ol i save long husat man i bin planim ol dispela spak brus long Seken Seven tasol papa bilong dispela gaden i ronawe i go pinis na hait long Boana distrik.

Long arapela ripot tu, bai ol plisman i mekim bikpela wok patrol raun long ol haiwe bilong Morobe provins olsem long Wau Bulolo haiwe na Makam haiwe. Plis ripot i mekim bikpela tok lukaut long ol manmeri long i no ken dring spak na draiv long krismas na tu long nu yia wiken.

MADANG: Madang taun nau i gat bikpela pret na birua i stap. Ol lain long setelmen we gavman i laik rausim i kamapim birua na pret pinis na ol gutpela manmeri no moa painim isi long wok-about o raun long maket na stua samting.

Dispela birua i kamap bihain long gavman i askim olgeta setelmen lain long kirap lusim ol setelmen na muv go long asples bilong ol wanwan. Taim bilong gavman long kisim eksen long ol em long mun Januari, 1998 sapos ol i no muv aut long pinis bilong Desemba 31, 1997.

Ripot i tok ol plis long Lae na Madang i kam bung wantaim long was long ol propeti bilong gavman na ol opis, na laip bilong ol manmeri long dispela birua. Na moa plis fos bai i kam yet long hailans eria long strongim fos i go moa.

Ripot i tok ol i pret sampela bikhet man long ol setelmen i gat ol sotgan na ol birua samting bilong pait. Olsem na ol wok long rausim ol long ol setelmen i no inap isi.

Gavman long Madang i stapim pinis bia long las wik Fraide na bai bia i stop i go inap long krismas na nu yia. Dispela em bihainim dispela birua na pret nau i kamap.

Bos bilong Madang plis i sik olsem na em i no stap long mekim moa toktok.

Oposisen bai pusim mosen long Skate i mas risain

YAKAM KELO i raitim

TAIM palamen i kibung gen long mun Mas, 1998, bai Oposisen i pusim wanpela mosen long askim Praim Minista Bill Skate long lusim sia bilong em. Na larim opis bilong Praim Minista i stap nating.

Insait long wanpela Mosen pepa lida bilong Oposisen Bernard Narokobi i bin kamapim long las bung bilong palamen long mun Novemba, dispela pepa i tok; bihainim piksa long tupela vidio kaset long ABC televisen, Praim Minista i bin kamap long piksa ya we i soim olsem em i laik baim na grisim ol memba

bilong palamen na ol niusman. Em i tok tu olsem em i lida (Godfada) bilong sampela raskel grup na wok bilong ol long Mosbi siti.

Long dispela Mosen pepa, em i askim long palamen i mas bihainim toktok i stap pinis long mama lo long Seksen 111 we i tok long rausim Praim Minista long opis na opis bilong Praim Minista i mas stap nating.

Mosen ya i tok moa olsem palamen i mas nau rausim olpela Mosen we i bin makim William Bill Skate i bin kamap Praim Minista bilong Papua Niugini long 22 Julai, 1997.

Dispela vidio kaset em wanpela waitman nem bilong em Mujo Sefa husat em wanpela

pren bilong Bill Skate yet i bin kisim. Em i bin stilim Praim Minista Thomas Pelika na arapela memba tu. Em i karim kaset ya i go long Australia na go pilaim long ABC televisen.


Mosen pepa bilong Bernard Narokobi, memba bilong Wewak i askim palamen long tokim Praim Minista Bill Skate long kamapim wanpela painimaut grup (Komisen ov Enkwari) long lukluk insait na painimaut dispela ripot. Mista Narokobi i laikim dispela painimaut grup i mas sekim na painimaut long ol eksen bilong Bill Skate long em i givim mani bilong baim ol memba bilong palamen na sampela niusman, em i tok em i lida bilong ol

raskel grup na em i tok em i bin kilim na katim wanpela man hailans long naip.

Mosen bilong Oposisen lida i tok dispela pasin i mekim pret long ol pipel na i pretim ron bilong gavman sevis long i go long ol pipel na tu i pretim ol bisnis na praivet kampani na tu i pretim gutpela tingting na laik bilong ol bikpela investa kampani i kam long ovasis.

Mosen ya i laik painimaut sapos Praim Minista Bill Skate i bin brukim lo long seksen 27 bilong mama lo na Ogenik Lo we i lukautim na karamapim wok bilong ol lida.

Mosen ya i laikim ripot ya i mas kamap ples klia long mun Mas 1998, taim palamen i holim kibung gen.



Hailans painim buai long wara Ramu . . . Yu save lukim buai long maket na arere long rot long hailans, yu mas ting buai i kam long Lae tasol. Nogat ya! Ol dispela lain i go olgeta lusim Madang, aburusim Bogia stesin na i go long Wara Ramu, kisim bot na painim buai arere long ol viles long wara. Poto i soim ol i kam sua long Bunapak na redi long kisim ka i go long Mt Hagen. Poto: Peter Maime.

Gavman i no soim olsem Woks bai raus

NUPELA Minista bilong Woks Yauwe Riyong i tokim ol wokmanmeri bilong Woks long Mosbi olsem em bai karim hevi bilong ol i go toktok wantaim kabinet.

Memba bilong Suave, Mista Riyong i mekim dispela toktok bihain long olgeta wokmanmeri bilong Woks long Mosbi na arapela provins i bung long Mosbi dispela wik long autim belhevi bilong ol. Bel hevi bilong ol i sut long toktok bilong Praim Minista Bill Skate olsem gavman bai rausim Woks Dipatmen.

Long palamen las wik, Mista Skate i tok bai gavman i rausim dipatmen bilong Woks na givim wok bilong Woks i go long ol praivet kontrakta kampani husat i gat ol mesin na samting bilong wokim rot na bris na ol bikpela projek insait long kantri.

Long dispela wik, olgeta wokmanmeri bilong Woks long olgeta hap provins i no sindaun gut taim ol i harim dispela nius bilong gavman.

Sampela provins i bin salim ol mausman bilong ol i kamap long Mosbi dispela wik long bung wantaim ol Woks lain bilong Mosbi na toktok wantaim olpela Woks Minista Dibara Yagabo na nupela Minista Yauwe Riyong.

Minista Riyong i tok gavman i tok olsem, tasol em i no mekim wanpela samting yet. Bikos lukluk insait long nupela wok ministri bilong gavman, ol i

Morobe gavman brukim K25 milion long hevi bilong drai long provins

MOROBE Provinsel Gavman i brukim K25.920 milien aninit long Saplai Bil bilong en long skelim i go long ol wok bilong provins. Na dispela i olsem krismas na nu yia presen bilong ol pipel bilong Morobe.

Gavana bilong Morobe Luther Wenge, i tokim Tutumang olsem planti manmeri moa long provins i bin bungim bikpela hevi long dispela taim nogut bilong drai.

Olsem na dispela bai mekim gavman i skelim mani olsem K1,157,980 bilong baim kaikai bilong ol dispela lain manmeri, Mista Wenge i tok.

Nesanel Gavman grent (mani) i go long Morobe provins i olsem K17, 180,200. Na provins yet i kamapim mani olsem K8,740,396 long brukim insait long dispela Saplai Bil.

Tasol Mista Wenge i tok provinse gavman i mas gat mani olsem K900,000 long strongim na sapatim wok bilong karim helpim i go long ol manmeri long narapela tupela krismas bihain.

Em i tok bai gavman bilong em i holim bek sampela nupela projek bilong mekim kamap dispela wok bilong ol rilif operesen.

Olgeta memba insait long haus Tutumang i save olsem planti manmeri long provins i bungim bikpela hevi bilong bikpela san na drai, wankain olsem planti arapela manmeri long arapela provins.

Dispela i min olsem ol dispela manmeri husat i bungim hevi long bagarap bilong drai, bai i askim gavman yet long sapatim na helpim ol yet, Mista Wenge i tok.

Siaman bilong Fiseris na presiden bilong Siassi Lokol Gavman

Kausel, Mista Royden Aigal i tok amamas na sapat long dispela Bil bikos planti pipel bilong Morobe bai kisim sapat na helpim long dispela mani.

Laip bilong ol manmeri em bikpela samting na dispela gavman i mas holim bek arapela wok na ol samting inap laip bilong ol manmeri i kisim helpim pastaim, Mista Aigal i tok.

Nesanel memba bilong Kabwum na Vais Minista bilong Tursum, Ginson Saonu i tok strong long ol pablik sevans wokmanmeri long stretim hevi bilong ol manmeri bihainim taim stret.

Dispela i min olsem ol provinse na distrik edministreta i mas mekim wok bilong ol stret na bihainim taim long givim helpim i go long ol pipel, Mista Saonu i tok

makim yet Woks Minista we Mista Riyong i Minista nau. Dispela i soim olsem Woks i no aut yet.

Mista Riyong i tok em i harim pinis ol toktok na bel hevi bilong ol Woks wokmanmeri na em bai bringim dispela toktok i go long palamen long toktok wantaim ol kabinet memba bilong em.

Gavman i bin rausim pinis Saplai opis we Woks dipatmen i save lukautim long bipo. Dispela saplai opis i save kam aninit long Woks na i save skelim olgeta gavman saplai long olgeta hap provins long ol wok bilong gavman olsem haus sik, skul, provinse gavman na arapela gavman wok.

WANTOK

All departments. Phone: 325 2500 - Fax: 325 2579
P. O. Box 1982, Boroko, NCD, Papua New Guinea

Publishing Weekly, Thursday, for
Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

Acting General Manager and
Group Editor in Chief:
Anna Solomon.
Advertising Manager:
Mike Kanin.

Papers distributed by air
throughout PNG.

Available by air mail
subscription within
Papua New Guinea
and overseas

Editor of Wantok:
Leo Wafiwa.

Day. Camera ready copy: Wednesday, Friday.
Classified Advertising: Wednesday 5pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official display Advertising Bookings form.

WANTOK

NIUSPEPA BILONG OL PNG STRET

Taim bilong mekim ol promis gen

KRISMAS taim nau na yumi olgeta i ken kisim win bihain long wanpela krismas olgeta yumi i bin mekim planti kain kain samting long laip bilong yumi. Planti gutpela samting yumi mekim na planti samting we i no gutpela em yumi i bin mekim tu. Tasol olgeta samting ya i go pinis bikos ol de na nait i karim i go pinis. Nau yumi lukluk long nupela de na nait bilong nupela yia long i kam.

Dispela taim planti manmeri i save mekim sampela kain plen o promis bilong ol. Ol i save skelim i go bek long wanem samting ol i mekim long dispela yia. Na ol i laik senisim dispela pasin long narapela yia. Sampela i mekim sampela samting pinis na ol i pulap o tait pinis. Olsem na ol bai mekim promis long lusim dispela samting na traim narapela pasin o samting gen long narapela yia.

Ol ples klia promis planti manmeri i save mekim em long stapim smok, buai na dring bia. Ol i save olsem ol i manmeri bilong smok, kaikai buai na holim botol planti taim. Ating ol i save bungim hevi long ol dispela pasin bilong ol. O ating ol i save painim amamas long dispela pasin bilong ol. Olsem na ol i laik stapim na traim arapela samting gen.

Sampela manmeri i no save lotu gut. Ol i olsem hap taim lotu manmeri tasol. Nau, ating bai ol i pasin tingting na promis long go fultaim long lotu long neks yia. Ol bai skelim laip bilong ol na tok, ating mi no save go lotu olsem na sindaun bilong mi ino save gutpela. Olsem na nau em taim bilong mekim senis bilong painim gutpela sindaun.

Olgeta lida bilong yumi long gavman bai yu ken harim ol gutpela na naispela toktok bilong ol long yu long krismas taim. Bai ol i kam daun tru long level bilong ol grasrut manmeri na mekim ol naispela switpela toktok. Na bai ol i tok stret olsem, neks yia bai yumi mekim olsem. Yumi mas lusim pasin yumi mekim dispela yia na bihainim dispela rot long neks yia. Yu olsem man bilong ples, bai yu brukim skru gut tru long lida bilong yu na harim gut toktok bilong em long yu long dispela krismas. Em bai tokim yu stret olsem, neks yia, bai yumi mekim kamap dispela projek. Bai mi skelim mani olsem long yupela long mekim ol dispela wok. Yupela i mas kam long opis bilong mi neks yia na kisim dispela helpim. Dispela em ol naispela switpela krismas toktok bai memba bilong yu i givim long yu long krismas.

Ol Madang setelmen kamapim birua long gavman

YAKAM KELO i raitim

OL setelmen lain long Madang taun i pretim gavman na ol wok bilong em na tu i pretim ol wok about bilong ol. Insait long dispela birua, ol i pretim tu gavana bilong Madang Jim Kas na ol lain famili na wantok bilong em.

Dispela pret na birua pasin i kamap bihain long Madang Provisnel Gavman i bin kamapim lo long rausim olgeta setelmen we i stap long gavman graun. Na dispela lo i bin kamap bipo yet wantaim ol olpela gavman tasol inap nau, nupela gavman aninit long gavana Jim Kas i kamap na muvim na mekim kamap.

Provisnel gavman i makim long Desemba 31 1997, olgeta manmeri long ol setelmen i mas kirap na go pinis. Sapos ol i stap yet, bai gavman i muv i go insait wantaim ol wokman bilong em long mun Januari, 1998 na rausim ol.

Ripot i kam long opis bilong gavana long Madang i tok ol plis fos long Lae i kamap na stap pinis long Madang long wok poroman wantaim ol Madang plis. Bikos bikipela pret nau em ol lain bilong setelmen i wok long yusim ol pret toktok long pretim gavman na ol manmeri. I gat pret olsem nogut ol lain long setelmen i gat ol birua samting bilong pait na inap kamapim birua. Olsem na ol bai kisim moa bilong i kam yet, ripot i tok olsem.

Ol setelmen we gavman i laikim ol manmeri i mas kirap na lusim em olsem Siak, Bilia, DCA, Gav Stua, Pikus, olpela pipia ples na arapela moa.

Ripot i tok ol setelmen long Madang taun i groa bikipela tumas. Na namba bilong ol i wok long go bikipela olgeta taim. Na dispela i pasim na blokman planti gutpela graun bilong gavman long mekim wok long en.

Ripot i tok Madang i gat gutpela rot bilong pulim moa bis-

nis na wok i kam long develop- im Madang. Tasol graun i sot bikos ol setelmen i pasim ol. Olsem na gavman i laik rausim olgeta setelmen we i stap long graun bilong gavman na tu ol hap we gavman i no oraitim long sanapim ol blok nabaut.

Ripot i tok Madang provinsel gavman i bin opim wanpela opis bilong ol long kisim nem bilong ol manmeri husat i laik go bek long ples na provins bilong ol. Na ol i kisim nem bilong 6,000 manmeri pinis. Ol dispela lain manmeri i laik go bek. Olsem na gavman i gat progrem bilong karimaut long helpim ol i go bek long ples bilong ol. Ripot i tok ol i laikim ol manmeri i bihainim dispela rot bai i gutpela.

Ripot i tok dispela wok bilong rausim ol manmeri long setelmen i no sut tasol long ol manmeri bilong arapela provins tasol. Nogut, em i sut tu long ol manmeri bilong Madang provins tu husat i kam sindaun na sanapim blok long ol kain kain kona long laik

bilong ol. Ol tu i mas go bek long asples bilong ol, ripot i tok.

Ripot i tok ol manmeri long setelmen ino bin kisim gut tok-save bilong kot disisen tupela wik i go pinis. Ol mausman i go bek na tanim tok olsem ol i win na ol bai i stap yet. Tasol dispela i no tru.

Gavman i givim ol inap long Desemba 31 long dispela mun long olgeta manmeri i mas kirap na lusim setelmen bilong ol na go.

Long las wik Fraide, Madang provinsel gavman i kamapim tambu pinis long salim bia long Madang provins. Na dispela tambu long stapim bia bai wok i go inap long tupela o tripela mun samting. Na ol plis skwat tu bai mekim wok raun bilong ol tu inap tupela o tripela mun inap ol samting i go orai t gen.

Long dispela taim nau, ol i kolim Madang taun olsem Fighting Zone (hap bilong pait o birua).

Ol bisnis lain i laik baim Air Niugini

BIKPELA balus kampani bilong Papua Niugini Air Niugini i stap pinis long planti bikipela toktok politik bilong gavman. Gavman bilong PNG i kamapim tingting pinis long salim dispela kampani na sampela bisnis lain husat i ken ronim dispela bisnis i ken kisim.

Ripot i tok soim olsem Air Niugini balus kampani i gat

bikipela hevi long mani. Em i mas gat inap mani long mekim wok bilong em. Ol i bin askim long gavman i mas skelim K20 milien long ol olgeta yia. Gavman i save skelim tasol K9 milien long Air Niugini olgeta yia.

Long dispela yia, balus kampani ya i bin toktok pinis long apim prais bilong balus tiket i go antap. Em i bin apim balus tiket

pinis na nau em i laik apim gen long neks yia 1998.

Sem taim tu, balus kampani ya i bungim ol bikipela bagarap tu we tupela F28 balus bilong em i bin bagarap pinis. Na kos bilong ol spea pat bilong stretim ol bagarap balus na kos bilong ges na wel samting i bikipela. Long ol dispela as, balus kampani ya i bungim bikipela hevi moa na i laik apim kos bilong balus tiket.

Tasol gavman tu i wok long senisim ol bod memba na menesa bilong Air Niugini balus klostu klostu.

Memba bilong Wapenamanda na nau Minista bilong Minerol na Ges Masket langalio i bin tokim palamen olsem pasin bilong rausim ol bod memba na menesa i no inap stretim hevi bilong Air Niugini. Na tu taim em i bin stap olsem menesa bilong Air Niugini long bipo, em i bin tingting long salim na baim ol nupela balus bilong Air Niugini. Tasol dispela tingting bilong em i no bin karim kaikai.

Ripot i kamap pinis olsem tupela bikipela bisnisman i laik

baim Air Niugini balus kampani. Na tupela i bin mekim laik bilong tupela i go pinis long gavman. Tupela man ya em, Sir Dennis Buchanan olpela bos bilong Talair balus kampani na nau em ronim gen Flight West balus kampani long Kwinsten Australia. Narapela bisnisman em Mike Bromley husat i save ronim ol bikipela stua kampani long hailans na Lae.

Sir Dennis em gavman bilong olpela Praim Minista Paia Wingti i bin gat hevi namel long em na em i bin pasim bisnis bilong em na tekov i go long Australia. Em i save ronim balus kampani bilong em Flight West long hap.

Tasol planti ripot i kamap pinis olsem gavman bilong Bill Skate i bin mekim planti toktok egen-sim em pinis long i no ken kam bek long Papua Niugini.

Tasol Sivel Eviesen Minista Philemon Embel i tok olsem sapos menesmen bilong Air Niugini yet i laik kisim wanpela ovasis balus long kam helpim em long karim ol pasindia long dispela krismas, em disisen bilong menesmen tasol.

WANTOK

NIUSPEPA BILONG OL PNG STRET

P O Box 1982 BOROKO
Telepon namba: 3252500
Feks namba: 3252579

PE BILONG WANPELA YIA 52 NIUSPEPA

PLES	AIR
Mosbi	K30.00
Arapela PNG eria	K60.00
Australia na Nu Silan	K92.00
Esia pasifik na Japan	K123.00
Amerika na Yurop	K180.00



• Ol boi Azzimbah ben i raun long Samarai.

TOR TOO

TORO SELE-BRETIM KRISMAS LONG HAUS BILONG EM...

EM BAIM WANPELA WISKI BOTOL NA GO HAMARIM EM YET LONG HAUS...

BAIMI GO WAN MEN SPAK!

BAGA SPAK NOGUT TRU...

Hic! CHINGUL BEL... CHINGUL BEL... OLDANE..

AI NA TINGTING BILONG EM I TANIM NA EM TING EM STAP LONG PLES BILONG EM...

Hic! AIYOO, SOLWARA.. Hic! MI PAN!

EM TING SOLWARA I STAP DAUNBILO LONG HAUS NA EM KALAP I GO DAUN LONG VERANDA BILONG EM...

KREK!


BAGA INO LUKIM NU YIA..



• Tripela lida man long Not Nasioi eria long Sentrel Bogenvil i autim tingting bilong ol long stapim olgeta pait, na wok bung wantaim long bringim gutpela sindaun na amamas i go bek long ol man meri na pikinini long allan. Long lephan i go long rait em Francis Boria, Michael Tane na Siaman bilong Kaunsil bilong ol Bikman (COE) long Not Nasioi.



• Wok bilong mipela bilong helpim - Ol soldia bilong Nu Silan i rausim ol kago na saplai bilong kalkai long ol bikipela balus bilong ol. Ol dispela soldia i wok wantaim ol soldia bilong Ostrella, na sampela arapela PASifik Allan kantri long lukautim gut tras agrimen, em ol i kolim long Tras Monitoring Grup.



• Dispela bikipela ami balus bilong Nu Silan ami i kari ol kago na kalkai bilong Tras Monitoring Grup. husat i stap long Arawa long lukauyrtim dispela tras agrimen. Agrimeni bilong stapim pait namel long ol BRA, ol resisten paitman na soldia bilong PNG Difens Fos. Na larim ol ovasis grup ya (MG) i go insait long allan, na lukim wok bilong stretim toktok na sindaun i go het gut namel long ol grup ya. Ol poto na stori: Neville Choi.

Ol lida long Sentrel Bogenvil laikim pait i stap olgeta

NEVILLE CHOI i raitim

OL LIDAMAN long Not Nasioi eria long Sentral Bogenvil i tok strong olsem bihain long Burnham trus i pinis long neks yia, wanpela strongpela sis fia i mas kamap.

Dispela hap toktok i kamap long taim ol bikipela lidaman bilong Not Nasioi na Arawa taun eria i bung na toktok wantaim ol niusman long las wiken.

As bilong dispela toktok i bin kamap taim ol i bin askim: "dispela trus bai i pinis long Januəri 31. Nau yet long dispela taim, mipela i lukim olsem planti ol manmeri long Sentrel Bogenvil i kamapim gutpela sindaun na ol kisim strong long wanbel gen wantaim ol femili, komuniti na wan pisin bilong ol bihain long dispela bikipela pait i bin kirap. Sapos dispela triti i pinis long neks yia, wanem samting bai kamap? Mipela ol lidaman i laikim bai i mas gat wanpela samting bai stap oltaim bilong lukautim sindaun bilong ol pipel bilong Bogenvil. Mipela laikim wanpela sis faia."

Ol lidaman bilong dispela eria i tokaut olsem bihain long saining bilong dispela Burnham trus, na taim ol TMG o Trus Monitoring Grup i bin go insait long Sentrel Bogenvil, planti ol manmeri bilong Arawa taun eria na ol narapela ples klostu i bin kisim strong blong kamapim sindaun isi insait long taun.

Ol i tok tu olsem planti femili, komyniti na wan pisin husat i bin bruk na kros long taim kraisis i stat, i wok long bung na mekim pasin wanbel gen.

Linus Dake, Siaman bilong Not Nasioi Pis Komiti, em wanpela man husat i bin wok wantaim foma primia bilong Not Solomons, Theodore Miriung bihain long kraisis i bin stat.

Em i bin tok stori long taim kraisis i stat na taim dispela hap tingting long painim pis i bin kamap.

Mista Dake, husat i wanpela lidaman tu, i tok olsem dispela Burnham trus i stap nau em i kaikai bilong tingting bilong Mista Miriung long taim bilong kraisis.

"Long Octoba 18, 1994 mi bin helpim long kamapim pis wantaim Theodore Miriung taim nambawan bung blong kirapim pis i bin kamap.

Long 1995 Bogenvil Trencisinel Gavaman i bin kamap. Bihain long dispela, Mista Miriung yet i bin tokim mi olsem, 'ol samting ino go stret nau'.

"Em i bin tok olsem bilong wanem em i lukim olsem planti ol man i wok long dai yet," Mista Dake i tok.

Em i tok olsem bihain long Mista Miriung i bin wokim dispela toktok, ol i bin statim COE or Council Of Elders. Dispela em grup bilong olgeta lidaman insait long Sentrel Bogenvil eria.

"Planti man insait long Sentrel Bogenvil i bin laikim pis, olsem na mipela ol lidaman bilong dispela hap i bin kamapim dispela komiti," Mista Dake i tok.

Nau ol dispela lidaman i wok long toktok strong long kamapim gutpela sindaun bihain long Burnham trus i pinis.

Michael Tane, wanpela arapela lidaman na ofisa bilong BTG, i tok olsem sampela hap toktok i bin kamap olsem bai i gat wanpela ekstensen long dispela Burnham Trus.

"Mipela ol COE i harim sampela tok win olsem bai i gat wanpela ekstensen long dispela trus na mipela i tingting olsem dispela i no gutpela. Sapos ol i givim ekstensen, em bai i go inap wanem taim? Mipela i laik lukim wanpela samting olsem sis faia bai stap," Mista Tane i tok.

Olgeta lidaman bilong Not Nasioi i tok olsem bai ol i autim tingting bilong ol long sis faia long Prait Minista Bill Skate taim em i kamap long Bogenvil long dispela wik.



• Amamas i stap yet - Planti manmeri long Arawa taun i wok long kamapim bellei namel long ol yet. Dispela i kamap taim ol Tras Monitoring Grup (TMG) i kamap long Arawa long 4-pela wik i go pinis. Na ol mangi ya i save amamas tru long go waswas na pilai wantaim ol soldia bilong 21 Konstraksen Skwadron bilong Ostrella Ami.

Laitning kilim man long Balimo

IAN KAKARERE i raitim

WANPELA man long Balimo long Westen provins i bin dai bihain long laitning i kilim em long Fraide Desemba 5, 1997.

Ripot i kam long Evanjelikel Sios (ECPNG) helt sevis i tok dispela man na 21 arapela man i bin wet long bus haus long Balimo ples balus. Na birua ya i kamap long 11 klok moning samting.

ECPNG ripot i tok nem bilong dispela man em Augus Gwada. Em i gat 25 krismas. Na i bilong ples Kotale.

Sem ripot i tok tupela arapela man i sanap klostu long Gwada em laitning i kukim bodi bilong tupela.

Ol arapela pipel long dispela bus haus i kalap nogut tru. Na i

bin pundaun long graun.

Bikpela hevi ren wantaim klaud i pairap na laiting i kamap long Westen provins long sampela wik i go pinis, wankain tu long Kiunga taun.

Bruce Kondek na famili bilong em i bin kalap nogut tu taim laitning i bagarapim wanpela kapik diwai long beksait bilong haus bilong ol. Laitning i brukim dispela kapiak diwai long namel stret i go daun long rop bilong en aninit long graun. Mekim na long graun we rop bilong kapiak i go daun i bruk long mak bilong tupela mita olgeta.

Mista Kondek i tok ol banana diwai i stap klostu em laitning i kukim tu, na i wok long dai nau.

Joseph Moide na famili bilong em i bungim wankain birua taim laitning i hitim pawa pos klostu

long haus bilong ol long Kiunga Hai skol. Dispela i bagarapim ron bilong pawa we smok i kamap long fen insait long haus.

Tasol kwikwan wanpela mangi bilong em i tanim op pawa saplai bilong haus. Na nogat birua o bagarap i kamap.

Bihain long biksan i stap longpela taim, Kiunga i bin kisim bikpela hevi ren long sampela taim nau. Long mun Ogas, 2 milimita ren i bin pundaun, 183 milimita long Septemba, 60 milimita long Oktoba na 408 milimita long mun Novemba.

Bikos long hevi ren long mun Novemba na mak bilong wara long Flai Riva i go antap long 5 mita. Dispela mekim isi long ol sip na bot i ron i go antap olgeta na kamap sua gen long Kiunga. Wanpela bilong ol dispela sip em 'Hiri Chief'.

Waitpela bebi paura bai kukim Daru long Krismas na Nu Yia amamas

WANPELA Krismas singsing em planti manmeri save long en em "Dreaming of a White Christmas", na wanpela hap tasol long Papua Niugini we mining bilong dispela singsing i ken kamap tru em long Daru long Westen provins.

Noken ting olsem ol pipel bilong Daru ailan na ol ples klostu bai lukim waitpela sno long dispela krismas, olsem ples bilong ol waitman, nogat ya. Ol bai bilasim ol yet wantaim ol waitpela bebi paura long dispela Krismas na Nu Yia.

Long olgeta eria o ples long Daru na ol hap klostu long bikples, planti tumbuna 'taibubu' danis bai kamap long makim dispela ol holido bilong Krismas na Nu Yia. Long taim bilong singsing, ol manmeri bai wokabaut i go raun na kapsaitim bebi paura long ol manmeri.

Taim ol bebi paura i pinis, ol bai yusim ol pefum o smel sanda aerosal spre i antap long ol manmeri i danis na singsing, stat long het i go daun long lek.

Menesa bilong Daru Treding, Steven Douglas, i tok long dispela mun tasol ol manmeri i tingim dispela amamas na baim pinis planti bebi paura.

Pasin bilong yusim bebi paura i no nupela long ol pipel long hap. Bikos long taim bilong tumbuna, ol pipel save yusim ol paura em ol i mekim bihain long memeim ol sel bilong solwara. Na tromoi antap long ol manmeri long rausim dewel nogut i kam long bagarapim gutpela taim bilong amamas. Nau em ol waitman i kam, na bebi paura i teko-va.

Long ol arapela nius, gavman bodi i lukautim laisens bilong salim bia na o spak dring long provins i putim tambu pinis long salim ol botol bia insait long Daru. Astringting bilong dispela muv em long lukautim lo na oda, na tu long mekim ol pipel i stap gut na amamasim dispela taim. Bikos planti spak lain long Daru save mekim bikhet pasin bilong brukim botol long rot na pablik



• **Ol man, meri na pikinini bai danis na singsing i go inap moning. Na poto i soim wanpela mama i yusim pefum o smel sanda aerosal spre long mangi i danis, bikos bebi paura i pinis. Poto na stori: Ian Kakarere.**

ples.

Na ol dispela bruk glas i givim bikpela bagarap long lek bilong

planti manmeri na pikinini.

Olsem na ol manmeri ken baim ol tin bia tasol na dring.

Namba wan haus lotu long Mumeng distrik tingim betde bilong em

YAKAM KELO i raitim

• **Luteran manmeri long Mumeng distrik Morobe provins bai holim wanpela bikpela spesel lotu singsing kundu long dispela wik Sarere 27 Desemba, 1997. Dispela lotu bai bungim olgeta manmeri bilong Mumeng yet, ol sios lida na gavman nausman na tu ol lain pikinini husat i stap long ol taun na siti.**

As bilong dispela bung em bilong

tingim hatwok bilong ol kristen lapun bilong bipo husat i bin go pas long sanapim wanpela bikpela haus lotu long bipo. Na dispela haus lotu i bin namba wan simen haus lotu we i gat kapa na ain na fom bilong sindaun. Na dispela haus lotu i bin namba wan taim we olgeta hap bilong Mumeng distrik i bin nogat long en.

Planti ripot i bin kamap pinis olsem dispela haus lotu ol i kolim Parakris haus lotu i bin namba wan simen haus lotu ol sios lida bilong



• **Piksa i soim 4-pela nupela dikon wantaim famili bilong ol. Man i holim Baibel em Oeka Ivaharia na mama husat i holim bebi em Misis Ivaharia. Meri wantaim bilum em Misis Morovu Ou. Na Mista Eope Ou, em i sanap long beksait.**

Gerehu Yunaited sios makim 4-pela dikon

TUPELA marit i yusim dispela Krismas taim long givim laip bilong ol i go long God, na sevis long ol wan kristen, bihain long ol i kisim namba olsem dikon bilong Yunaited sios. Dispela em long wanpela bung em i bin kamap long Gerehu Yunaited sios long las wik Sande.

Ol dispela lain em Oeka Ivaharia na meri bilong em, Boio, na Eope Ou na meri bilong em, Morovu. Reveren Nou Kwalahu i bin mekim lotu bilong dispela tupela marit i kisim namba olsem dikon, we moa long 500 memba i witnessim.

Long pasin bilong Yunaited sios, sapos sios i makim man i kamap dikon, meri tu bai bihainim man na kamap dikon. Na helpim long wok


bilong sios.

Ol dikon ya i makim ol Koaru grup bilong kongrigesen bilong Gerehu Yunaited sios.

Kaoru poipel bilong sios em ol dispela lain husat i kam long Koaru misen sekut eria bilong Malalaua distrik long Galp provins.

Wanwan sekut i save bung long olgeta yia na makim dikon bilong ol. Dikon em ol manmeri husat i soim strongpela kristen bilip long laip bilong ol.

Long Mista Oeka na Misis Boio Ivaharia, em i namba wan taim bilong tupela long kamap dikon bilong kongrigesen. Mista na Misis Ous, grup i makim tuepla gen.



Papamama go Krismas holido long ples, na i no save olsem haus bilong tupela long Mosbi Siti i paia

Wanpela haus long Gerehu stes 3 long Mosbi i bin paia olgeta long bikmoning tru long Sande, Desemba 21, 1997.

I gat bilip olsem nogat manmeri i bin stap insait long haus long taim paia i kamap na kukim daun olgeta haus ya. Papamama bilong haus i bin go long ples long Rigo eria long Sentrel provins long Krismas holido, taim birua i kamap.

Haus em ol i wokim long faibro, simen na timba.

Nogat wanpela mausman bilong Nesanel paia Sevis i bin stap long toktok long dispela birua, taim dispela niuspepa i ringim ol. **Poto: Ian Kakarere.**

ples na ol manmeri yet i bin taitim bun long wokim insait long yia 1960.

Ol ripot i tok bihain long dispela haus lotu long ples Parakris i bin pinis, dispela haus lotu i bin holim namba wan sam (sios bung). Na i pulim ol bikmanmeri na ol sios lida long planti arapela ples na tu long Luteran opis tu i bin kamap.

Long dispela wik, bai ol pipel bilong ples Parakris i traim long mekim wankain gen. Tasol dispela em bilong tingim hatwok bilong ol

manmeri long bipo long sanapim dispela namba wan simen haus lotu wantaim kapa na ain.

Ripot i tok ol i laik tingim betde bilong dispela haus lotu long wanem taim ol bin stat wokim na nau em amas krismas haus lotu i sanap i stap yet. Ol i tok planti manmeri husat i bin karim ol bek wasan long tanim simen na wokim haus lotu ya i stap yet. Tasol ol lidaman bilong kirapim dispela tingting na go pas long mekim wok i dai pinis.

TU MINIT TINGTING

Tripela king i skulim yumi

STORI bilong tripela saveman king husat i bin wokabaut longpela rot na i painim bebi Jisas, em i gat kain kain skul i hait insait long en.

Tripela i kamap long Jerusalem na i go lukim King Herot. Herot i kirap nogut long harim nius bilong wanpela nupela king i bin kamap. Wantu em i laik kilim bebi Jisas i dai. Herot i no laikim narapela king i stap, em wanpela tasol i mas king long dispela hap. Em tasol i mas "namba wan."

Insait long bel bilong yumi i ken i gat dispela kain wari tu. Jisas i bosim laip bilong yumi; em i sindaun long sia king. Tasol isi isi sampela arapela samting i save kam insait na wok long daunim namba bilong em. Kain samting olsem: pasin spak, pasin pamuk, pasin gridi, pasin bilong pinisim laik. Ol i laik rausim God i stap long bel. Ol i bihainim pasin bilong Herot na i laik kilim i dai liklik bebi Jisas.

Namba tu skul bilong dispela stori bilong tripela king i go olsem: Long taim King Herot i laik painimaut dispela nupela king i mas kamap we, em i salim ol saveman bilong em i go ritim Baibel.

Yumi tu i mas mekim wankain. Long taim yumi gat wari o askim, orait, yumi opim Nupela Testamen na painim ansa.

Nekspela skul i go olsem: Tripela saveman i painim God we na ol i wokabaut i kam? Ol i painim God long ol samting nabaut long ol; ol i painim em long ol sta antap. Sore, ol i no lukim long "horoskop" long niuspapa. Nogat. Ol saveman tru bilong ol sta ol save tok bilas long "horoskop."

Inap long tude planti arapela



FRANK MIHALIC i raitim

saveman bilong ol samting bilong graun, em yumi save kolim ol saintis, ol i save painim God insait long ol samting nabaut long ol. I no gat wanpela man inap long wokim laip i no gat wanpela inap long mekim wanpela samting i gro; i no gat wanpela woksap inap long mekim wok bilong wan wan lip i stap long tri. Ol dispela i soim olsem: God i stap klostu. Ol saintis, ol saveman, ol i save pinis.

Wanpela poin yet: long taim dispela tripela saveman i bin kamap long Herot, ol i no sem long tokim em stret: "Mipela i kamap bilong adorim God." Ol i no sem long lotu na bilip na relisen bilong ol, maski ol i nambaman.

Na long taim ol i adorim God, ol i givim sampela presen long em. Bilong wanem? Bikos ol i laik soim, ol i bilip ol i bin kisim olgeta gupela samting long han bilong God; nau ol i laik bekim liklik bilong tenkyu long em.

Ating God i laikim ol dispela pasin bilong tripela saveman, long wanem, em i stiaim ol i go bek long ples, na ol i abrusim King Herot, husat i laik kilim indai liklik bebi Jisas.

Olsem tasol na God i bekim gut ol gupela pasin bilong ol. Em tasol ol skul i kamap long stori bilong tripela saveman king.

Tovarpin askim ol pipol long bihainim Kraiss

WENCESLAUS MAGUN i raitim

Asbisop bilong Madang Benedict Tovarpin i askim olgeta pipol bilong Papua Niugini long bihainim Kraiss long dispela Krismas. Em i tok marimari bilong God em i bikpela na i antap tru long olgeta marimari. Long dispela as God i salim pikinini bilong em i kam long graun bilong kisim bek olgeta manmeri, Kristen na ol lain i no bilip long God.

"Kraiss em i man bilong daunim em yet. Em i daunim em yet na kam daun olsem man. I tru em i gat olgeta samting, tasol em i no holim pas ol dispela samting long heaven. Em i lusim ol dispela samting na i kam daun long graun. Em i mekim olgeta samting ol man i save mekim tasol em i no mekim sin. Em i karim pen. Em dai. Na em i lusim olgeta samting. Maski las wara na blut long sait bilong em. Bikos em i laikim yumi na i laik kisim bek yumi," Asbisop Benedict i tok.

Asbisop Benedict i tok, Kraiss i sevim wol. Na olsem Krismas em i taim bilong olgeta manmeri na

pikinini long selebret long marimari bilong God. Em i tok em i taim olgeta pipol i mas amamas, maski taim yumi i gat planti pen na bel hevi. Kraiss yet i karim pen olsem na long taim bilong Krismas yumi mas putim sait ol wari na pen.

"Asbisop Benedict i tok tu olsem olgeta Kristen Sios i mas kam bung wantaim long Krismas na lotu o singsing na beten wantaim.

"Yumi olgeta i wanpela long Kraiss. Maski yumi gat kainkain bilip, sios o bihainim wanem kain lo, Kraiss i statim wanpela Sios tasol," Asbisop Benedict i tok.

Em i mekim dispela tok long strongim wanpela bung singsing na beten long Holi Spirit Katidrel we ol lain bilong Yunaited, Angliken, Memoriel Luteran, Yomba Katolik, DCA Katolik, na Holi Spirit Katolik bai bung long Holi Spirit Katidrel long Sande Disemba 21, samting olsem 7 kilok long nait bilong singsing wantaim kendel lait.

Klostu 20 yia olgeta ol Kristen bilong taun i save kam bung long Holi Spirit katidrel na singsing wantaim kendel lait long tingim

pestode bilong Krismas.

Pater bilong Holi Spirit Katidrel, Joseph Forstner SVD, i go pas long dispela singsing wantaim kendel lait.

"Dispela em i wanpela mak bilong soim olsem mipela ol Sios i no birua namel long mipela yet," Pater Forstner i tok.

Em i tok pasin bilong singsing wantaim kendel lait inap hopim ai bilong ol Kristen long lukim marimari bilong God long Krismas. Bai ol i ken kisim bel isi, na hop olsem God i kam bilong kisim bek ol.

"Ol pipel i ken luksave long marimari bilong God na skellim tingting na pasin bilong ol. Bai ol i senisim ol pasin nogut na kamapim gupela pasin. Mi hop Krismas em i taim bilong bel isi," Pater Forstner i tok.

Insait long dispela singsing wantaim kendel lait, wan wan singsing grup bai putim ol kwai bilong ol. Namel long ol kwai bai ol i singim ol singsing bilong Krismas. Bai i gat ol baibel rit, na Asbisop Benedict Tovarpin bai givim liklik toktok bilong amamasim ol long Krismas bipo long ol i go bek long ples bilong ol.

ELCPNG kamapim lotu lida skul

SANANG ZAZORING i raitim

Ministeriel trening dipatmen (MTD) bilong Evanjelikal Luteran Sios bilong Papua Niugini (ELCPNG), i stap long

taim pinis long sevim hevi bilong ol pipel. Dispela dipatmen i save skulim ol pasto, evanjelis, ol wokmeri na ol yut lida. Dispela dipatmen i kamapim tu ol inisevis-trening na ol semina long skruim save bilong olgeta wokmanmeri insait long Luteran Sios.

Long dispela rot, dispela dipatmen i mekim ol sios wokmanmeri i sanap wantaim kainkain senis bilong wok na save i wok long kamap long dispela taim bilong senis insait long sosaiti na ol straksa bilong komyuniti we ol pipel i stap na pilim hevi bilong kainkain senis.

MTD em i olsem dipatmen bilong wokman olsem em i sanap. Dispela dipatmen i kamap long helpim sios na kamapim gupela bilong ol Kristen manmeri na arapela ol pipol. Insait long 1992, wantaim dispela aida, mipela i wok long kamapim ples klia mak bilong dispela wok, na nau, mipela i laik lukim rot we dispela dipatmen i gat wok long kisim dispela sios i go het.

Rev Giegere Wenge, het bilong dispela dipatmen i bin kamapim dispela ripot long soim pasto konfrens long Septemba, tasol mipela i ting dispela ripot inap helpim yumi olgeta.

"Ol pasto olsem wokman, ol i mas wok stret long helpim ol pipel.

Sios i mas save tu em i trenim wanem kain ol pasto na wokmanmeri. Ol dispela pasto na wokmanmeri i mas save tru long wanem wok bilong ol. Long dispela rot, mak bilong dispela dipatmen bai karim kakaik bilong em," Rev Wenge i tok.

Luteran Sios i save trenim 100 pasto long olgeta yia insait long tripela seminari bilong en. Ol dispela seminari em long Logaweng insait long Finschafen, Ogelbeng insait long Hagen, na Martin Luther insait long Lae. Mak bilong ol dispela seminari em long kamapim inap wokman bilong Sios. Tasol yumi save sot yet long olgeta level bilong komyuniti we ol sios memba i stap long en.

Narapela bikpela samting sios i askim em pasin bilong lukautim ol pasto na wokmanmeri wantaim sindaun bilong ol. Planti taim ol pasto i save painim gupela ples na wok i gat gupela pe long kisim gupela helpim taim ol i no kisim gupela sapat i kam long kongrigesen bilong ol.

Moa yet, i gat ol nupela ples bilong wokmisiin yumi mas karamapim long wok Gutnius. Na long dispela as, sios i kamapim foapela evanselis trening senta long autim Tok bilong God, sikspela trening bilong ol meri wantaim Banz, Luteran Sios Koles insait long Westen Hailiens provins long skulim ol tisa bilong ol tokples skul, ol yut na lida bilong ol meri, wok edministresen na wok seketeri insait long wan wan level bilong sios. Ol dispela lain wokmanmeri bai mekim gupel awak long olgeta level bilong


sios insait long Sios.

Rev Wenge i tok nau ol misinari i wok long go bek, long wanem, ol i mas i go na sevim sios bilong ol yet. Dispela i min olsem yumi mas ranim wok bilong yumi yet long mekim dispela sios i sanap strong.

"Long dispela as, yumi mas mekim gupela senis i bihainim mani na strong yumi gat long han bilong yumi. Yumi lukim pinis hevi, olsem na yumi mas lusim sampela institusen bihainim amas mani yumi gat long larim yumi i go het long wok sios bilong yumi," Rev Wenge i tok.

Em i tok planti pasto na evanselis i save sapatim seminari na trening senta ol i bin greduet long en. Dispela em i no min olsem ol i noken wanbel long rausim wanpela bilong ol institusen. Ol i noken lukim wanpela institusen olsem samting bilong ol yet. Tasol ol i mas lukim olsem em i propeti bilong ELCPNG na toktok bilong senis i mas go het na wanpela samting i noken pasim rot bilong senis. Tasol ol i mas save gut olsem, bikpela samting em wok bilong autim tok bilong God i mas go het yet.

"Yumi stap lain bilong lukautim dispela sios na yumi gat wok bilong lukautim gut dispela sios. Na i no long bagarapim sios wantaim kainkain samting we mani i save go nating long ol. Yumi mas katim taun na mekim senis, tasol wanem taim i gat nit long skruim wok, em bihain bilong dispela sios wantaim senis na gro bilong en bai tok," Rev Wenge i tok.



• Ol yut bilong Bogenvil i stap ausait long haus lotu long Gabagaba long namba wan de bilong ritrit.

WENCESLAUS MAGUN i raitim

Nesene! yut kodineta bilong Yunaited Sios Asembli, Rev Rau Bevatati i tokim moa long 500 yut bilong sevenpela rijen bilong Yunaited Sios long Gabagaba ples ausait long Sentrel provins long kamap gut. Dispela yut ritrit i stat long Disemba 13-19.

"Yupela i no inap senisim arapela manmeri o pikinini sapos yupela yet i no lusim pasin nogut bilong yupela. Na sapos yumi larim yumi yet long surik i go baksait, yumi bai surik i go baksait long satan," Rev Rau i tok.

Em i salensim ol yut long luksave tu olsem ol i no inap kamapim wanpela samting sapos ol i no traim mekim sampela samting. Olsem

Yu no inap senisim arapela sapos yu no senis

Kristen em i tok, ol yut i no inap luksave long bilip na pasin Kristen bilong ol inap ol i mekim samting bilong soim Kristen bilip bilong ol long toktok, tingting na pasin.

Ol yut i kam long Bogenvil, Is Papua bikples, ol taun, wes Gulf, Niu Briten, Niu Ailan na Hailiens provins. Dispela em i namba wan taim bilong ol yut i kam bung long Yunaited Sios Asembli bilong Nesene! yut Konvensen (UCANCY) long Papua.

UCANCY em i wanpela yut program Yunaited Sios long Papua Niugini i kamapim insait long yut

wok. As tingting bilong UCANCY em long bungim ol yut wanpela taim long wan wan yia. Na kisim sampela saveman o savemeri bilong toktok long ol hevi na ol gupela samting i wok long kamap tude we inap bagarapim sindaun bilong sios, komyuniti, famili, ol yut na kantri.

Wanpela bilong ol dispela saveman husat i kam givim toktok long stat bilong dispela ritrit em Rev Kontiki Makani. Rev Kontiki i mekim wok olsem sekreteri bilong Pasifik Konferens bilong ol Sios long Fiji.

Ol lida bilong Yunaited Sios, na ol pipol bilong Gabagaba i mekim bikpela wok tru bilong lukautim ol yut i kam mekim ritrit long Gabagaba.

Ol stilman i mekim save long pablik

MATHIAS MALE i raitim

MOA long 100 pipel i kisim taim nogut bihain long ol stilman i kam mekim gan pairap na tromoi tiages long pablik ples.

Dispela hevi i bin kamap long Morata namba wan long Mosbi Sarere 13, long siks klok apinun.

Ol stilman i kam long wanpela nupela ka na stapim stret long bung ples ol komyuniti pipel pilai bingo, kas, salim buai na ol arapela maket kaikai. Hariap tasol ol i opim dua kamaut wantaim ol bikpela sot gan. Ol i faiarim nabaut na pretim ol pipel na lusim ol mani, ol samting na ronawe nabaut i go.

Taim ol pipel i lukim gan ol i lusim olgeta samting bilong ol na ol i ranawe i go pinis. Wanpela man husait stap long dispela taim bilong hevi, Mista Jeff Toino i tok planti manmeri na pikinini i kisim bagarap we bruk botol i katim lek bilong ol, ol mama i pundaunim bebi long graun na planti ol i kalapim ol waia banis na resa waya katim bodi bilong ol. "Ol dispela lain nau ol i stap long kism marasin long hausik, Mista Toino i

tok.

Mista Toino i tok tu olsem wanpela man Mista Davidson T. bilong Koiari Sentrel provins i bin kisim bulet long han bilong em. Em i tok dispela man i no inap kisim bagarap tasol em yet i rong tru long krosim ol stilman i stap.

"Ol stilman i panisim nus bilong em na pundaunim em long graun bihain sutim em long han na bulet i pas yet i stap long han na ol i kisim i go long 3-mail haus sik," Mista Toino i tok.

Manmeri ol i kisim bagarap long bodi ol i stap orait tasol planti bebi ol i kisim i go long Tri-mail jenerel haus sik bilong sekim. Nau yet i nogat wanpela dai na olgeta stap kisim marasin tasol i stap, Mista Toino tok.

Ol stilman i mumutim olgeta mani bilong bingo lain, kas, maket kaikai mani na tu ol arapela mani we ol mama i lusim nabaut wantaim bek long en, Mista Toino i tok.

Bihainim dispela pasin nogut ol Setelmen komitis bilong Morata i askim bikpela tok bilong bingo long stapim o pinisim dispela ol samting. Sapos yupela no harim tok ol bai askim plis long kam mekim save long yupela, Mista Toino i tok.

Ol lain Gunangi/Basis kisim taim

BUSTIN ANZU i raitim

MASKI ren i pundaun 3-pela wik go pinis long ol ples bilong traipela san na ais, angre bilong kisim kaikai, i stap yet. Ol manmeri na pikinini i wok long painim kaikai yet we planti i tok wanem taim bai gavman i stretim dispela wari bilong ol.

Ol lain bilong Gunangi/Basis insait long, Simbu provins i kisim taim tru long dispela ol hevi. Pes helpim bilong gavman tasol em i no kam long ol stret. Ol lain husait i slip long rot i kisim na ol lain husait i save slip bakait i no kisim wanpela helpim yet.

Presiden bilong Suwai lokol gavman kaunsel Paul Marama i tok olsem ol lain bilong en husait

i save slip klostu long Wara Wagi i kisim bikpela taim bilong ais na san. "Mipela i stap long Wara Wagi na aninit ston i pulap na taim san i hatim ston em hat i kam antap na sem taim em i ren mipela ol lain bilong mi i kisim bikpela pen stret." Presiden i tok.

Kaunsel Marama i tok olsem ol i stap long stes 5 na i luk olsem em bai kisim 4-5 pela mun long ol bai kisim gaden kaikai olsem kumu na tu ol kaikai olsem kaukau bai kisim longpela taim liklik. "Em i tok sapos ren i kam yet, ol lain bilong em (Gunangi/Basis) bai kisim taim yet.

Presiden i tok pastaim saplai ol i bin kisim kam em ino bin skelim gut. Em i tok, "Ol lain husait i save slip arere long rot olsem ol

gaden arere, Tapare, Kepai Koge na ol lain mipela husait i silip daunbilo na baksait long maunten i no kisim na dispela i no stret."

Em tu i tok sapos gavman i laik skelim kaikai o sap lai, en i mas mekim wankain pasin tasol. I no gutpela long helpim ol lain husait i slip long maus rot, wet lus tingting long ol lain baksait long maunten.

Tu i mas kaunim amamas lain i save stap long wanpela wod bilong kaunsel na tilim saplai.

Olsem na em i tok olsem ol lain bilong em i wet long kisim saplai long han bilong gavman. Sapos gavman i no luksave long dispela hevi bilong ol, planti lain manmeri bai i dai.



• Spika bilong palamen John Pundari i raun long greduesen bilong Sonoma Edventis Koles long Rabaul.

Askim long kamapim strongpela lo long ol bikhet lain

KIWURAM KANAKO i raitim

OL kainkain bikhet pasin i wok long bagarapim ol manmeri bilong kantri na gavman i mas traim na mekim gut na strongim ol lo bilong we i ken mekim save ol dispela manmeri husait i bikhet tumas.

Dispela singaut i bin kamap bihain long ol bikhet pasin olsem tok nogut, paitim ol manmeri, stil, bagarapim ol meri na kilim man i kamap bikpela long kantri.

"Mi askim nau gavman bilong Mista Skate long mekim lo we inap banisim laip na sindaun bilong ol man, meri na pikinini," Mista Benny Wamahasi, wanpela lida bilong Momase long Lae siti i tok.

Mista Wamahasi i sori tru olsem planti ol gutpela man, meri na pikinini i karim bikpela pen tumas long ol han bilong ol bikhet man. Na ol dispela pasin nogut i wok long go bikpela yet.

"Mi ting i gutpela sapos gavman i mas putim kamap strongpela mekim

save long ol bikhet o husait i brukim ol lo na bagarapim gutpela sindaun," Mista Wamahasi i tokim Wantok.

Mista Wamahasi i surukim tok olsem sapos ol man i spak na brukim banis bilong narapela orait i mas gat sas olsem K300 o nogat ol mas go stret long kalabus na stap inap tripela mun.

"Lukim yumi wok long loliloli stap na ol bikhet man meri i wok long lap tasol long yumi. Ol i save pilai kaskas long yumi olgeta ol polis, ol lo na kot na yumi ol liklik manmeri i karim olgeta pen," Wamahasi i tok.

Na long dispela taim yet, wanpela grup husait i makim ol asples yangpela manmeri long wansolwara ol kolim Pasifik Indigenous Youth Forum (PIYF), i singaut strong long o, papamama long was gut long ol pikinini bilong ol na strongim gutpela sindaun insait long famili.

"Gutpela na strongpela famili i save banisim gut ol gutpela tingting na pasin. Sapos wanpela famili i stap gut wantaim gutpela tingting na pasin, ol dispela samting tasol bai kamap ples klia.

PIYF tu i wari olsem sapos ol papamama i no was gut long pikinini, planti bilong dispela pikinini bai painim birua.

"Ol pikinini bai senisim yumi bihain olsem ol bai kamap lida manmeri. Yumi mas lainim ol gutpela pasin bilong bringim gutpela sindaun," husait i stap olsem general secretary bilong PIYF i strongim tok.

PIYF is wok olsem maus grup bilong ol lain olsem; Tonga National Youth (Ailan Tonga), West Papua Utrech Office (Holland), Fretilin Youth Darwin (Ostrelia), sei Skson Tieta (Solomon Ailians), Ainu Youth (Japa), Norfolk Youth (Norfolk Ailan), Sami Youth (Sami Norway) na tupela grup long kantri yet.

PIF i bin kamap long Darwin, Northern territory long Ostrelia bihain wanpela bikpela kibung ol i kolim long second world indigenous youth conference 92WIYC).

Wau LGK woka kisim tok amamas

ARI GUH DANDEE i raitim

OL wokmanmeri bilong Wau Lokol Gavman Kaunsel i bin kisim bikpela toktok amamas i kam long maus bilong nupela presiden bilong ol, Mista Awenu Erepe long Fraide long wok i go pinis long ol gutpela wok ol i bin kamapim insait long kaunsel eria bilong ol.

Em i tok, long dispela yia 1997, Wau Lokol Gavman Kaunsel wokmanmeri i bin putim kamap gutpela wok mak tru long sevim ol pipel

bilong ples long bringim ol gavman sevis i go tru long ol pipel aninit long nupela rifom wei, ol pipel nau i luksave long wanem as tru bilong dispela rifom em gavman i kamapim long en.

Long lukluk bilong Mista Erepe, em i lukim olsem rifom em gavman i kamapim tasol, em i amamas long lukim olsem ol wokmanmeri bilong Wau Lokol Gavman Kaunsel i mekim dispela rifom i wok tru taim ol i bringim ol gavman sevis i go long ol pipel bilong ples. Olsem na em i tokaut

long ol wokmanmeri olsem rifom i no inap wok tasol em ol wokmanmeri na ol pipel i mas mekim rifom i mas wok bai ol yet i ken lukim olsem wok bilong nupela sistem bilong gavman long lokol levul i karim kaikai bilong em. Na maski long les nabaut na wetim rifom long wok em yet bikos, rifom nem nating tasol. Pipel i mas mekim rifom i wok bai ol i ken lukim kaikai bilong em na amamas.

Presiden Mista Awenu Erepe i bin amamas tru long luksave olsem sevis bilong

gavman i karamapim tru planti hap bilong kaunsel eria bilong em na em i gat bilip olsem lokol pipel nau i luksave long rifom na em i strongim ol wokmanmeri long bungim han wantaim na wok bung wantaim long karim aut wok bilong 1998.

Em i askim tu ol kaunsel bilong wanwan wod long lusim tingting long pasin bilong politik. Stap klostu wantaim na wok bung wantaim gavman long karim aut na bringim sevis i go long ol pipel bilong ples.



TOP 20 This Week!

L/W	T/W	SONG	ARTIST
2	1	MAI TAURI AU	KABANI
1	2	LESE MORI	AZZIMBAH
3	3	FROOKS LONG MI	AZZIMBAH
4	4	JUSTINA	LEO WALILING
5	5	NOQUI-TAU	KABANI
7	6	OVAVINE	AZZIMBAH
6	7	ERE BINI TU	KABANI
8	8	KEPOKO	HIRI BAND
11	9	UNITY	F. TADOINN.JOHN
12	10	SWEET SOMETHING	APRENTICE
13	11	ToBEST	KANAI PINERI
14	12	BR. BOB MARLEY	APRENTICE
10	13	OPERESSIN RAUSIM	K. PINERI
15	14	DEDICATE MY LOVE	K. PINERI
11	15	AZZIMBAH	AZZIMBAH
18	16	HILSIDE	AZZIMBAH
16	17	SHERRY	SERU SEREVI
17	18	BOMANA	AZZIMBAH
0	19	UWAHO	HIRI BAND
19	20	KALUNGE	WILLIE TROPU

PNG FM PTY. LTD.
 Trading as
NAU FM
 and
YUMI FM

P.O. Box 774,
 Port Moresby
 Papua New Guinea
 Ph: (675) 320 1996
 Fax: (675) 320 1995

Hevi save daunim pasin bilong rit na rait Akbisop Meier i tok

BUSTIN ANZU i raitim

SKUL em ples bilong bungim ol yangpela long rit na rait na kisim save long lukautim ol yet na tu bungim ol yangpela long save bilong graun na heven. Tasol planti hevi i save mekim o bungim yumi daunim yumi long lainim ol dispela samting.

Tu, kain kain senis long gavman na tu long dispela bikpela hevi bilong traipela san na ais, em sampela bilong ol dispela

hevi i slowim pasin bilong lainim rit na rait.

Akbishop bilong Hagen Diosis Fr Michael Meier i mekim dispela toktok long gret 10 na 12 greduesen long Father Peter Secondary School (Fatima) long Banz, Western Hailens provins long las wik.


Em i tok olsem mipela i mas sanap strong long daunim dispela ol hevi. Em i tok, "Save yumi kisim skul em yumi mas

mekim gut na skulim ol narapela long pasin bilong sindaun gut. Hevi i stap olsem na planti samting i no stret. Mipela i mas sanap long lek bilong mipela. Tu em i tok long streim hevi em i no long kros, pait na belhat. Tasol long gutpela pasin bilong bel isi, sikhana na amamas.

Em i tok tu olsem long senis bilong gavman long rijinol na provinsel na lokol gavman, we planti memba i pait nabaut long daunim narapela. Tu hevi

bilong traipela san i mekim na planti ol pikinini i no skul gut long kisim save bilong rit na rait.

Long strongim ol yangpela long dispela, em i tokim ol yangpela sumatin husat i pinis olsem ol i noken slo daun long dispela tasol. Ol i mas strong na mekim wok i go het. Long dispela rot tasol bai mipela i ken mekim planti senis na mekim ol gutpela ol wok bilong mipela."



• Ol Hailans i raun painim buai long hap bilong Wara Ramu long Madang provins. Ol i kam bek nau na redi long go long Hailans. Poto: Peter Maime.

47 sumatin bilong Wau praimari skul i winim spes long hai skul

ARI GUH DANDEE i raitim

SAMTING olsem 63 sumatin i bin greduet aninit long top ap bilong Wau praimari skul long las wik Trinde wei em i namba foa taim tru bilong ol dispela sumatin long pasaut long dispela praimari skul aninit long rifom edukesen.

Dispela 63 sumatin i bin kisim bikpela amamas tru bikos ol i namba wan lain gret 6 long greduet aninit long rifom wei i soim bikpela amamas tru long ol papamama biong ol sumatin ol i lukim tru as top ap bilong ol skul sistem insait long kantri wei gavman i wok long kamapim.

Long dispela 63 sumatin, 47 bilong ol i bin winim spes long go skul long Grace Sekendari Hai Skul long Wau, wei i bikpela namba tumas insait long ol praimari skul bilong Bulolo Distrik. Dispela namba tu i givim bikpela amamas tu long ol papa mama bilong ol sumatin long dispela praimari skul.

Menesa bilong Wau Lokol Gavman Kaunsel Mista Francis Lowe i bin tokim ol sumatin long i mas i gat plen na gol bilong ol taim ol i stap olsem sumatin yet long i mas kamap wanem kain ol manmeri bilong dispela kantri long bihain taim.

Em i askim ol sumatin tu long i mas lukluk gut na glasim laip na sindaun bilong ol long traim daunim ol kankain trabel na hevi bilong kantri tude wei i wok kamap bikpela bikos long ol yangpela i no save bosim gut laip bilong ol.

Em i tok wok bilong kisim gutpela wok na sindaun i bikpela hatwok tumas na wanwan sumatin i mas tingting long ol yet wanwan na wok hat na strong insait long skul wok na long ol ausait wok tu.

Em i go het na tok aut olsem, rifom em wanpela bikpela samting na olgeta papamama na ol tisa i mas wok hat long mekim rifom wok. Sapos ol i lukim olsem kaikai bilong ol i mas kamap, bikos rifom yet i no inap wok tasol ol man i mas mekim em i wok.

Papamama na skul bod i givim bikpela tok amamas na tenkyu i go long Wau/Bulolo taun kaunsel long givim K18,000 bilong kirapim wanpela saiene lab wei, wok i stat nao na ol i ting bai i pinis ong dispela mun yet. Na gat tingting bilong kirapim tu wanpela prektikol skils klasrum tu long narapela yia.

Wanpela tisa meri bilong Wau praimari skul Misis Wendy Tango i bin tok ol tisa bilong skul i bin i gat bikpela amamas tru bikos aninit long rifom planti ol samting i no stap wei ol sumatin i ken kisim gut save long en tasol, em i gat bilip olsem ol tisa i bin wok hat tru long skulim ol sumatin bilong ol.

Misis Wendy Tango i tok kaikai bilong wok hat bilong ol tisa i bin soim tru kaikai bilong wok hat na ol i gat 47 sumatin na winim spes long hai skul. Wanpela sumatin Delores Geygang bin top studen bilong Wau praimari skul wei ol tisa i bin soim tru amamas bilong ol.

Sapos Jisas i no bin bon, bai i gat krismas o nogat?

KRISMAS nau. Na krismas em God i bin givim yumi long bikpela Jisas Kraus long amamas. Em taim yumi olgeta save bung, pati na amamas. Tasol amamas i winim yumi na yumi save lus tingting long mining tru bilong krismas. Olsem na yumi mas askim dispela kwesten. Sapos Jisas i no bin bon, bai i gat krismas o nogat? Mi bilip krismas em taim bilong yumi olgeta i amamas bikos God i givim yumi.

Long dispela krismas, mi laik tok tenkyu long God long wanpela samting. Em laip bilong mi na Jisas. Na olgeta pren na wantok bilong Wantok Niuspepa na Glasim Lewa na Tingting insait long yia 1997. Amamas na belisi bilong krismas wasim yupela olgeta.

Wantok nius i save kamap long olgeta wik Fonde. Na dispela wik krismas de i pundaun stret long Fonde, Desemba 25, 1997. Dispela long mi olsem kristen, em blesing bilong rait na ritim Wantok.

Em wanpela blesing long mi insait long dispela seksen bilong Glasim Lewa na Tingting na Wantok. Long amamasim

GLASIM LEWA
 na
TINGTING
 wantaim
Eddie
Saunders



Pestude bilong pikinini Jisas. Na yu wanwan i gat blesing long amamasim dispela de. Sapos yu skul na yu kisim gutpela mak, yu i no wok-o yu wok. Yu no kaikai na nogat mani o yu save kaikai na i gat planti samting. O wanpela i smaill long yu. Em ol blesing. Yu stap long bikbus, solwara, liklik ples, distrik, taun na siti blesing bilong krismas i kapsait antap long yu. Krismas taim i amamas taim


bilong liklik pikinini, ol manki, ol turangu manmeri na ol man na meri i daunim ol yet. Wantaim dispela mi beten tu olgeta yangpela meri na man bilong Papua Niugini putim ia. Na harim switpela toktok na blesing bilong bikpela long yu. Em i gat blesing long yu olsem mama bilong Jisas Maria na papa Josep.

Em i makim mama na papa bilong em. Lukautim skin bilong yupela long dispela krismas. Na stap longpela taim long graun. Na long liklik pikinini, bebi Jisas i pas wantaim yupela ol pikinini. Yupela i spesel pren bilong em. Bikos yu i klin.

Na long ol mama na papa, kamap holi famili olsem piksa bilong holi famili bilong krismas, Maria, Josep na Jisas.

Olgeta lapun na sik, bel isi bilong Jisas bai litimapim spirit bilong yupela olgeta. Amamas, bel isi bilong krismas i stap wantaim yupela olgeta. Na lukim yupela long 1998.

SBDC helpim yu wantaim liklik wok bisnis



I KAM LONG LAS WIK

SKELIM KOS NA MAKIM PRAIS

Dispela wik mipela bai toktok long pasin bilong skelim kos bilong ol prodak na makim prais antap long ol. Planti liklik bisnis save painim hat long makim stretpela prais long ol sevis na prodak em ol i salim long ol kastoma. Planti taim ol i no kia long we bilong makim ol prais. Long dispela bisnis, dispela em wanpela as we ol i save makim ol prais we i aninit ol daunbilo tru. Dispela min olsem ol bai kisim liklik profit mani tasol o bisnis no inap mekim profit na bai bruk na pundaun.

Long sampela bisnis, hevi em ol i makim prais i dia tumas. Dispela min olsem ol kastoma bai ranawe i go long narapela bisnis husat i sasim gutpela liklik prais. Sapos dispela i kamap, em i min mak bilong profit mani bai pundaun. Na tu bisnis ken bungim birua na go bagarap o pundaun. Olsem na em i bikpela samting we yu mas makim prais long ol sevis o prodak long stretpela level o mak, sapos yu laikim bisnis long gro na kamap gut. na tu mekim profit long sem taim.

Ol samting we yu wanwan mas skelim long makim prais i no wankain long olgeta kankain bisnis. Tok piksa, wanpela man husat i ronim tred stua bai skelim ol samting bilong makim prais, we i no wankain olsem papa bilong woksop o faktori bisnis. Tasol we o pasin ol i bihainim long makim prais long ol prodak o sevis i wankain tasol. Bikos bikpela astingting em long makim prais we yu ken kisim inap mani long bekim olgeta mani o kos bilong bisnis, na tu long sem taim yu mas salim planti samting, na kisim gutpela profit mani.

Skelim kos bilong ol prodak o sevis

Long makim kos em long makim kos bilong wanwan prodak, grup bilong ol kankain prodak o sevis em yu salim i kosim bisnis bilong yu. Sapos yu save long kos bilong ol dispela samting, yu ken:

- Makim prais o estimate bilong ol sevis o prodak yu salim.
- Save long wanem prodak i kos moa mani long salim o wokim.
- Yu ken save long kos na wanem kain plen bilong bisnis

long bihain taim.

Long olgeta bisnis, i gat tupela kain kos, em long tok inglis ol i kolim 'direct' kos na 'indirect' kos.

i) **Direct kos:** Dispela em kos bilong ol samting we i kamap hap bilong ol prodak o sevis yu kamapim o salim. Hia em sampela bilong ol dispela samting:

- ol samting em yu putim wantaim na mekim prodak o sevis em yu salim em ol i kolim long tok inglis olsem 'material' kos.

- Pe na ol alowens em yu baim ol wokman meri long taim ol i putim i go insait long wokim dispela prodak o sevis na salim, we long tok inglis em ol i kolim 'labour' kos.

ii) **Indirect kos:** Dispela em kos bilong ol arapela samting we yu nidim long ronim bisnis. Yu ken kolim ol dispela kos olsem 'overhead' kos long tok inglis. Dispela i karamapim ol samting olsem ren mani, lis mani, pawa bil, pe bilong ol wokman manmeri, kos bilong ronim na lukautim opis, kos bilong salim ol sevis o prodak, na interes mani long dinau em yu kisim long benk o ol arapela haus mani long helpim statim na ronim bisnis bilong yu.

Bilong wanem as na yu mas save long 'direct' na 'indirect' kos bilong yu? Dispela em i bikpela samting bikos yu mas save long kontrolim wanwan kos na makim prais bilong ol prodak o sevis em yu salim long ol kastoma.

Makim prais long ol sevis o prodak

Makim prais em long makim prais long ol prodak o sevis em yu salim long ol kastoma. Sapos yu laik makim prais, yu mas save pastaim long kos. Sapos yu no save long kos, yu no inap save sapos yu bai mekim profit o nogat. Planti bisnis bilong wokim ol samting, na bilong givim sevis i no save long kos bilong ol. Na tingting tasol olsem kos bilong ol long ronim bisnis i no bikpela. Dispela i no gutpela we bilong ronim bisnis.

Neks wik:

Mipela bai toktok long investimen em yu wokim long nupela bisnis bilong yu, we i min olsem sapos yu putim K10,000 long nupela bisnis, yu mas mekim moa mani antap long K10,000.

Famili bilong Prinses Diana go nau long kot

OL famili bilong Prinses Diana, husat i bin dai long Peris, long dispela yia i kotim nau biknem bisnismen, Mohamed Al-Fayed, long indai bilong prinses.

Prinses Diana i bin indai bihain long em stap insait long ka bilong

boipren bilong em, na laik ranawe long ol kamera man long wanpela nait. Dispela boipren em pikinini man bilong nem bisnismen ya, Mohamed.

Ripot i tok mama bilong Prinses bilong Wales, Frances Shand-

Kydd na sista bilong Diana, Ledi Sarah McCorquodale, i go pas long kotim Mohamed. Bikos ol bin westim moa long K8 milien long indai bilong Daina.

Olsem na long samons pepa, ol loya i makim tupela i askim long kisim kompensesen long wankain mak bilong mani. Ol loya i askim tu long moa ong K20 milien olsem kompensesen mani. Dispela em long interes mani ol inap long kisim long dispela K8 milien ol bin spenim, sapos ol i no bin yusim long indai bilong Prinses Diana.

Plis long Frans i ripot olsem draiva bilong boipren bilong Diana, husat i bin wok long Mohamed i bin dringim spak dring bipo long em i holim stia bilong wil. Na dispela em i wanpela as tu bilong Mercedes ka ol i ron long em i pamim wanpela Fiat ka long fron, na bihain i go pamim sait wol bilong rot.

Olsem na ripot i tok, i gat strongpela bilip olsem ol plis long Frans bai pinisim ripot olsem draiva bilong Mohamed husat i draivim Prinses Diana long dispela nait i as bilong indai na birua.

Insait long dispela birua long Frans, em i bin kamap long Ogas 31, 1997, Prinses Diana, wantaim wanpela pikinini man tasol bilong Mohamed (husat i boipren bilong Prinses Diana), na draiva bilong ka i dai long birua ya. Bodi kat o wasman bilong Prinses Diana tasol i kisim bikpela bagarap tasol, na i no dai.

Em i kisim planti mun long kam bek gut na toktok nau long ol plisman olsem wanpela ai witnes long dispela birua.

I gat bilip olsem ol kemera man husat i bihainim ka long dispela nait long kisim piksa em plis long Frans bai sasim ol tu long mekim na dispela tripela indai na wanpela bagarap i kamap.



OL WANSOLWARA NIUS

Gavman putim tambu long givim timba laisens long ol ovasis kampani

SOLOMON AILANS: Gavman bilong Solomon Ailans i kamap nau wantaim strongpela lo egen-sim ol timba kampani husat i no bihainim lo long katim timba insait long kantri.

Minista bilong Fores, Envaironmen na Konsevesen, Hilda Kare, i tok gavman i putim tambu pinis long noken moa givim laisens o tokorait pepa bilong katim timba i go long ol timba kampani.

Misis Kare i tok wantaim dispela tambu, em i bilip gavman bai katim daun namba bilong ol bikpela ovasis timba kampani long kantri. Na bai givim wok bilong katim timba i go long han bilong ol lokol pipel.

Em i tok em i rausim pinis laisens bilong katim timba long han bilong sampela timba kampani husat i no bihainim lo long katim gut timba.

Em i tok moa olsem em i kirapim gen wanpela bodi bilong lukautim wok bilong katim na salim timba insait long kantri. Nem bilong dispela bodi em Timba Kontrol Yunit, em i bin kamap wantaim sapot bilong gavman bilong Ostrelia.

Olpela gavman bilong Mamaoni i bin rausim dispela bodi long 1995.

Fiji plis sekim nau ol bot, sip na balus long maritwana

FIJI: Plis long Fiji bai sekim olgeta bot, sip na balus i go namel long ol ailan na bikman insait long kantri yet. Astingting bilong dispela em long sekim long ol spak brus samting olsem mariwana.

Plis Komisina, Isikia Savua, i

tokaut long dispela plen bilong plis. Na tok ol plisman na plismeri bai stat long sekim ol balus, sip na bot long stat bilong neks yia, 1998.

Mista Savua i tok wanem samting ol i plenim nau em long kisim moa plis dog, husat bai mekim gutpela wok stret long smelin na sekim hap em ol manmeri i haitim spak brus insait long balus, sip na ol bot. Olsem na em i redim plen nau long kisim moa plis dog i kam long ovasis. Bikos nau yet plis i no gat inap plis dog long helpim ol long kain bikpela wok painimaut.

Dispela toktok bilong Savua i bihainim wanpela ripot bilong las wik we plis i kisim sampela mariwana long wanpela bot e, ol i kolim Princess Ashika. Na holim pasim na sasim wanpela man, husat io gat 42 krismas. Plis i no givim nem bilong dispela man. Tasol ripot i tok man ya i bilong ples Kadavu.

Presiden Clinton makim Guam olsem disasta eria

HONOLULU: Teritori bilong Amerika insait long Pasifik, Guam, em Presiden Bill Clinton i luksave olsem i gat bikpela bagarap, na pipel i nidim helpim. Olsem na ol i kolim nau Guam olsem 'disasta eria'.

Ripot i tok long las wik Trinde, bikpela win em ol i kolim 'typhoon Paka' i ron i go olsem long hap na bagarapim planti samting tru. Kos bilong ol bagarap winim K200 milien.

Gavana bilong Guam, Carl Gutierrez, i givim askim opis bilong presiden long luksave long dispela askim. Na presiden i givim luksave. Dispela i min nau olsem Guam bai wet tasol long kisim mani i kam long gavman long stretim ol bagarap.

Ol namba wan ripot i tok planti haus tru i bin bruk pundaun long

dispela strongpela win. Mekim na i bin nogat pawa saplai long longpela taim, wantaim tu long telepon sevis.

Nau yet bikpela eria long Guam i nogat wara saplai. Ol bisnis ron bilong balus i go long Guam i stap tu. Masi Guam intanesen ples balus na Anderson Ea Fos bes i kisim ol imejensi ron bilong balus.

Televise Samoa lusim NZTV na Joinim Ostrelia Televisen

SAMOA: Nesenel televisen sevis bilong Samoa, Televise Samoa, i pasim tok pinis long wok bung wantaim Ostrelia Televisen long 4-pela yia olgeta.

Siaman bilong Televise Samoa, Prait Minista Tofilau Eti Alesana i bin tokaut long dispela long las wik Fonde nait, Desemba 18, 1997.

Aninit long dispela tokorait, Ostrelia Televisen bai saplaim wanpela satelait dis fri.

Televise Samoa i bin wok bung wantaim TVNZ long bipo. Tofilau i tok dispela nupela agrimen i min olsem Televise Samoa i no moa wok bung wantaim TVNZ. Em i tok disisen bilong lusim TVNZ em bikos em i bin kos moa mani.

Ripot i tok bipo taim Televisen Samoa i wok bung wantaim TVNZ, em i save kosim Televise Samoa moa long K1 milien olgeta long wanwan yia. Na stesin i no bin mekim inap mani.

Ripot i tok aninit long dispela nupela agrimen, Ostrelia Televisen bai saplaim program bilong ol pikinini, nius, ol nius ripot olsem 'Current Affairs', ol pilai drama na mini sirus na piksa, na tu ol arapela program bilong Ostrelia Brodcasting Kopresen (ABC), Spesel Brodcasting Sevis, na Janel 7, husat i papa ong Ostrelia Televisen.



PABLIK TOKSAVE

I GO LONG OLGETA SEAHOLDA

Husat laik baim bek sea mas kisim aplikesen na pinis bipo long 31 Disemba 1997.

Plis, mipela laik toksave olsem, mipela i no inap lukluk long ol aplikesen bilong baim bek sea we mipela kisim bihain long 31 Disemba. Bai mipela lukluk long ol dispela long pinis bilong Mas, 1998.

Dispela bai helpim mipela long baim olgeta lain husat i bin baim sea long mipela bipo long mipela printim Anuel Statmen. Em bai soim hamas moni tru mipela baim olsem win moni i go long olgeta seaholda bipo long 31 Disemba.

INVESMEN KOPRESEN FUN OV PAPUA NIUGINI

Toksave tu i go long olgeta kampani husat i save yusim Pe Diduksen Skim long salim sea bilong ol wokmanmeri bilong yupela. Yupela mas hariap long givim nem bilong ol wokmanmeri na hamas moni ol save putim i go long Investmen Kopresen Pe Diduksen Skim.

Em inpoten tu olsem mipela laik kisim nem bilong olgeta seaholda bilong Disemba bipo long mun i pinis. Dispela bai helpim mipela long baim ol sea na putim nem bilong ol i go insait long Rejista Memba buk bipo long 31 Disemba, 1997 na ol i ken kisim ol win moni bilong ol long dispela yia.

Mipela bai amamas tru long gutpela helpim bilong yupela.

**MR. JOHN K. RUIMB
MENESING DAREKTA
INVESTMEN KOPRESEN OV
PAPUA NIUGINI**

LAIPSTAIL

KANAGE



• Liklik brata bilong Kanage i dai na ol manmeri bung long haus kra i kra i long bodi i stap. Meri bilong Kanage i poromanim pos bilong haus na i wok long kra i olsem: :E-e-e daunbilo, e-e-e hangamap, e-e-e daunbilo e-e-e daunbilo, e-e-e hangamap, e-e-e daunbilo

Kanage harim i go na em belhat tru. Na askim meri bilong em: "Olgeta man i kra i long bodi na yu kra i long wanem" Tasol meri bilong Kanage i no harim tok na mekimsave long kra i yet: "E-e-e daunbilo, e-e-e hangamap, e-e-e daunbilo e-e-e", na wok long poinim finga i go long Kanage, "E-e-e daunbilo, e-e-e hangamap, e-e-e daunbilo e-e-e ..."

Kanage lukim meri bilong em i poinim finga long em na kra i. Na em sekim em yet na lukim olsem em i no sindaun gut. Na em statim kra i gen: "E-e-e larim, e-e-e larim em i stap, e-e-e larim, e-e-e lus tingting, e-e-e larim".

Ol manmeri long haus kra i pinis long kra i na lukluk long Kanage na meri bilong em i stap.

Danny Konex (Namba 2 wina)
Angoram
IS SEPIK

• Kanage em bilong Tairora namba 2 long Kainantu distrik bilong Isten Hallans provins. Em wok long Kainantu haus sik olsem ambulens draiva. Misis bilong em Julie i gat bel pinis. Na redi long karim bebi.

Olsem na em i kam ripot long bos na kisim ka i go long ples long kisim meri. Liklik bilong Julie tu kalap long ka na ol i kam.

Namel long rot Kanage stapim ambulens na tokim misis: "Julie! Long hia mi yet bai sekim yu pastaim, bihain yu go long haus sik ol kinkain dokta bai sekim!" Misis harim na i no amamas: "De i kam, wik i kam, mun i kam, yia i kam! Sekim, sekim, sekim, sekim, i nogat malolo bilong yu stret!" Julie hatim Kanage, tasol Kanage i tok gen: "Sori Julie, nogut ol dokta i kros long mitupela sapos ol i lukim i gat spes long wansait. Olsem na mi laik pulapim gut pastaim".

Konny Boiru
KAINANTU

• Kanage i lapun pinis na stap long ples blong em long Ambunti, longwe long Wewak taun. Pikinini bilong Kanage i stap long Wewak. Wanpela de, pikinini singautim Kanage long kam stap wantaim em, meri pikinini na ol tumbuna.

Kanage i kamap long Wewak long nait. Ples i tudak pinis. Na Kanage inap lukim gut Wewak taun.

Pikinini bilong Kanage i gat gupela haus. Na tu kebol televisen i stap. Taim kaikai pinis, Kanage na tumbuna pikinini sindaun i stap long lukim televisen. Kanage ai op i stap long lukim ol kinkain televisen stesin olsem QTV, ABC, CNN, SBS na spots stesin, ESPN.

Kanage askim ol tumbuna long mining bilong ol televisen stesin. Ol tumbuna i save long olgeta. Ol i no save long mining bilong ESPN. Tasol ol giamanin Kanage na tok olsem: "Bubu, ESPN min olsem East Sepik Provins! N'as". Kanage harim na bekim long ol tumbuna bilong em: "Sore tru, mi kamap long Wewak taun long nait na ples i tudak. Tumora bai mi raun na lukim ol dispela pilai aishoki na ol longpela bun mangi Kerema na Makam pilai NBA basketbal long hia".

Ian Kay
KIUNGA

Ol bisnis bilong salim kaikai i senisim laipstail



• Tupela PNG man ya i traim ol kaikai bilong Japan wantaim sop stik.

KIWURAM KANAKO i raitim

WANPELA switpela susa bilong mi long biktaun Saipan antap long not pasifik i rait i kam long mi na i bin stori liklik long sindaun bilong ol long ples. Ol planti stori em save toksave long mi long ol pas na sampela taim long wailis telepon i save mekim mi belhat, wari, sore na tingting planti.

I gat planti stori i kaim long ples bilong susa hia. Em save stap na wok long Saipan na planti taim em is ave traim na halivim ol yangpela manmeri long painim gupela tingting na sindaun.... tasol i i gat bikipela birua i stap.

"Coca Cola, Nike Shoe na Mac Donald i save kaikaim mipela na mekim mipela i hangamap long ol dispela pipia samting," susa long Saipan i stori.

Yumi mas luksave olsem Coca Cola em wanpela bikipela kaikai kampani bilong Amerika o long tok Inglic ol save tok olsem food corporation na Coca Cola i gat planti moni na pawa na inap long kamap bos bilong laip bilong yumi. Na tru tumas Coca Cola i bosim yumi tu long Papua Niugini.

Mi save wari planti olsem yumi ol manmeri long Papua Niugini i no save tingting na skelim wanem kain samting yumi save lukim, harim, smelim, holim na kaikaim ol dirngim! Nogat, wanem samting i stap long pes bilong yumi, em yumi save mangalim na holim strong tumas.

Nau long Saipan yet bai yu inap long bungim ol planti

yangpela manmeri, ol pikinini na tu ol bikmanmeri i sanap sambai long ol kaikai stua o kopi haus bilong McDonalds. Na sapos yu stap long Pot Mosbi, biktaun bilong yumi, traim kalap long bas, na go long Big Rooster long Renbo Ples, bai yu klia long wanem samting mi stori long en.

Olsem mi tok pinis long Coca Cola, McDonalds na Big Rooster, ol dispela bikipela kaikai kampani i stap pinis namel long yumi ol pipel bilong Pasifik. Ol i bosim pinis laip bilong yumi na ol i no wair sapos yumi painim sik olsem "long long kau (mad cow) sik sapos yumi kaikai dispela pipia kau mit i stap insait long dispela beef burger yumi baim long kopi haus bilong McDonalds.

Pasin na stail bilong rereim ol kaikai bilong yumi yet long Pasifik i senis pinis na planti bilong yumi i laik kaikai long ol haus kaikai olsem McDonalds na Big Roosters na planti arapela haus kaikai bilong ol kongkong lain.

Taim yumi mekim olsem, yumi wok long daunim ol gupela stail rot bilong mekim kaikai na sup long Pasifik stail. Na sapos yu askim dispela i kamap olsem wanem? ating mi ken bekim olsem: Long les pasin bilong yumi tasol na yumi laik go kaikai masta kaikai na i no kanaka kaikai bilong yumi stret.

Yu save pinis long pasifik stail sapim ol kaikai, sigirapim kokonas, brukim paiawut, putim ol sayor na ol abus wantaim kaikai na wanem gen oloman, planti hatwok tumas. Planti hatwok tumas na taim gupela smel i kam, yumi save

daunim spet na dispela em switpela na gupela pasifik kaikai stret.

Mi no tok olsem olgeta man, meri na pikinini i save kaikaim ol dispela pipia kaikai, nogat, i gat ol lain i stap lon gples olsem Pot Mosbi, Lae, Hagen, Madang, Rabaul i save laikim ol dispela kaikai bilong Big Rooster na McDonalds wantaim ol kongkong kaikai na wasim nek wantaim Coca Cola na dispela i tru olsem ol lain long ol kain ples olsem Mosbi i wok long sapotim ol dispela kaikai kampani long baim ol pipia kaikai bilong ol.

McDonalds, big Rooster na Coca Cola i kisim bikpea win moni tru ha yumi wok long halivim long pulim ol kinkain sik na indai i kam klostu. Na tu yumi kalabusim yumi yet long ol dispela kaikai.

Yes, mi ken tokim yu olsem, McDonalds i bin tokim ol manmeri long Japan olsem: "sapos yupela kaikai ol hamburgers beef burgers bilong McDonalds bai yupela i gat blupela ai na bai yupela kamap longpela manmeri."

Ol lain brata susa long Japan bai tok McDonalds i kusai stret." Em i tru tumas. Olsem na yumi long Papua Niugini i mas skelim gut. Sapos yumi laik stap kalabus manmeri bilong ol bikipela kaikai kampani orait go na baim ol hamburgers beefburgers na lunch box na dring Coca Cola tasol! I no narapela dring, nogat, Coke tasol.

Tasol sapos yumi laik sanap strong na was gut long ol gupela kaikai bilong yumi na ol gupela pasin tumbuna bilong yumi, orait wok i stap long han bilong yumi wanwan nau.

Mi bai sem sapos mi painim o lukim yu sanap long Big Rooster long Renbo ples long Mosbi na baim wanpela lunch box belo bokis wantaim wanpela coca cola 500ml botol plastik dring. I moa gupela sapos yu baim wanpela bilum kaukau na sampela aibika long Gerehu maket na mekim gupela sup long stail bilong Pasifik stret.

Na sapos yu laiks ave moa long McDonalds yu ken rait i go na askim ol dispela lain long givim yu adress bilong McLabel Campign. Adress en: Melanesian Environment Foundation, PO Box 4830; Boroko, NCD. MEF tu i gat wanpela vidio tap ol i kolim long Jungle Burger na yu ken askim ol long mekim wanpela copy bilong yu.

Yes mi sore ya. Ol planti yangpela manmeri (i no yangpela tasol) i wok long kalabusim ol yet na hariap tumas i go pas (olsem Zabag bilong rip) long pasin na stail bilong ol bikipela kaikai kampani olsem nogut yu ting yu stap long Los Angeles, New York, Paris, Sydney, Honolulu o Tokyo.

Sori tumas nogat nau. Yu stap long Saipan na Mosbi. Na yu werim Nike su, dring Coca Cola, kaikai maxi burger/king burger/belo bokis bilong Big Rooster, werrim Red Joe Jeans na harim music bilong Inner Circle na Spice Girls na yu tok Mr Father Mangi o Mi Mother meri.

Yu save olsem yu kamap kalabus manmeri bilong ol bikipela kaikai na klos kampani yu yet nau. Save i stap long yu. Na long switpela susa long Saipan mi laik tok. Hafa Adia.

KIWURAM KANAKO i raitim

PLES Wagu i stap long Hunstein Range o oif Maunten abrusim Ambunti i go insait klostu long boda mak bilong Sandaun na Enga provins. Mi ken pilim nais na hamamas na tokim yu olsem: "Ples Wagu i gat olgeta samting ol abus ol kaikai, pis, buai, saksak, ol bikpela bus, gutpela na strongpela pasin bilong ples.

Tasol mi no bin lukim wanpela raun wara i luk nais tumas olsem Raunwara Wagu. Tru tumas, mi yet bin kamap long dispela ples Wagu wantaim ol tupela brata long Wewak. Na tupela Dennis na Gabriele wantaim mi i bin go lukluk raun long ol ples antap long Haunstein Range - Wagu na Yigei.

Yu save pinis, mipela kilim stret long kanu stat long Pagwi na go antap long Ambunti na bihain mipela lusim bikpela Sepik Wara na bihain ol liklik han rot wara i go kamap long

Raunwara Wagu i pulap long laip

Wagu.

Taim mipela i tanim wanpela kona nau, kepten bilong kanu i tok: "Em nau yumi kamap long ples Wagu. Na bai yumi ron antap long raunwara Wagu. Mis indaun na lukluk raun long Wara Wagu. Ai bilong mi i go lus nating long ol as bilong ol maunten i go olsem long hap bilong Sandaun na Enga. Mi tanim het na lukluk gen i go long hap bilong san i kam antap. Man, ai tu i lus nating long ol kainkain gras na diwai bilong ples i gat wara.

yes, olgeta samting mi lukim i gutpela tumas. Ol gras na bus bilong war, ol pato, ol kainkain pis na pukpuk na planti arapela samting. Orait mi kirap isi tasol na sanap antap long kanu na stretim skin na kepten i tok. "Lukim, em Wagu komyuniti skul antap long liklik

maunten na hapsait em ples i stap. Mi kirap na askim. Na skul i stap gut tasol? Kepten i bekim. "Olgeta tisa i ranawe go pinis na i no bin gat skul long 6-pela mun nau.

Mi no kalap nogut long bekim bikos mi save olsem Wagu em stap longwe tumas long Ambunti, Pagwi na Wewak. Na nogat wanpela tisa tu bai laik stap long kain ples olsem Wagu.

Mipela i go sua long hap ples we kepten i save stap long en, rausim ol bek slip na ol kako bilong mipela na kisim maloto. Ol lain long ples i kisim toksave pinis olsem mipela ol lain i stap wantaim Is Sepik kaunsel v women (ESCOW), Friends of the Sepike (FOTS) na Melanesian Solidarity (MELSOL) bai go long Wagu.

Mipela i bin go raun long stori

wantaim ol lain bilong ples Wagu long wok bilong katim diwai na lukautim gut bus. Pestaim ol sampela lain kampani i bin go longples Wagu na traim long baim ol long K2.00. Dispela moni ol i bin tok olsem em sekan moni tasol bilong winim tok orait bilong ol as papa mama graun. Mipela tu stori wantaim ol lain bilong Wagu long lukautim gut ol bikbus na ol abus bilong ol. Ating long tok Inglis bai yumi tok, mipela go mekim wok skul (awareness) an tokaut tu long ol lo i save lukautim ol raitis (rights) bilong ol as papamama graun.

Bihain liklik taim san i laik go daun, mi bin go raun wantaim ol yangpela mangi bilong ples.

Mipela i go antap long skul banis. Ol i lusim mi na mi go sindaun antap long dispela kil we mi inap long lukluk i kam olsem long hap bilong Ambunti.

Tasol ol maunten bilong Yigei i pasim ai na mi lukluk tasol long ai bilong tingting olsem long tok Inglis, yumi tok imagine. Orait mi lukluk gen long raunwara na mi lukim ol manmeri i pul isi isi i kam long ples. Ol dok i singaut long hapsait basis, ol liklik pikinini lap na hamamas na pilai nabaut long wara, mi lukim ol simuk bilong paia na lukim ol lait bilong san i danis antap long raunwara... Yes, ol pis i kalap klostu tasol na ol blakpela pato i pairapim ol kangal bilong oina flai i go hapsait long raun wara.

Wara Wagu i pulap tru long laip. Olgeta dispela laip-manmeri, ol abus, bus, wara i hanmak bilong wanpela man tasol yesa em bikpela man tasol. Ol dispela bilas bilong graun i stap tausen tausen krismas i go pinis.

Olsem long buk tambu long nambawan buk we i tok olsem bikman i mekim olgeta samting pinis na em i hamamas tru long hanmak bilong em. Na em i blesim ol dispela samting kem yet i mekim."

93FM YUMI Redio

Stesen bilong yumi yet

Harim olgeta gutpela

program long


93FM YUMI

- * Olgeta lokol sing sing, na ol musik bilong bipo yet
- * PNG Motors prais bilong kes krop
- * Yamaha Provinsel weda ripot
- * BSP liklik bisnismen ripot
- * Pepsi lunch hour rikwest
- * City Pharmacy Lukaut bilong bebi
- * Post (PNG) Ron bilong ol Sip
- * Ela Motors kantri kaundaun
- * American God
- * Sande Gospol so

Em rait redio stesen ikamap pinis harim long tok ples bilong yumi yet, 93FM YUMI

Salim rekwest i kam long: **YUMI** request
Locked Bag 93
Port Moresby, NCD.
Fax: 320 1995

93FM



NAUFM

YUMI

PNG FM PTY. LTD.
Trading as
NAUFM and YUMI FM
P.O. Box 774,
Port Moresby,
Papua New Guinea
Ph: (675) 320 1996
Fax: (675) 320 1995

KANAGE



• Kanage em i wanpela lapun man bilong National Can na Drum Industries kampani long Lae siti. Wanpela de em wok i stap na tingting bilong em i pas long kaikai wanpela skon na pinat bata long belo taim.

Kanage i lapun pinis. Olsem na em i no save gut tumas long ol bren nem bilong ol pinat bata. Orait long belo stret, baga nogut i go long stua bilong ol Hagen long P.I. Logging. Na em i tingim pinat bata long wanpela botol Keinz bebi fud. Em baim dispela bebi fud wantaim wanpela skon. Stua kipa ting Kanage i baim bebi fud long bebi tumbuna bilong em.

Yu save, Kanage i bagarap tru long hangre ya. Olsem na em i go sindaun gut tru long beksait bilong faktori. Na hamarim skon na bebi fud i stap. Sampela wanwok raun i kam long beksait na kalap nogut long lukim Kanage mekimsave ong bebi fud na skon. Ol i lap nogut tru na tokim Kanage olsem: "Em i mas wanpela hangro bebi olsem na em i kaikai bebi fud wantaim skon". Taim Kanageharim olsem ol wanwok i tok pilai long em, em i sem nogut tru. Tasol yu save, Kanage em i king bilong skelim toktok na bekim i go bek ya. Em kirap na hatim ol wanwok bilong em: "Yupela lap long wanem, a? Yupela ol yangpela i nogat rispek tru long ol turangu olsem mi a? Mipela i lapun pinis na mipela bai kamap olsem ol bebi gen ya. Olsem na wanem ol kain kaikai bilong ol bebi em mipela ol lapun tu i mas kaikai. Na taim yupela ol yangpela i lukim mipela ol lapun i kaikai kaikai bilong ol bebi orait, lukluk tasol na pasim maus bilong yupela. Bihain taim bai yupela kamap olsem mipela tu ya!"

Taim ol wanwok bilong Kanage i harim olsem, olgeta i kilim skin stret long lap. Na wokabaut i go bek long wok. Nau ol i givim wanpela ninknem 'Lapun bebi Boi' long Kanage, bihainim dispela stori.

Rob Singgen (Namba 3 wina)
LAE

• Kanage wok long kokonas plantasin long namba wan taim. Long fotnait, em kisim pe na go long stua long baim wel sanda wantaim paura bilong bilasim bodi. Na go raun long taun long traim laik.

Em i no save gut long nem bilong ol wel sanda na paura. Olsem na taim wanpela wanwok i tokim em, em kolim dispela sem nem long rot i go kamap long stua. Tasol lek i pamim ston na tang i popaia na em kolim pensin kerosin.

Orait taim em kamap long stua, em baim pensin kerosin na karim go bek. Long haus, boi nogut i waswas na dresap. Em kisim pensin kerosin na welim skin bilong em. Na lukluk long glas na tromoi hap tok: "Tete bai mi rausim young one stret".

Bihain em go sanap long rot na wetim PMV long go long taun. Na laitim wanpela smok long smokim. Trangu paia i kukim em stat long het wantaim gras na go daun long lek. Na em kisim taim na slip long haus sik long 6-pela mun olgeta.

L. Steven
VANIMO



Bik Bro

REBO



Igo moa Neks Wik!!



SIPAK MAIK



Igo moa Neks Wik!!

KANAGE



• Kanage em wanpela lapun man bilong Arox kantri. Wanpela apinun, em sindaun wantaim ol yangpela insait long haus boi na stori i stap. Sem taim em lukluk i go ausait long windua na lukim wanpela dog man na dog meri i pilai pilai i stap.

Kwiktaim em pulim na tok: "O-o-o-o sore tru ol yangpela". Wanpela mangi harim na askim em: "Yu sorelong wanem?" Kanage bekim na tok: "Mi lukim tupela ausait na mi tingim yangpela taim bilong mi. Ol stail bilong mi i olsem ya".

Sem taim tupela dog i senisim stail na pilai pilai i stap. Kanage lukim na tok: "O-o-o-o nogat, dispela stail nau yu winim mi long en".

Pro Arox
RABAUL

• Bebi meri i kisim bikpela sik olsem pekpek wara na het i pen. Mama i kisim nau pikinini i go long haus sik. Trangu mama i no save gut long tok pisin. Long haus sik, ol nes na sista i askim mama: "Pikinini bilong yu i sik olsem wanem?"

Mama i paul nau. Em i no save sista i tok wanem. Mekim i go na ol sista i belhat nau. Na ol singaut i go antap long mama: "Pikinini bilong yu i sik olsem wanem?"

Mama tu i belhat nau. Mekim nogat na em putim han antap long het, na paitim het. Narapela han em poinim long as na tok: "Waral Waral Wara ron daunbilol!"

Lydia Muro
KOKOPO

• Kanage i no save gut long tok inglis. Tasol em laki na wok olsem haus boi long wanpela waitman. Wanpela moning waitman tokim em long go long gaden. Kanage kisim naip na go.

Yu save, Kanage em man bilong pret stret long snek. Taim em kamap long gaden, man tupela traipela snek slip pasim rot i stap. Kanage lukim na i no wet. Em tanim tasol, karai wantaim na ron i go bek long waitman long haus.

Taim em lukim waitman bos, em singaut: "Masta! Masta! I saw a snake na mi surukim one foot back home".

Lydia Muro
KOKOPO

• Kanage em wanpela man long ples long Kerema. Em i no save gut long tok inglis. Na wok long wanpela waitman. Wanpela de, bos i go wok antap long haus kapa. Na tokim Kanage long stap na was daunbilol.

I no longtaim telepon i kra i insait long opis bilong bos. Kanage kwiktaim laik go kisim tasol em pret. Bikos em i no save long tok inglis. Olsem na em singaut i go antap long bos long kam daun: "A faukial! A faukial!"

Bosman i paul olgeta na ting Kanage tok nogutim em. Olsem na em kirap poinim han long Kanage, na singaut i go daun: "Yu tu faukial!"

Samting tru em Kanage paul long inglis, na singautim bos long tokples Kerema long kam daun. Yu save, Kerema tu ya. Hau bai yu save, tokples tu ken min narapela samting.

Owen Morea
WEWAK

Man i gat famili long snek

Wanpela taim wanpela man long hap bilong Pangia i save stap na em i marit long ples ol i kolim las wiru. Tasol susa bilong man ya i go marit longwe tru long ples bilong ol.

Wanpela taim man ya i laik go lukim susa bilong em. Olsem na em redim ol kaikai na ol samting bilong holim long han na i go. Em i wokabaut i go i go inap em i kamap long dispela ples susa bilong em i marit long en. Na em i askim ol manmeri na ol i soim em haus na em i go.

Bikman ya i go kamap long haus bilong susa bilong em na paitim dua na i go insait. Long haus susa bilong em i sindaun i stap. Tasol arere long susa bilong em, ol planti liklik pikinini na sampela bikpela snek tu i pulap long haus. Na susa bilong em i karim tupela nupela snek long lek bilong em na sindaun i stap.

Taim man ya i lukim em ai i op stret na i laik askim tasol susa i save pisin na tokim brata bilong em, "em ol pikinini bilong mi". Taim ol snek pikinini i harim olsem ol i stat mekim nois nabaut na kolim kandre long brata bilong mama bilong ol.

Man ya i go sindaun long haus na ol redim kaikai na i kaikai i stap.

Long apinun nau, papa snek i kam. Taim em i kam longwe yet em bikpela snek nogut tru i kam na em karim wanpela bikpela wel pik na karim i kam long haus. Taim em i kamap long haus na bungim tambu bilong em, em senisim skin na tanim kamap man na ol i stori na mekim bikpela kaikai tru long apinun.

Long moning kandre man i laik go bek long ples bilong em. Olsem na em i karim tupela yangpela pikinini snek bilong susa bilong em na haitim long basket na go bek



long ples biliong em.

Taim em i kamap long ples bilong em, em i go stret long gaden bilong em na haitim tupela snek kandre bilong em long hap.

Long haus, em i tokim meri bilong em long i no ken katim gaden o surukim gaden i go long narapela sait. Yu save bikos em haitim tupela snek ya long hap.

Olsem na olgeta taim meri bilong em i go long dispela gaden, em i no save brukim bus na surukim gaden i go long dispela samting man bilong em i tambuim em.

Tasol wanpela taim, meri bilong em i laik save tru watpo na dispela hap bilong gaden em tambu long i no ken go.

Olsem na wanpela taim em i go long dispela gaden na i no toksave long man bilong em.

Em i go na giaman wok gaden i go klostu long dispela hap man bilong em tambuim em. Taim em i go kamap long dis-

pela em, em i lukim olsem ol gras na ples i dai olgeta. Na em ting ol wel abus i save kem long dispela hap. Olsem na em i go insait na lukim stret tupela bikpela moran snek i stap. Taim tupela snek ya i lukim em, kwiktaim tru tupela i pret nau na kalap i go insait long bus na tekov olgeta. Taim tupela i go kamap longwe pinis na tupela i singaut i kam bek olsem, "salim toksave long kandre bilong mitupela olsem mitupela i go wan we nau". Tupela singaut olsem na tekov go olgeta long bikbus.

Dispela em stori bilong,

Chris Mari
Kimbe, Wes Nu
Britten provins.

Baim meri i no stret

baim meri ya. Bikos mi gat arapela samting tu long baim. Yu ting mi mas baim dispela meri?.

I NO LAIK

Dia PREN,

Pasin bilong senisim ol presen na ol samting namel long papamama bilong man na meri wantaim em olpela pasin bilong ol tum-buna long bipo taim yet i kam nau. Na dispela pasin i stap long olgeta hap bilong dispela kantri.

Hevi bilong yu i ken kamap bikpela moa sapos yu i no stap klostu long ol lain mama-papa bilong yu na ol wan lain bilong yu yet na askim ol long

helpim yu wantaim sampela tingting. Bai i gutpela moa sapos yu ken toktok wantaim ol lain famili memba bilong yu long dispela laik bilong yu. Marit i no bilong tupela manmeri tasol husat i laikim narapela. Em samting bilong olgeta famili memba long save na stap wantaim long mekim marit i kamap.

Marit na pasin bilong senisim ol presen na ol samting i save bungim ol manmeri wantaim. Na tu i ken bungim tupela ples i kamap klostu na save long narapela.

Na dispela em gutpela pasin bilong mekim tasol prais o pemen i no ken bikpela tumas na ol lain bilong man i mas helpim man long bungim mani na ol presen samting.

Yu ken askim sampela

kwesten long yu yet long stretim ol tingting bilong yu.

• Inap mi askim ol famili bilong mi long givim ol presenna ol samting long ol lain bilong meri, long soim olsem mi laikim meri ya na mi amamas long ol i larim mi maritim em.

• Sapos mi no givim sampela presen na ol samting, bai dispela i mekim ol i no amamas we mi ken ting olsem ol i no inap welkam long famili bilong meri na ples bilong ol?.

Ating i gutpela yu mas painimaut laik na tingting bilong famili bilong yu na ol sampela bikman long dispela laik bilong yu long marit. Askim ol wanem em stretpela na gutpela rot bilong bihainim long dispela.

LAIPLAIN



Dia LAIPLAIN,
Gelpren bilong mi na mi yet i kam long narapela narapela provins. Mitupela i bin bungim narapela na save long narapela inap tupela krismas olgeta na mitupela i pasim tok long marit.

Ol papamama bilong em i tok long mi mas baim meri. Tasol mi ting dispela i no stret tumas.

Mi wari bikos nogut mi nogat inap mani i stap long




Krismas na Nu Yia Toktok

i kam long

GAVANA BILONG NESENEL

KAPITOL DISTRIK



Mi gat bikpela amamas olsem Gavana bilong yupela long tok gutpela na naispela Krismas na Hepi Nu Yia i go long yupela ol sitisen na manmeri bilong Nesenel Kapitol Distrik.

Ol wokman bilong mi long NCDC na ol Komisina i joinim mi na mipela salim gutpela gritings i go long yu na famili bilong yupela tu.

Krismas em bikpela taim tru long kristen kantri olsem Papua Niugini, taim mipela amamasim kamap bilong Jisas Kraus na tok tenkyu long planti blesing bilong em. Yumi mas yusim dispela taim tu long prea long gutpela sindaun bihain - long ol gutpela pasin na amamas insait long komyuniti bilong yumi, na kantri.

Na prea long gutpela ansa long bikpela hevi yumi olgeta i bungim nau em long bikpela drai long planti hap bilong Papua Niugini.

Hevi bilong drai i gat bikpela hevi long yumi. Long Mosbi yumi lukim ol hevi bilong em long pawa saplai na wara we ol atoriti i save pasim sampela taim. Tasol dispela ating i liklik hevi tasol taim yumi skelim i go bek long bikpela hangre na nogat kaikai tru we ol manmeri long ples bilong yumi i bungim pinis.

Taim yumi amamasim krismas, mi ting yumi mas tingim na prea long ol turangu lain husat i kisim hevi nau na i no inap stap wankain moa olsem yumi.

Dispela 6-pela mun bilong mi olsem Gavana i no isi wok long mi na ol Komisina bilong mi.

Tasol mi bilip mipela i sanapim sampela gutpela mak bilong gutpela samting long bihain. Senis we siti na komyuniti bai i gutpela na nogat trabel moa long planti manmeri i ken amamas raun. Na mipela i ken soim wok tru na mekim wok bilong lukautim siti, Nesenel Kapitol na Komyuniti bilong yumi.

Sapos yu no bin save, mi sanapim pinis nupela astingting bilong Edministresen: **"Pot Mosbi - Seif na Gutpela"**

Mipela i statim wok bilong wok bung wantaim plis fos, na arapela lo grup long traim daunim hevi bilong raskel na bikhet pasin na mekim siti na ol banis na setelmen bilong mipela i gutpela ples long stap.

Tasol yumi mas wok wantaim. Yumi mas helpim plis na savelong wanem hatwok em i gat long mekim.

Edministresen bilong mi i skelim mani bilong helpim ol plis wok pinis, long sanapim moa plisman long ol eria na banis bilong mipela na long ol stua eria long siti.

Mipela i givim planti sapot i go long ol viles lida na ol setelmen lida long mekim gut wok bilong traim daunim hevi blong raskel na stil na strongim komyuniti i kamap gut, wankain olsem mipela i bin mekim long 1985 Stet ov Emejensi.

Tasol long longtaim ansa bilong daunim hevi bilong lo na oda i no stap long plis wok o long komyuniti wok bung wantaim. Samting i stap long sait bilong kamapim na mekim kamap wok bilong ol yangpela husat i nogat wok na raun nating.

Sapos Edministresen bilong mi ronim gut Siti, bai mipela i ken helpim long daunim hevi bilong nogat wok na kirapim ol gutpela liklik bisnis na praivet sekta wok long givim ol sevis long gutpela mak. Na dispela inap mekim siti i gutpela moa long pulim ol turis na ol visita na tu long strongim gutpela klin na grin lukluk bilong siti we Praim Minista i bin statim pinis bipo taim em i bin Gavana.

Mi laik tok klia long yupela olgeta lain i save baim takis na ol manmeri i stap long Mosbi olsem Edministresen bilong mi i laik holim nem bilong em olsem ol lain bilong mekim wok stret na stap ples klia long ol pipel. Na sanap strong long gutpela wok bilong em we em i mas mekim.

Yumi ken na yumi mas mekim Mosbi Siti na Komyuniti i kamap gut we yumi ken amamas long en. Yumi em kapitol siti bilong kantri, em namba wan dua na sapos Mosbi i stap klin, grin na nogat trabel long en, bai olgeta hap bilong kantri tu i stap gutpela.

Long bungim ol dispela bikpela salens we i stap het long mipela, mi laikim sapot na strong bilong yupela long saposim mipela.

Las toktok, mi laik askim yupela long amamasim gut krismas na Nu Yia wantaim famili na ol pren bilong yupela long gutpela pasin na amamas. Dispela em taim bilong amamas, maski mipela i bin gat ol hevi na trabel. Bikos em i taim nau bilong lukluk long gutpela tingting na tenkyu.

Mi save bai yupela i gat gutpela na naispela Krismas na gutpela 1998.

Honourable Philip Taku, MBE MP
Gavana

Sekim Daru haus kalabus

Dia Edita

INAP gavman i mekim sampela samting long stretim Daru haus kalabus? Haus kalabus em ples bilong helpim ol lain lo i painim olsem ol i brukim lo insait long sosaiti. Long haus kalabus, ol CIS opisa i gat bikipela wok bilong helpim ol kalabus lain long luk-save long pasin bilong ol. Laikim ol yet, lainim save bilong mekim ol wok we ol inap lukautim ol yet.

Na taim ol i kam aut long haus kalabus, ol i ken yusim dispela save bilong ol long lukautim ol yet insait long sosaiti. Tasol sapos ol i no kisim gutpela skul insait long haus kalabus, yu ting ol bai mekim wanem taim ol i kam ausait. Yumi toktok planti long lo na oda hevi i go bikipela long kantri. Olgeta gavman i kam na i go i save toktok long painim rot bilong stretim lo na oda.

Mi ting sapos gavman i wari tru long hevi bilong lo na oda, ating i moabeta gavman i mas stretim Daru haus kalabus o ol arapela haus kalabus long kantri we i bagarap olgeta. Em tasol wari bilong mi na sapos yu husat i ting tok bilong mi em i stret orait rait long Wantok niuspepa na sapotim mi. Tenkyu na God i blesim yupela.

**Elma Noringe
DARU**

Maski kamapim planti politikel pati

Dia Edita

BILONG wanem na olgeta yia yumi bai harim olsem wanpela lida i kamapim wanpela politikel pati? Ating PNG em wanpela kantri long wol i gat planti politikel pati tru. Olsem wanem? Ating pasin bilong kamapim politikel pati em olsem masrum? Ol i kamap na gro i go dai na bihain nupela i kamap ken. Mipela ol pipol bilong PNG i no 'yoyo'.

Olsem na yupela ol politisen i noken mipela i sem long pasin yupela i mekim long palimen. Maski kamapim ol nupela pati olgeta yia.

Ating olgeta lida i laik kisim K5000 long fotnait olsem praim minista na ol arapela gutpela benefit bilong praim minista? Ating ol lida bilong pati i driman long kisim K20,000 pensen pe, ka bilong gavman, opis, kuskus na ol arapela benefit olsem praim minista long 12 mun? Noken giamanin mipela ol pipol bilong ples olsem yupela i gat bilip long ol astingting bilong pati bilong yupela.

Mipela i no lukim kaikai bilong ol politikel pati bilong bipo olsem PPP na PANGU. Na nau mipela lukim moa pati i kamap. Kamon ol lida, maski paulim pipol bilong yupela. Em tasol wari bilong mi na sapos yupela i gat bekim orait rait long Wantok niuspepa bai mi ken ritim.

**Simon Sandeka
MADANG**

Painim ples bilong ol pipol long ailan

Dia Edita

KLAIMET i wok long senis long dispela taim. Dispela i mekim levul bilong solwara i go antap. Planti ol liklik ailan i go daun isi isi long solwara. Na ol pipol na abus long dispela ol ailan i nogat ples moa long go. Long Papua Niugini, sampela ol liklik ailan i bungim dispela hevi.

Mi save long wanem mi wanpela ailan man tu. I tru nau long dispela taim hevi i no kamap bikipela na ples klia tumas olsem

na nogat planti lain i luksave long em.

Tasol wanem kain sain i kamap nau em mak we mipela i mas lukim na mekim samting. Nogut bai mipela bihainim ol lain bilong Noah na wokim ol bikipela sip na go insait. Taim hevi i stat yet, mi laikim gavman i mas skulim ol pipol long luksave long dispela hevi.

Ol non-gavman ogenaisesen i mekim wok tu long skulim ol pipol tasol mi bilip gavman i mas yusim

skul, radio, televisen, niuspepa pablik notis na skulim ol pipol long dispela hevi.

Ol lain long bikiples i no inap wari tumas long dispela, tasol long ol pipol bilong ailan, dispela em i wanpela bikipela hevi tru.

Em tasol bikipela wari bilong mi na mi laikim husat i gat rot bilong helpim long helpim ol lain i stap long ol liklik ailan long kantri bilong yumi.

**Peter Sawok
MANUS**

Rausim Lafanama long Disasta Komiti

Dia Edita,

Mi laik autim tingting bilong mi long wanem samting i wok long kamap nau long Diasta Komiti, namel long Siaman Peti Lafanama, na kodineta Peter Barter. Mi ting olpela memba na gavana bilong Madang, Peter Barter i mekim gutpela wok stret.

Na sapos ol i toktok long rausim wanpela bilong tupela, mi tok rausim Lafana olsem siaman. Mi ting Lafanama i no mekim stretpela wok.

Em i stap long tu jak bikos em i n save long wok bilong em. Dispela i soim olsem em i nogat eksperiens long kain bikipela wok olsem. Sore tumas long Lafanama, bilong wanem bai yu autim strongpela toktok long ol helpim ogenaisesen taim mipela i strong long ol. Dispela em namba wan asua yu mekim. Long i no tingting na opim maus nating.

Mi askim nau Praim Minista long rausim Lafanama long komiti. Na larim Mista Barter i mekim yet wok bilong em. Bikos mi ting Barter em rait man long mekim. Na ol yangpela man husat i kamap pilitisian na tasol, pusim ol i go long arere.

**John Kande
MADANG**

Politisen noken skelim skul fi mani

Dia Edita

BAI ol politisen i mekim wanem long mekim mipela ol papamama i bilip olsem ol inap lukautim gut skul subsidi na givim long ol skul?

Long save bilong mipela ol papamama mipela i no laikim gavman i givim skul subsidi long ol politisen bilong karim i kam na givim long ol skul bilong

mipela. I no olgeta politisen inap mekim gut wok.

Mipela i save olsem sampela politisen i save tingim ol yet pastaim long mipela ol pipol. Ol kain politisen bai lus tingting long mekim wok stret.

Na long mipasin bilong ol, mipela ol papamama na ol pikinini na skul tisa bai karim pen. Olsem na askim bilong

mipela ol papamama i go long gavman long givim skul subsidi o fri edukesen mani, nau yet Praim Minista Bill Skate i tokaut long en i go stret long Edukesen Dipatmen bilong wan wan provins na dipatemen yet i ken skelim dispela mani.

Sapos ol skul i no kisim subsidi, ol i nogat mani bilong baim skul saplai. Olsem na planti

skul i save askim ol papamama long baim projek fi. Bikos long taim skul subsidi i no kam long taim, ol skul bai yusim projek fi long baim ol skul saplai. Em tasol wari bilong mi na sapos yu husat i laik sapotim mi o agensim mi, plis rait i go long Wantok niuspepa bai mi ken ritim.

**Gabriel ToRobert
RABAU**

NCD stretim ol han rot long siti

Dia Edita

GAVANA bilong Nesenel Kapitel Distrik (NCD), Philip Taku i promis olsem em bai laitim Mosbi siti.

Nau yet mipela i lukim planti ol stri lait i go antap long ol rot Curtain Brothers na ol arapela kampani i mekim long siti. Dispela em i kam aninit long NCD o nesenel projek we ol dispela kampani i winim tenda long gavman na mekim.

Em projek bilong NCD o bilong nesenel gavman? Sapos Mista Taku i laik soim mipela tru olsem em i mekim sampela samting long dispela sotpela

taim bilong em olsem gavana bilong NCD orait mi askim em long stretim ol liklik han rot insait long siti.

Planti ol dispela liklik han rot i gat ol bikipela pot hol na dispela i save bagarapim ol ka na ol arapela masin i ron long rot. Antap long dispela, em das na mekim siti i luk nogut. Em nau gavana maski kisim biknem long wok ol arapela i mekim. Tenkyu long ritim pas bilong mi na mekim samting.

**Gordon Galewa
MOSBI**

Hapim pe bilong balus na hapim pe tu

Dia Edita

Konsuma Afes Kaunsel (CAC) i sapotim gavman long hapim pe bilong balus. Man em i gutpela tingting. Tasol inap CAC na gavman hapim pe bilong ol plentesin wokman, ol wokman bilong gavman na tokim ol kampani long hapim pe bilong ol wokman tu.

Inap CAC na gavman hapim prais bilong kakau, kopi, kopra, kandamon na ol arapela samting mipela i save kisim long bus, graun, wara na solwara bilong mipela? Bilong wanem bai pe bilong balus, ol kaikai na samting long stua i go antap na mipela ol pipol i no lukim senis bilong pe bilong mipela o long ol samting mipela i salim long maket? Em wanem kain gavman.

Bai yumi wansait tasol long kisim takis long ol pipol. Plis inap CAC o gavman tok klia long dispela. Em tasol wari bilong mi na sapos yu husat i laik

sapotim mi, rait i go long Wantok bai mi ken ritim.

**Joe Lokaive
POPONDETA**

Salim pas i kam long:

**WANTOK
NIUSPEPA
PO BOX 1982
BOROKO, NCD**

Sekim ol lain i stap long taun na siti

Dia Edita

Mi laikim gavman mas kamapim wanpela lo bilong sekim ol lain i stap long ol taun na siti. Dispela wok painim aut i mas tokaut stret husat i stap long taun o siti. Em i mekim wanem kain wok. Amas pe em i save kisim. Em i marit o singel. Em i stap long wanem kain haus.

Em bilong wanem hap. Wanem taim em i kam long dispela taun na wok. Wanem taim wok bilong em bai pinis. Na sampela ol arapela askim olsem.

Mi tok olsem bikos kain wok painim aut inap helpim gavman long kamapim ol lo we i ken banisim ol lain i stap nating long taun na siti long go bek long wanem hap ol i kam long em.

O i ken helpim gavman tu long kamapim ol gutpela pablik sevis bilong helpim ol lain long taun na siti. Yumi i mas i gat gutpela rekot bilong ol pipol i stap long siti na taun bilong yumi bipo long naispela kantri bilong yumi bai bagarap olgeta.

Em tasol gutpela tingting bilong mi na mi laikim yupela olgeta long sapotim mi.

**Joachim Kaimb
HAGEN**

Oposisen mas sanap strong

Dia Edita

OL lida bilong Oposisen mas sanap strong olsem wanpela tim. Maski seksek long pawa na biknem na bruk nabaut. Mi ritim long Wantok niuspepa bilong Disemba 18, 1997 na sapotim tok bilong Timon Dumok.

Dispela tok bilong Dumok long gutpela Oposisen i save kamapim gutpela gavman em i tru. Olsem na mi tok, noken kalap long Oposisen na go long gavman. Yupela i olsem Zudas long Baibel.

Em i lukim liklik bek mani na wan tu em i go kotim mastu bilong em Jisas. Na em i no stap longpela taim long graun long amamas. Nogat. Nau mi lukim kain pasin olsem i kamap long gavman. Ol gutpela lida mipela olgeta i gat bilip long ol na amamas long lukim ol i stap long Oposisen na kisim sampela moa gutpela lida long Gavman long kam joinim ol na kamapim nupela gavman i kalap na go joinim gavman.

Plis ol lida noken paulim mipela. Tingim mipela pastaim na bihain yupela yet. Em tasol wari bilong mi na husat lida i laik kliaim tingting bilong mi orait rait i go long Wantok bai mi ken ritim.

**Reuben Pat
MENDI**

**Jucinta Mon
SIMBU**

Soim gutpela pasin yupela lainim long skul

Dia Edita

Mi sapotim toktok bilong Dickson Mame long Wantok niuspepa bilong Disemba 18, 1997. Mista Mame i sapotim Sista Mary Kennedy husat i skulim ol pikinini long Marianville Katolik Hai Skul.

Sista Mary i askim ol skul pikinini long soim gutpela pasin ol i lainim long skul. Sapos ol tisa i no soim gutpela pasin long ol skul pikinini long skul, ol i ting ol pikinini bai soim gutpela pasin.

Mi lukim planti skul long siti na long ol taun we ol skul pikinini i save go skul, i no save skulim ol pikinini long bihainim gutpela pasin. Long moning taim yu bai lukim ol pulim smuk, kaikai buai, putim ol klos na i no tag, o ol klos bilong wok na go long skul. Em wanem kain piksa. Ating ol tisa i nogat disiplin long skulim ol sumatin o olsem wanem? Dispela hevi i stat long ples.

Mi bilip, planti ol papamama bilong ol pikinini yet i mas kisim sem long dispela. Planti tisa i kros

Tok save i go long ol man i save salim pas long Wantok. Sapos yu no putim nem tru bilong yu long pas mipela i no map prinim leta bilong yu.

IPA sekim ol Esia long kai stua o nogat?

Dia Edita,

Mi laik sapotim leta bilong David Kapri em i bin kamap long didpela niuspepa bilong Desemba 4, 1997. Pas bilong em i kamap aninit long het tok: "Watpo na planti ol Esia lain i kam ronim ol kai stua?"

Mi sapotim tru dispela komplek na tromoi askim bilong mi i go tu long Invesmen Promosen Atoriti (IPA), husat i mekim wok bilong lukautim ol kain bisnis em ol PNG manmeri yet ken wokim.

Tude long Mosbi, Lae na ol arapela senta bilong dispela kantri, bai yu lukim planti haus kai em ol Esia manmeri i papa long en na ronim. Mi lukim dispela na i no amamas tru.

Dispela em ol kain bisnis em ol lokol pipel i ken ronim. Na gavman mas kamap wantaim ol plen bilong helpim ol lokol pipel long sanapim ol kain bisnis olsem. Tasol olsem wanem na ol i givim laisens long ol Esia manmeri long mekim ol dispela kain wok?

Narapela samting tu long ol kain bisnis olsem we ol Esia i papa long en, bai yu lukim ol yet i wok olsem ol kes rejista o stuakipa na sekyuriti. Dispela i no stret olgeta na mi bilip i brukim lo.

Dispela em ol kain wok we ol manmeri bilong dispela kantri i ken mekim.

Mi laik askim nau IPA, yupela save sekim ol dispela kain bisnis tu o nogat? Sapos nogat, ating yupela i slek ya.

Mi askim nau gavman bilong Prais Minista Bill Skate sapos em i sanap strong long pait egensim paul pasin, em mas rausim ol bikman meri bilong IPA. Luk olsem ol i no mekim wok ya.

Em tasol toktok bilong mi. Yu husat manmeri i laik sapotim o egensim, yu welkam tasol long rait i kam long dispela niuspepa. Na bai mi ken lukim na save.

**Christine Koimari
LAE**

Ol meri yet i daunim ol long man

Dia Edita,

Mi laik autim tingting bilong mi long wok bilong ol meri insait long dispela kantri. Long lukluk bilong mi, mi lukim olsem ol meri i no save wok bung. Ol i save wok wanwan. Olsem na long taim bilong ileksen, ol i no save winim planti sia long Haus Palamen. Na bihain bai ol i komplek olsem ol pipel bilong dispela kantri i ni luk-save long ol meri.

Mi yet mi wanpela meri bilong Wewak long Is Sepik. Mi laik tok olsem dispela em i asua bilong mipela ol meri yet.

Bikos tude bai yu lukim i gat kainkain grup bilong ol meri. Wanwan sios bai gat grup bilong ol yet olsem ol Luteran Sios. Wankain tu long lotu Katolik, Yunaited, AOG, Seven De Adventis, na sampela moa.

Ol i save holim planti bung long olgeta yia. Tasol mi no save sapos meri bilong olgeta sios i save bung wantaim long toktok. Na skelim hevi bilong ol meri insait long kantri.

Ausait long ol sios, i gat kainkain grup bilong ol meri olsem Wimen in Politik. Na sampela arapela grup em ol meri

i go pas long en.

Ol meri long WIP i ting olsem ol i gat moa save. Na bai no inap givim taim long grup bilong ol meri long sios, o ol arapela ples insait long taun, siti na ruel eria.

Dispela em sampela piksa bilong ol pait toktok o bruk i kamap namel long ol meri long kantri. Mi ting sapos dispela i stap yet, mipela ol meri bai stap wankain yet. Tasol mipela noken go krosim ol man olsem ol i no givim wankain sans long mipela. Bikos mi ting em mipela ol meri yet laik pilai politik namel long mipela yet ya, laka?

Em tasol liklik tingting bilong mi. Sapos yu husat meri i gat belhevi long dispela toktok bilong mi, noken holimpas long bel na bai bagarapim gutpela sindaun bilong yu. Putim tasol long pepa na salim i kam long dispela niuspepa, na bai mi ken ritim.

**Maria Goreti
WEWAK**

Mosbi Difens bung i no gutpela

Dia Edita,

Mi laik autim belhevi bilong mi long bung bilong Difens soka klab bilong Mosbi soka, em i bin kamap long Moonlight danis ples long las wik Sarere. Mi laik tok olsem dispela i no wanpela gutpela bung. Bikos pait i kamap klostu klostu na bagarapim olgeta amamas.

Tasol wanpela samting mi no amamas tu em long ol opasal long i no laik makim wanpela gutpela ples. Mi ting Moonlight i no wanpela gutpela hap bilong kain bung olsem. Em i wanpela ples i gat nem nogut we planti manmeri i save.

Olsem na ating taim ol man i go

Leta i go long PM na Oposisen lida

Dia Edita,

Mi laik autim tingting o sampela liklik save bilong mi long ol wok politik bilong dispela kantri.

I no longtaim i go pinis, i bin gat ripot bilong Prais Minista Bill Skate, Plis Minista Thomas Pelika i stap insait long sampela vidio tep em Ostrelia bisnismen, Mujo Sefa, i bin givim na Ostrelia Brodcasting Komisen (ABC) i putim aut. Ripot i soim sampela paul pasin, we mi no laik tok sapos i tru o nogat, em samting bilong lo long skelim.

Tasol olsem ol arapela ripot i tokaut pinis, insait long ol vidio tep yet i gat inap save olsem sampela kain paul pasin i kamap, maski dispela kain evidens em kot i no inap long luk-save. Mi no laik toktok moa long dispela. Tasol bai mi tok tasol olsem em i tru, nem bilong kantri na opis bilong praim minista i gat nem nogut pinis. Em bai kisim longpela taim tru long rausim dispela nem nogut. Bikos tu long ol arapela hevi bipo olsem bilong Sandlain.

Lusim dispela, mi laik toktok long Oposisen Lida long Haus Palamen, Bernard Narokobi. Mi

ting em i no mekim gutpela wok tumas. Ating olsem na olpela namba 2 bilong em, Masket langalio, i go joinim Skate-Nali gavman.

Mi ting sapos Narokobi i fit long mekim wok, ating em i kisim Oposisen i go fomim nupela gavman pinis.

Em i stap nating tasol na ol pati olsem Pangu na PPP i kam pilai kaskas wantaim em, na go bek. Mi ting dispela i no gutpela tumas. Taim em i kisim inap namba pinis, em i no laik holim strong. Na yusim dispela namba long rausim Skate gavman.

Sore tumas, bai yupela stap yet long Oposisen long ful 5-pela yia ya.

Bikpela tok amamas i go long Skate long plenim gut olgeta samting. Na holim yet pawa. Tasol mi laik tok olsem wanem samting em i mekim i no gutpela tumas. Dispela em tingting bilong mi yet.

Pasin bilong holim pasim pawa na i no bihainim bikpela laik o askim bilong pipel long risain o sanap arere, na larim pablik wok painimaut i go insait long dispela

samting i no stret long ai bilong pipel.

Mi yet mi laik tok olsem mi bilip wok painimaut em ol plisman na loya bilong Skate yet i go pas long en, bai haitim olgeta dispela samting. Na mipela ol pipel bai stap long tudak. Mi ting mipela ol pipel i gat rait long save sapos i tru o nogat, long ol dispela paul pasin.

Mi laik salim wanpela toksave i go long praim minista olsem, bipo mi mangi, tumbuna bilong mi save stori olsem: "Wanem samting yu mekim olsem brukim lo, yu save olsem lo i gat longpela han, em bai bungim yu yet. maski yu ranawe go stap long narapela hap, o yu mun yia i kam i go". Mi no laik tok Skate i asua, nogat. Dispela em olsem hap skul tok tasol. Sapos yu skelim gut, orait mekim stretpela samting long nau yet. Em bai nem bilong yu i stap antap yet.

Em tasol na mi askim God papa long lukautim dispela kantri.

**Sebastian Ansuak
KAINANTU**

"Kisim dispela skul fi sabsidi go tromoi long toilet"

Dia Edita,

Mi wanpela papa long Vanimo, Sandaun provins. Mi no save raitim leta long niuspepa. Dispela em i namba wan taim bilong mi. Bikos mi no amamas long sampela samting i kamap nau long gavman bilong mipela long Papua Niugini.

Hettok bilong mi em long skul fi sabsidi, em Prais Minista Bill Skate i bin tokaut long sampela wul i go pinis. Mani em i tokaut long givim olsem skul fi sabsidi i bikpela tru long mak bilong milien. Mipela ol papamama i amamas tru.

Tasol wanpela samting em mi no amamas tumas em mi save olsem mipela ol papamama bai baim yet bikpela skul fi, maski i gat bikpela mani i kam long gavman. Mipela i lukim dispela long ol yia bipo taim olpela praim minista Paia Wingti i statim dispela polisi i kam inap nau.

Bipo taim i nogat skul fi sabsidi, mipela save baim liklik mani tasol long skul fi. Taim skul fi sabsidi i kam, mipela tok tenkyu tru, gavman i helpim mipela nau. Tasol dispela i no kamap. Mipela i tok long tromoi moa mani winim bipo long baim skul fi. Dispela em wanem kain tru ya?

Mi laik tok olsem mipela ol papamama i no bilip moa long dispela skul fi sabsidi. Bikos dispela mani i no save kam tu long ol skul bilong mipela. Na tu sapos mani i kam, em bai liklik tasol na i no olsem mak gavman i promis long en. Na tu sapos mani i kam, em i save kam leit tru.

Mi laik askim gavman nau long kisim dispela skul fi polisi na go tromoi long toilet bikos em i no amamas mipela ol papamama.

Planti skul i fosim ol papamama long baim moa mani long pinisim skul fi. As bilong dispela em bikos skul i no kisim ful sabsidi mani em gavman i promis long en. Na dispela i givim moa mekimsave long ol papa, husat i hatwok na baim pinis projek fi na kain olsem. Projek fi tu i no liklik mani.

Mi laik askim nau olgeta papamama long kantri long bung wantaim na kotim gavman long dispela.

**John Kee
WEWAK**

Ol mangi Wewak, maski bosim ai bilong stua oltaim

Dia Edita,

Mi wanpela meri bilong Sasowia long Is Sepik provins. Mi laik toktok long sampela samting em mi lukim ol mangi long Wewak taun i save mekim. Dispela em long sindaun long fran bilong ol stua we i save pilaim musik, na lukluk long ol yangpela meri i go i kam.

Mi laik tok olsem dispela ol mangi i gat wok bilong meri o nogat? Maski sindaun nating long ai bilong stua na mekim ol meri i sem long yupela. Yupela go sindaun long sampela hap na stori. Na maski bosim ai bilong ol stua, yupela sekyuriti a?

Mi laik askim tu bos bilong ol dispela stua na opis long rausim ol kain mangi olsem. Ol i mekim pipi tasol long ai bilong stua o opis bilong yupela.

Narapela samting tu em long raun nating long taun. Mi lukim planti mangi i raun nating nating long taun we i nogat bilong mekim. Mipela save go long taun long baim samting, salim kaikai long maket o postim leta samting.

Tasol ol dispela mangi em bai yu lukim pes bilong ol long taun olgeta de. Sapos ol pikinini bilong man bai ol sem ya. Ating pig i mas karim ol ya. Traim na sindaun long haus na mekim sampela wok.

EM tasol toktok bilong mi. Yu husat man o meri i lukim dispela pas na laik bekim, plis rait tasol long dispela niuspepa. Na bai mi ken ritim bekim bilong yu.

**Helenda Juwombo
Sasowia
WEWAK**

Mosbi gat 'kauboi friwe'

Dia Edita,

Mi wanpela meri husat i stap arere long dispela nupela friwe o haiwe long Mosbi. Mi laik tok olsem dispela rot em ol i no plenim gut na wokim. Ating gavman bilong mipela i westim nating mani ya.

Nau yet bai yu lukim planti hap bilong rot em ol i banisim gen wantaim ol bikpela hap simen. Na tu planti hap em ol rausim ol simen na bikpela hul i stap we ol manmeri na pikinini ken pundaun i go insait long nait de.

Narapela samting tu em planti hap bilong ol simen arere long rot i bruk pinis. Dispela em ol wokman bilong ol kampani ya yet. Ol wkim rot pinis na bihain bai ol kam na brukim gen.

Em wanem kain wok nau ya. Mipela ting ol samting i redi tasol nogat. Ol bai kam bek na brukim hap rot o simen long futpat na bai larim i stap olsem.


Mi ting tu olsem taim ren i kam, plani hap bilong friwe ya bai bagarap tru. Bikos rot i no fit long taim bilong ren.

Mi sapotim nau Prais Minista Skate long kari-maut wanpela bikpela wok painimaut i go insait long dispela friwe. Mi ting planti paul pasin long wok i kamap we mipela ol pipel bilong Papua Niugini mas save.

Ating dispela em ol as bilong wok i no kamap gut long dispela friwe. Olsem na mipela ken kolim dispela friwe olsem 'kauboi friwe' ya.

**Jacinta Wama
Hohola Peles
MOSBI**

**Jenny Coila
MOSBI**



KRISMAS TOKTOK

I KAM LONG

HET BILONG KANTRI, SILAS ATOPARE, GAVANA JENEREL BILONG PAPUA NIUGINI

OL PREN BILONG MI, TAIM OL I MAKIM MI OLSEM NAMBA SEVEN GAVANA JENEREL BILONG PAPUA NIUGINI, WANTAIM BIKPELA RISPEK, MI LAIK KISIM DISPELA TAIM NA TOKTOK WANTAIM YUPELA OLGETA MANMERI LONG KANTRI INSAIT LONG DISPELA NAMBAWAN KRISMAS TOKTOK BILONG MI.

MI SALIM GRITINGS I GO LONG YUPELA OLGETA LONG NEM BILONG HELPIM BILONG YUMI JISAS KRAIST. DISPELA KRISMAS SISEN I KAMAP OLSEM WANPELA GUTPELA TAIM BILONG AMAMAS NA EM I KEN STAP LONGPELA TAIM LONG TINGTING NA LAIP BILONG YUPELA.

AMAMAS BILONG NU YIA TU I KEN STAP WANTAIM YUPELA.

INSAIT LONG KANTRI BILONG YUMI NA TU LONG NARAPELA HAP, MINING BILONG KRISMAS LONG LAIP BILONG WANWAN MANMERI I NO WANKAIN.

KRISMAS EM WANPELA BIKPELA DE BILONG YUMI OLGETA. YUMI SAVE TINGIM DE, MAMA I BIN KARIM JISAS KRAIST KLOSTU 2000 YIA I GO PINIS. LONG KRISMAS, YUMI TINGIM WATPO JISAS I BIN KAM DAUN LONG DISPELA GRAUN. NA TINGIM TU WANEM TOKTOK EM I BIN GIVIM, WE NAU I STAP OLSEM AS BILONG KRISTEN BILIP BILONG YUMI.

YUMI LAKI OLSEM PAPUA NIUGINI EM WANPELA KRISTEN KANTRI. NA SAMPELA TAIM, YUMI MAS SINDAUN NA GLASIM WATPO NA JISAS I BIN TOKTOK LONG STAP WANBEL NA AMAMAS WANTAIM OLGETA MANMERI LONG DISPELA GRAUN.

TASOL, PASIN KRISTEN LONG DISPELA KANTRI I BIN GUTPELA NA STAP MOA LONG 100 YIA NAU. NA DISPELA BILIP BAI STAP OLSEM HAP BILONG LAIP BILONG YUMI LONG WANWAN KOMYUNITI BILONG YUMI.

LONG PLANTI BILONG YUMI, KRISMAS EM TAIM BILONG SKELIM LAIP BILONG YUMI NA MEKIM NUPELA KONTRAK.

WANKAIN OLSEM OL KANTRI HUSAT YUSIM INDEPENDENS DE LONG SKELIM WANEM GUTPELA SAMTING KANTI I BIN WINIM.

LONG DISPELA TAIM, LADI ATOPARE, FAMILI NA MI LAIK JOINIM HAN WANTAIM YUPELA OLGETA NA LAIK TOK GUTBAI LONG YIA 1997. MI MAS TOK STRET OLSEM, EM I BIN WANPELA SALENSING YIA BILONG OLGETA MANMERI LONG DISPELA KANTRI.

TAIM YUMI LUKLUK I GO BEK LONG DISPELA YIA, YUMI NO INAP LUS TINGTING LONG OLGETA SAMTING. EM WANPELA TAIM NOGUT STRET, WE YUMI BIN BUNGIM KAIN KAIN HEVI.

OL LIDA BILONG YUMI LONG GAVMAN I BIN MEKIM BIKPELA WOK LONG HOLIM DISPELA KANTRI BILONG YUMI WANTAIM LONG OL TAIM NOGUT YUMI BIN BUNGIM.

YUMI NOKEN ASKIM OL LONG STAP HOLI OLGETA TAIM. TASOL LONG PLANTI TAIM, OL I BIN SOIM GUTPELA PASIN LIKLIK.....LARIM YUMI PREA LONG OL NA FEMILI BILONG OL. BAI SPIRIT BILONG GOD I KEN HELPIM OL LONG MEKIM GUTPELA DISISEN WANTAIM. PRET LONG BIKPELA.

LONG YUPELA OL MANMERI BILONG DISPELA KANTRI, MI AMAMAS TRU LONG PASIN YUPELA I BIN MEKIM LONG SANAP STRONG NA WOK BUNG WANTAIM. LONG DISPELA 22 ANIVESERI BILONG INDEPENDENS SELEBRESSEN, MI BIN LUKIM KAIN KAIN PASIN BILONG YUMI I BIN KAM ANINIT LONG WANPELA AMBLELA TASOL. NA DISPELA EM "WAN PIPEL, WAN KANTRI NA WAN NESEN."

YUMI OLGETA I MAS AMAMAS NA BUNG WANTAIM LONG KAMAP BIKPELA NA STRONG INSAIT LONG DISPELA NAISPELA KANTRI BILONG YUMI.

TAIM YUMI AMAMAS LONG WIN BILONG YUMI NA LAIK I GO INSAIT LONG DISPELA KRISMAS SISEN, YUMI NOKEN

LUS TINGTING LONG SANAP WANTAIM NA TINGIM OL BIKPELA HEVI I BIN KAMAP LONG DISPELA YIA.

NAU, MI LAIK JOINIM YUPELA NA LAIK TOKTOK LONG SANAP BUNG WANTAIM LONG KAMAPIM WANPELA PAPUA NIUGINI. NA LAIK ASKIM YUPELA LONG KAMAPIM WANPELA GUTPELA NA NAISPELA SOSAITI WE NOGAT HEVI NA TRABEL I NOKEN MOA STAP. DISPELA BAI BRINGIM AMAMAS, WANBEL NA BEL ISI LONG SOSAITI BILONG YUMI.

OL PIPEL BILONG YUMI I BIN BUNGIM SAMPELA BIKPELA HEVI TRU LONG TRAIM BILIP NA STRONG BILONG OL.

LONG MI YET, MI TING OLSEM DISPELA EM TRU SPIRIT BILONG UNITI NA TINGTING BILONG STAP WAN KANTRI.

NA YUMI BIN SOIM OLSEM YUMI KEN LUS TINGTING LONG OL PASIN NOGUT BILONG YUMI NA LUKLUK HET LONG KISIM GUTPELA SINDAUN LONG LAIP.

MI BILIP OLSEM, WANWAN KRISMAS I SAVE BRINGIM NUPELA LUKLUK, NA ASKIM YUMI LONG SKELIM LAIP BILONG YUMI YET NA STATIM NUPELA LAIP. YUMI OLGETA MAS LUS TINGTING LONG KAIN KAIN PASIN NA TINGTING BILONG YUMI. YUSIM DISPELA TAIM LONG MEKIM NUPELA PROMIS LONG SAPOTIM NA HELPIM NARAPELA BRATA NA SUSA BILONG YUMI LONG BIHAIN TAIM.

SAPOS YUMI MEKIM OLSEM, BAI DISPELA KANTRI BAI KAMAP WANPELA GUTPELA NA NAISPELA PLES BILONG STAP LONG EN.

LONG DISEPLA KRISMAS SISEN, MI LAIK ASKIM YUPELA LONG KISIM LIKLIK TAIM NA TRAIM HELPIM ARAPELA BRATA NA SUSA BILONG YUMI, HUSAT I NO INAP HELPIM EM YET. OL KAIN LAIN OLSEM MAUSPAS, IAPAS, LONG-LONG NA OL LAIN HUSAT I NOGAT SAMTING LONG KAIKAI.

LONG PAPUA NIUGINI, I GAT PLANTI TAUSEN MANMERI NA PIKININI HUSAT WOK LONG YUSIM TAIM, MONI NA KAIKAI BILONG OL LONG HELPIM ARAPELA HUSAT I NO INAP KISIM DISPELA OL SAMTING.

PLANTI BILONG DISPELA WOK I KAM LONG OL SIOS GRUP NA BISNIS HAUS LONG KANTRI.

YUMI MAS TINGIM NA AMAMASIM TU OLGETA GUTPELA WOK OL SIOS NA BISNIS KOMYUNITI I MEKIM LONG HELPIM NA DVELOPIIM DISPELA KANTRI.

MI LAIK TOKAUT TU LONG PASIN YUMI SAVE MEKIM LONG OL MAMA NA PIKININI LONG WANWAN HAUS BILONG YUMI.

MI YET OLSEM WANPELA PAPA NA TU HET BILONG DISPELA KANTRI, WE I PULAP LONG YANGPELA MANMERI, MI PILIM OLSEM MI GAT WOK LONG TOKTOK LONG DISPELA.

LONG TOKTOK BILONG MI TAIM MI BIN LOSIM UNICEF 1998 STET OV WOL RIPOT BILONG PIKININI, LONG GAVMAN HASU, MI BIN TOKAUT OLSEM 34 PESEN BILONG OL PIKININI I SAVE DAI LONG MALNUTRISEN. DISPELA EM WANPELA BIKPELA HEVI SIN TRU EGENSIM OL PIKININI BILONG YUMI. LONG KAIN KANTRI OLSEM PNG, PULAP PLANTI GUTPELA KAIKAI.

MI NO SAVE AMAMAS LONG LUKIM OL FAMILI I SAVE SENISIM GUTPELA KAIKAI BILONG GADEN WANTAIM OL KAIKAI BILONG STUA.

EM I TRU OLSEM OL FAMILI I WOK LONG SALIM OL KAUKAU, TARO, POPO, PAINAPEL, PIS, KAKARUK NA BIHAIN OL BAIM RAIS, TIN-PIS O MIT WANTAIM MONI OL KISIM. DISPELA MAS STOP. YUMI MAS SKULIM OL MANMERI BILONG YUMI LONG PLES OLSEM OL KAIKAI BILONG YUMI LONG PLES EM GUTPELA MOA LONG KAIKAI BILONG STUA.

KANTRI BILONG YUMI I PULAP NA KAPSAIT LONG KAIN

KAIN GUTPELA KAIKAI BILONG GADEN NA BUS. PASIN BILONG KAMAPIM KAIKAI EM I NO WANPELA BIKPELA SAMTING. TASOL PASIN BILONG PAINIM KAIKAI NA GIVIM LONG OL PIKININI BILONG YUMI EM WANPELA BIKPELA HEVI YUMI MAS TRAIM LONG STRETIM.

SKULIM MOA, PASIN BILONG YUMI LONG HAUS EM WANPELA BIKPELA HEVI. PASIN BILONG BIHAINIM PASIN TUMBUNA O KALSA BILONG YUMI LONG GIVIM KAIKAI LONG OL MAN NA BIHAIN GIVIM LONG OL PIKININI NA MAMA.

DISPELA PASIN BILONG GIVIM OL MAMA NA PIKININI PIPIA KAIKAI MAS PINIS.

OLSEM WANPELA PAPA, I ASKIM OLGETA HET BILONG FEMILI LONG SENISIM DISPELA PASIN BILONG OL LONG GIVIM KAIKAI LONG MAN PASTAIM. LARIM OL PIKININI NA MAMA KISIM KAIKAI PASTAIM NA OL PAPA I KEN KAIKAI BIHAIN.

MI PREA OLSEM LONG DISPELA KRISMAS, BAI YUMI TRAIM LONG YUSIM DISPELA TAIM LONG HELPIM OL LAIN HUSAT NIDIM HELPIM PASTAIM LONG YUMILUKLUK LONG YUMI YET.

MI ASKIM YUPELA TU LONG SINDAUN NA PLENIM WANEM SAMTING BAI YUPELA WOKIM LONG MEKIM PAPUA NIUGINI KAMAP WANPELA NAISPELA PLES LONG STAP LONG EN.

LONG SAMPELA TAIM, SAMPELA LAIN I BIN TOKIM YUMI LONG LUKAUTIM GUT LAIP BILONG YUMI NA TU YUSIM GUT OL BLESING YUMI KISIM. DISPELA I NO WANPELA ISPELA SAMTING LONG MEKIM TAIM YUMI BUNGIM HEVI.

TAIM I BIN HAT TRU LONG PAPUA NIUGINI LONG DISPELA TAIM I KAM. YUMI NOKEN GIAMAN LONG DISPELA.

TASOL YUMI STRONGPELA NA OL LAIN BILONG WOK HAT.

OLSEM NA KANTRI BILONG YUMI I PULAP LONG KAIN KAIN BLESING. SAPOS YUMI MENESIM GUT DISPELA RISOS BILONG YUMI GUT, BAI YUMI MEKIM PNG KAMAP WANPELA PARADAIIS LONG STAP LONG EN. NAU YUMI MAS TRAIM LONG YUSIM GUT DISPELA OL RISOS BILONG YUMI NA LUKAUTIM GUT BUS NA ABUS BILONG YUMI BAI OL PIKININI BILONG YUMI KAM BIHAIN I GEN AMAMAS LONG LUKIM.

YUMI WOK LONG GO FOWET WANTAIM SAMPELA BIKPELA PROJEK INSAIT LONG PAPUA NIUGINI. NA MI BILIP, YUMI LAIKIM BAI OL PROJEK I GO HET NA KANTRI BILONG YUMI I KEN DVELOP. NAU YUMI KAMAP GEN WANTAIM NARAPELA HEVI. HEVI BILONG GO HET MAS POROMAN WANTAIM WOK EDUKESAN NA HELT. DISPELA EM BIKPELA SAMTING TRU LONG LAIP BILONG YUMI PLANTI MANMERI BILONG PAPUA NIUGINI.

OL PREN BILONG MI, YUMI OLGETA MAS MEKIM HAP HAP WOK BILONG YUMI. MI BILIP OLSEM 1998 BAI KAMAP OLSEM WANPELA YIA WE BAI YUMI LUKIM PLANTI SENIS LONG KANTRI. EM BAI WANPELA YIA, WE YUMI BAI LUSIM TINGTING LONG KAIN KAIN PASIN NA LAIK BILONG YUMI.

NA TU LUS TINGTING LONG POLITIKEL NA HEVI BILONG KANTRI BAKSAIT LONG YUMI.

LARIM YUMI TINGIM PASIN TUMBUNA BILONG YUMI NA LONG SEM TAIM HOLIMPAS NUPELA SAMTING I WETIM YUMI STAP. LARIM YUMI LUKAUTIM NAISPELA GRAUN, BUS NA ABUS BILONG YUMI NA SEM TAIM TINGIM TU LONG YUSIM LONG RAIT WE LONG GUTPELA BILONG OL PIKININI BILONG YUMI BAI KAM BIHAIN.

MI WISIM YUPELA WANWAN MANMERI BILONG PAPUA NIUGINI, HEPI KRISMAS NA AMAMAS NU YIA. BEL ISI BILONG PAPA GOD I KEN STAP WANTAIM YUPELA OLGETA.

TENKYU

Winim Prais Winim Prais Winim Prais Winim Prais Winim Prais Winim Prais

WANTOK ASKIM

Bekim Askim bilong Wantok nau na winim ol dispela prais

Namba wan prais

- Wapela balus tiket i kam long Mosbi na slip tupela nait long Islander Hotel.
- Olgeta bekim bai gat sans long stap insait long dro bilong winim dispela prais.

Namba tu prais

- K500 prais mani
- Namba wan 500 bekim bai gat sans long winim dispela prais.

Namba tri prais

- 5 Katen Besta tinpis
- Narapela 200 bekim bai gat sans long winim dispela prais.

Namba foa prais

- 10 -pela T Shirt bilong Wantok
- Las 100 bekim bai gat sans long winim ol dispela T Shirt bilong Wantok.

Bekim ol dispela askim bilong Wantok Niuspepa hariap na bai yu gat sans long winim ol dispela prais!

KATIM LONG HIA

Ol askim bilong Wantok Niuspepa

1. Hamas yia nau yu save baim na ritim Wantok?
One yia 3 yia moa long 5 yia
2. Em i isi o hatwok long painim na baim Wantok?
Isi bikos:.....
Hatwok bikos:.....
3. Yu ting wanem long pe bilong Wantok?
Dia tumas:.....
I orait:.....
4. Yu save baim Wantok long stua o long strit o maket?
Stua.....Maket.....
Strit.....
5. Yu save baim Wantok long wanem de?
Fonde.....Fraide.....Sarere.....
Sande..... Mande.....
6. Taim yu baim Wantok, yu save ritim wanem stori pastaim?
Bekim:.....
7. Yu amamas long ritim wanem ol stori long Wantok?
Makim faivpela tasol.


Nius	Plis Ripot
Bogenvil Nius	Biabia
Tu Minit tingting	Provins Nius
Sios Nius	Wol Nius
Wansolwara Nius	Wol Nius
Laipstail	Kanage
Musik stori	Top 20
Penpren	Stori tumbuna
Oi Pas	Laiplain
Tambu Toro	Rebo
Sipak Maik	Spot Poto
Spot Dro	Spot Nius

- | | |
|---|---|
| Kanage/Mutrus yes nogat | 19. Yu save baim ol dispela niuspepa tu o nogat? |
| Oi narapela resis: | The Independent |
| 10. Taim yu ritim Wantok pinis, hamas moa manmeri i save ritim? | Post Courier |
| Namba: | National |
| 11. Yu save laikim ol Wantok Spesel Saplimen tu o nogat? | Eastern Star |
| Bekim: | Oi ovasis pepa |
| 12. Yu laik lukim wanem kain ol advetaismen o toksave long Wantok? | 20. Hamas de yu save baim ol dispela niuspepa? |
| Oi kaikai, sop, marasin: | Oigetade wanwan de |
| Oi nupela ka, bot ol masin: | 21. Yu gat redio o nogat? |
| Oi sekenhan ka, klos, masin: | Yes Nogat |
| Oi spesel long ol supamakot: | 22. Yu save harim wanem redio stesin? |
| Oi spesel bilong ol bakstua: | Provinsal redio stesin |
| Oi nupela prodak: | Karai |
| Painim wok: | Kalang |
| Toksav bilong gavman: | Nau FM |
| 13. Yu bin baim sampela samting long ol advetaismen yu lukim long Wantok? | YumiFm |
| Yes Nogat | 23. Yu gat TV o nogat? |
| Yu baim wanemsamting: | Yes Nogat |
| | 24. TV bilong yu inap long kisim wanem ol stesin? |
| 14. Yu laik lukim wanem ol arapela nupela samting long Wantok? | Nem bilong ol stesin: |
| Bekim: | 26. Yu mekim wanem kain wok nau? |
| 15. Yu laik lukim moa poto o stori o advetaismen long Wantok? | Bekim: |
| Moa poto moa stori | 27. Yu pinisim skul long wanem gret? |
| moa advetaismen | Bekim |
| 16. Yu laik mipela i printim Wantok hamas de long wik? | 28. Krismas bilong yu..... |
| Oigetade Tupela de | 29. Nem bilongyu: |
| Wanpela de tasol | 30. Adres:..... |
| 17. Yu ting wanem long Tok Pisin bilong Wantok? | |
| I orait | Telipon Namba:..... |
| I karangki liklik | Fax Namba..... |
| 18. Yu save kisim nius olsem wanem? | |
| Long Wantok | |
| Long ol Inglis niuspepa | |
| Long redio | |
| Long televisen | |

Toksav: Bekim ol askim bilong Wantok, katim na salim i kam bek hariap long dispela adres: Askim bilong Wantok, P.O. Box 1982, BOROKO, NCD.

Dispela resis bai pas long Desemba 31, 1997. Bai mipela tokaut long ol wina long Janueri 8, 1998.







• Mama...yu isi liklik ya, ... wangepela strongpela pilai namel long Fainens na ICPNG insait long PSSA resis.

Aninit: Pilai bin stap 15 minit tasol na pinis. Yuni winim Telikom long ino gat ID kat.

• Antap long raithan: Pren, yu laik go we. ... Pilai namel long Fainens na ICPNG long las wiken. Fainens winim ICPNG 2-1.

RAITHAN: Tenkyu poro, taim bilong mi long ran wantaim bal. Bara bilong Raiders redi long kisim bal. Gordons tas resis.

Aninit: PSSA resis namel long Post PNG na Elcom. Dispela em laspela pilai bilong dispela yia. Bai resis stat gen neks yia.






• Bara bilong Telikom laik abrusicim birua bilong Yuni. Tasol Yuni i win.



• Post PNG na Elcom haitim skin long traipela hot san bilong PSSA resis las wik.



• Hei maski sanap antap long lek bilong mi. Yu pilai bal ya.



• Sorl pren, mi tasim yu pinis.



• Em ya buddy ... kism bal na tekov. Dispela pilai namel long C-gret bilong Sea Eagles na Bala Raiders.



• Mama yu hariap ...Nogut ol lain long baksalt kam stilim bal.

Bilas-peles bai kuk long sofbal sempionsip

WATSON GABANA i raitim

Taim olgeta spot manmeri lusim pilai na stap malolo wantaim ol wanlain na wanpinis bilong ol long selebretim krismas na niu yia. Olgeta biknem sofbal klap bilong Nu Ailan provins stap nabaut long olgeta hap bilong kantri bai bungim pes long Mongop na Lugagun ples aut-sait long Kavieng, biktaun bilong Nu Ailan provins.

Nu Ailan Sofbal Faspits sempion, em wanpela resis i save kamap olgeta yia long dispela kain taim. Na dispela resis i save bungim olgeta sofbal klap na tim bilong Nu Ailan provins i stap nabaut long kantri.

Long dispela yia, ol oganaising komiti i bin makim Mongop na Lugagun olsem ples dispela tonamen bai stap long em. Na 28 tim bai pilai insait long dispela resis we pilai bai stat long 26 Disemba na pinis long Januari 1 1998.

Ol tim bai kam olsem long Lae, Mosbi na Vanimo.

Tonamen darekta, Otto Malarana i bin tok olsem ol komiti bilong em laikim bai pilai stap long dispela tupela ples bikos i gat foapela gutpela dai-mon we ol tim i ken yusim.

"As ting ting bilong dispela resis i no bilong winim bikpela moni na prais. Dispela em bilong bringim ol manmeri bilong ailan i kam bek long asples bilong ol long lukim na amamasim krismas na nu yia wantaim ol femili long ples," kodineta Otto tok.

Dispela em i no wanpela nupela samting. Long planti yia i kam, dispela Fas-pits sempionsip save bringim planti manmeri long olgeta hap bilong Nu Ailan na arapela provins. Long long dispela yia, 16-pela tim bilong man na 12-pela tim bilong meri soim laik pinis long pilai insait long dispela tonamen. Na save kamap long biktaun bilong Nu Ailan, Kavieng. Tasol dispela yia, ol tingting long holim pilai autsait long biktaun Kavieng.

"Mipela laik mekim bai ol manmeri long ples luksave olsem dispela gem i no bilong arapela lain. Nogat, ol i ken save olsem dispela em tonamen bilong yumi ol manmeri bilong asples stret," Otto tok.

Sempion tim bilong meri las yia, AB Bears i no inap stap long dispela resis. Dispela em bikos, planti pilaia bilong ol nau i stap insait long nesanel skwat bilong i go pilai long Brisbane, Ostrelia. AB Bears i gat planti yangpela pilaia. Na planti bilong ol i stap long dispela Anda 19 nesanel skwat.

Dispela opim rot bilong kain ol tim olsem Lae Malagan long stat olsem feveret bilong winim K1500 prais moni long dispela tonamen.

Tupela tim wantaim bilong Lae Malagan em sempion bilong Lae resis long 1995-96 resis. Tasol tupela i no bin go antap long Hagen na pilai insait long nesanel klap sempionsip. Dispela em bikos ol i no laik westim moni na ting ting long sevim taim na moni long pilai insait long dispela tonamen long Nu Ailan.

Tus Pulu, bosmeri bilong Malagan i bin tok olsem ol meri bilong em bai putim kamap wanpela strongpela salens long dispela taim na karim taitel i go long Grin-siti. Ol arapela tim Lae Malagan mas traim long lukaut long ol em: Hiway Ruts na United.

Long dispela taim tu, olgeta tripela nesanel memba bilong Nu Ailan bai stap long dispela taim. Olgeta memba bai bung wantaim ol pipel bilong ol na selebretim krismas na nu yia.

Ol komiti memba salim pinis pas i go long olgeta memba na askim ol long kamap long dispela taim. Dispela memba em; rijenel memba, Paul Tohian, Kavieng memba, lan Ling-Stuckey na Namatanai memba, Ephraim Apelis.

Tupela bikpela kampani i givim ful sapot bilong ol long ranim dispela tonamen. Lihir Menesmen kampani na PMM's Self-service long Kavieng i bin helpim wantaim sampela moni long holim dispela pilai.

Ol tim husat rejista pinis long kamap long dispela pilai em: Sifu, Mangxe, Nalik Malagan, Namatanai, Kara Malagan, Laggon Sharks, Young Sharks, Cape Sass, Pagopa, Achvulai Warriors, Highway Rutz, Lae Malagan, Buluminski, Bay Rutz, Sipage na POM Malagan.

Tim bilong ol meri em: Karanas, Dimond Race bilong Vanimo, Namatanai, Cape Sass, Livitua Top-up, Funele, Laggon Sharks, Fissoa, United Sisters, Country, Nalik Malagan, Namatanai Under-dogs na Lae Malagan.

Bikpela pait stapim provinsel soka tonamen long Popondetta

Bikpela soka tonamen bilong Oro provins long biktaun Popondetta i no bin pinis gut long las wik Fraide. Bikpela pait i bin kamap na stapim provinsel soka tonamen.

Siaman bilong oganaising komiti, Saunders Kageni i bin tok olsem, dispela nambatu provinsel soka resis i no bin kamap gut bikos long bikpela pait. Na olgeta tropi na prais bai ol putim i go bek long neks yia.

Dispela tonamen i bin pulim 24 tim i kam long olgeta faivpela sub-distrik bilong Oro provins. Pilai i bin stat long Mande las wik na sapos long pinis long Sarere. Tasol pait i bin kirap taim tupela tim i no bin wanbel long skoa bilong tupela.

Saunders tok olsem, ol i bin yusim pul sistem long ranim dispela tonamen. Na aninit long dispela sistem, foapela tim long wanwan pul sapos long i go insait long semi fainel. Na wina bai pilai insait long gren fainel. Tasol tupela tim, husat i bin stap long faiv na siks ples i bin tok olsem ol ofisel giamanum ol na tok pait i go i kam na statim pait.

Saunders tok ol tim sapos long go insait long fainels em; Eben, JJ,

Yema na Isiveni long pul 1 na long pul 2 em Higura, Saiho, Yema na JJ. Tasol tupela tim, Survivors na Eruption i bin statim kros wantaim ol arapela tim na bagarapim pilai olgeta.

"Dispela em nambatu taim bilong mipela long holim dispela provinsel resis. Spot ofis long Popondetta i bin statim dispela resis las yia long bungim olgeta yangpela manki long olgeta hap bilong provins. Tasol nau, dispela gutpela pilai i bin bagarap. Olsem na mipela bai ranim wankain tonamen long Desemba neks yia na givim aut ol tropi na prais moni," Saunders tok.

Saunders tok olsem em i no bin amamas long dispela kain pasin bilong sampela tim. Na em tok bai ol traim long stapim dispela kain ol tim long pilai neks yia.

"Mipela i no inap larim dispela ol tim husat i save statim pait long pilai neks yia. Bai mipela kamapim strongpela lo na stapim ol olgeta," Saunders tok.

Saunders soim belsori bilong em tu i go long olgeta tim husat i bin westim bikpela moni na taim bilong ol long kamap long dispela taim.



• Mark Loop bilong Fainens soim stall bilong em taim Fainens pilai wantaim Komes na Industri las wiken.

Aroma Kos tonamen bai kamap gen dispela nu-yia

Olgeta yangpela bilong Aroma Coast long Sentrel provins bai bung gen dispela nu yia na pilai insait bikpela tonamen bilong ol.

Aroma Coast spot kanivel i save kamap olgeta nu yia. Na nau long dispela yia, ol yangpela manmeri bilong olgeta hap bilong Aroma kos bai bungim pes gen long selebretim krismas na nu yia.

Ol oganaising komiti i bin bung las wiken na tok orait long holim gen dispela tonamen. Na pilai bai stat long Desemba 29 na pinis long Januari 2 1998. Tok i no orait yet long hamas tim tru bai pilai insait long dispela resis. Tasol tok i stap olsem ol man bai pilai ragbi na ol meri bai salens long netbal.

Mausman bilong gems komiti,

Ivan Ravu tok olsem nau yet, 10 tim bilong ples na narapela ples, Kalapara baim pinis K240 rejistresen fi bilong pilai insait long dispela resis. Husat tim laik pilai insait long dispela resis bai baim wankain moni olsem K240.

Bihain long dispela tonamen, Aroma Coast Ragbi lig ting ting long makim tupela tim long salens Mosbi Vipers long asples bilong ol yet.

Long taim ol i bin statim dispela salens, Aroma Coast i bin kamapim planti gutpela ragbi pilaia. Sampela bilong ol husat i bin pilai insait long Coca Cola Vipers em: Gerega Vaira, Gerega Gairo, Robert Volu, Vicus Taoni na Vagi Marawa. Dispela ol man i bin strongim tru

Vipers insait long Kwinslen Sanel 9 salens long dispela yia.

Plantil ol yangpela bilong dispela hap i lukluk het tasol long pilai insait long dispela Krismas tonamen. Na bihain ol i ken go pilai insait long sampela klap husat i save pilai insait long Mutrus Mosbi ragbi lig resis neks yia.

Ol komiti makim Jack Kedeas olsem nupela gem kodineta bilong dispela tonamen. Na Solomon Ravu bai stap olsem bos bilong referi. Na Hoge Baeau bai go pas long pilai bilong ol meri.

I gat planti bikpela prais bilong winim long dispela taim. Ol komiti bai tokaut long ol prais bihain long ol kism gut toksave long ol sponsa.

Makam paia long soka tonamen

Wanpela risen watpo na ol soka tim bilong Kaiapit i bin mekim gut long ol nesanel na rijenel tonamen em bikos ol i save kamap wantaim trening skwat hariap.

Dispela paia i no bin popaia. Tupela wik i go pinis, wanpela afiliat asosiesen bilong Kaiapit Distrik Soka Asosiesen, (KDSA) i bin ranim wanpela bikpela tonamen bilong en na kamap wantaim ol tim bilong em bilong neks yia.

Kaiapit, husat i gat nem long kamap wantaim sampela gutpela intanesenel soka pilaia olsem; Yanding Yawising, Hans Gewibing, Jack Jonathan, Abiang Kera na planti yangpela pilaia.

Long dispela yia, sinia tim bilong KDSA i bin winim Momase rijenel soka tonamen

long Madang. Na bihain tasol long wanpela mun, ol yangpela Anda 20 manki bilong ol i bin winim nesanel Anda 20 sempionsip long Wau.

Dispela win bilong Anda 20 tim long Wau i bin kirapim bel bilong planti soka manmeri long kantri. Na tu givim bikpela skul long soka developmen long kantri. Dispela tim i bin gat wanpela gutpela samting i stap baksait long en. Ol sem manki i bin winim Anda 16 nesanel sempionsip long 1995. Na bihain ol winim Anda 17 sempionsip long 1996. Kirap nogut, sem ol manki ya i bin winim Anda 20 sempionsip long dispela yia.

Dispela em wanpela gutpela piksa bilong spot developmen. PNGFA mas kism skul long dispela eksampel bilong KDSA.

Long lukim dispela pasin i go het yet long Makam Veli, ol mmanmeri insait long Umi konstituyensi i bin witness wanpela bikpela soka tonamen long Marasasa ples klostu long Watararis tupela wik i go pinis. Dispela tonamen i bin kamap long makim Anda 17 tim bilong ol long pilai neks yia insait long KDSA tonamen.

Mausman bilong Amari soka asosiesen, Makis Timo givim bikpela tok tenkyu bilong em i go long olgeta 19 tim husat i bin kamap long dispela taim na tu long ol referi bilong Lae husat i bin helpim long ranim dispela tonamen.

"Sapos yupela pilaia na referi i no bin stap, bai i nogat wanpela pilai kamap olsem dispela. Mi amamas tru long gutpela sapot

bilong yupela ol kepten na tim menasa bilong wan wan tim long helpim mipela ol komiti long ranim dispela tonamen," Makis tok.

Biknem tim bilong Lae, Mitif i bin go insait long gren fainel wantaim asples tim bilong Marawasa. Tupela i bin winim Munsa na YGK long stap insait long gren fainel bilong dispela tonamen. Malawasa i bin winim Mitif long gren fainel bihain long penalti sut aut.

Ellison, husat PNGFA laikim em long sapatim Ludwig Peka long lukautim junia tim bilong PNG tok olsem em amamas tasol long mekim dispela wok sapos PNGFA askim em long givim han.

"Mi no inap les long mekim wok. Mi redi tasol long givim han. Tasol bikpela samting, mi laikim soka long Makam mas kamap bikpela na strongpela," Ellison tok.

Makam Veli i gat tupela asosiesen husat i afiliat i go pas wantaim PNGFA. KDSA na Gaifawap.



• Lukaut long ol yangpela bilong Sea Eagles long dispela yia.



• Holim gut dispela susa ya. Kain pilai bilong em na ol Fainens winim ICPNG 2-1 las wiken.

GORDONS TOUCH ASSOCIATION

Under 13 points ladder after Game3

Teams	Played	Won	Lost	Drew	For	Against	Point
Sharks	3	2	-	1	12	4	5
Tigers	3	2	-	1	8	4	5
Magpies	3	1	1	1	10	7	3
Steelers	3	1	1	1	8	6	3
Eels	3	1	1	1	7	4	3
Warriors	3	1	2	-	8	12	2
B/Heelers	3	-	2	-	6	8	2
Bala	3	-	2	1	-	12	1

Results

Game 3

15th & 16 th December 97




- B/Heelers 6 def Flats 0
- Magpies 0 drew Bala 0
- Kona Eels 0 drew Sharks 0
- Tigers 6 def Warriors 4



• Tas meit .. yu laik go wel Raithan: Hei bal wel Tupela susa ya kirapim das long las wiken soka resis.



WANTOK SPOT



Ol bebi tiger bilong Lapwing Drive • Ol yangpela bilong bilong Lapwing Tiger husat nau pilal long Gordons tas resis. *Foto Ivan Bayagau*

ARL klap laikim \$A1.5 milion bipo ol kamapim wanpela resis

Toktok bilong kamapim wanpela resis long Ostrelia i no inap kamap hariap inap ARL tokaut long wanpela de bilong baim ekstra moni i go long ol klap bilong ol.

Wanpela tingting i stap insait long dispela wanbel toktok em olsem bipo long faiv klok apinun hap asde, olgeta 11 tim insait long ARL sapos long kisim \$A1.5 milion. Dispela em wankain olsem ol tim bilong Supa lig resis we News Limited bai baim ol. Tasol taim bilong baim dispela moni i bin abrus. Olsem na ol ARL klap laik bai ol bos bilong ol tokaut gut long wanem taim bai ol kisim dispela moni.

Tasol sif eksekutiv bilong ARL, Neil Whittaker, husat i bin bung wantaim ol lain bilong News Limited, Nain Netwok na nambawan sponsa bilong ARL, Optus long wiken i bin tok olsem ol i no kamap wantaim wanpela taim yet bilong baim olgeta klap. Ol bai kamap wantaim wanpela taim bihain.

"I laik tok olsem dispela em i no samting bilong wanpela man tasol long lukluk na tilim dispela \$A16.5 milion," em tok.

LAIK BILONG WANWAN

Pot Mosbi Tas Futbol Referis Asosiesen bai lukautim Tas Futbol Resis namel long ol Setelmen long Pot Mosbi.

- * Em i Op bilong Man na Meri wantaim.
- * Nogat sas long fi - bilong Tim Rejisresin.
- * I gat Prais olsem Tropi bai i go long Win Tim bilong dispela resis.

Plis ringim Dennis Seeto long Pon: 325 5255 (Boroko Motors) sapos yu laik save moa long dispela resis.

Spot mas i gat nupela ministri bilong em yet: Dawanincura tok

WATSON GABANA i raltim

Jenerel Sekreteri bilong Papua Niugini Spot Federesen i no wanbel long Spot i kam aninit long nupela ministri, Famili na Sios Afeas. Em laikim gavman i senisim nem bilong dispela nupela ministri.

Long wanpela miting wantaim niusman las wiken Fonde, Jenerel Sekreteri, John Dawanincura askim sapos Prais Ministri, Bill Skate i ken senisim nem bilong dispela nupela ministri.

"Long dispela taim, we yu wok long senisim nabaut ol ministri long gavman bilong yu, inap mi askim sapos yu ken putim spot i kam aninit long wanpela ministri olsem: Ministri bilong Spot, Turisim na Kalsa. Dispela askim bilong mi i bihainim Olympiks pilal long Sydney long yia 2000," hap leta bilong Dawanincura i rit olsem.

Long nau yet, Spot i stap aninit long Famili na Sios Afeas, Titus Philemon, memba bilong Samarai Murua i go pas long en.

Dawanincura, husat i ting olsem spot i no sapos long kam aninit long dispela ministri. Em tok long Julai 23 dispela yia, bihain tasol long ol i bin fomim nupela gavman, em i bin askim Prais Ministri, Bill Skate sapos Spot i ken i gat ministri bilong em yet.

Tasol nau, bihain long senis kamap long gavman, Dawanincura askim sapos PM i ken putim spot i go aninit long nupela ministri olsem; Spot, Turisim na Kalsa.

Dawanincura tok olsem, em i bin tok-tok wantaim ministri bilong Famili na

Sios Afeas, Titus Philemon, sekreteri, Mila Gena, presiden bilong PNGSF, Sir Henry ToRobert na olgeta i bin wanbel pinis long dispela tingting bilong em.

Em tok ministri i bin amamas long mi ken tok stret long wanem samting em i bin tokim mi.

Dispela em toktok bilong Ministri: "MI wanbel tru wantaim yu long senisim nem bilong dipatmen. Tasol dispela bai kamap bihain long mi kisim i go long palamen na ol bikman i skelim na glasim gut. Eksekutiv kaunsel bai mekim tok orait long dispela. Mi wanpela i nogat pawa," Dawanincura tok.

"Dispela nupela dipatmen i no fit gut wantaim wok bilong spot. Nau yet, intanesenel Olympiks komiti laik kirapim wok bilong ol meri long stap nambawan long wol. Na dispela dipatmen i no inap mekim dispela," Sekreteri Jenerel tok.

Em tok Spot Federesen laik mekim wok bilong ol meri kamap bikpela long spot. Na dispela tingting bilong putim spot aninit long Famili na Sios Afeas i no sut stret long tingting bilong Spot Federesen.

Long dispela taim tu, Dawanincura givim tok amamas bilong em tu i go long olpela minsita bilong Hom Afeas na Yut Mukl Taranupl, we pastaim, spot bin kam aninit long gutpela sapot bilong em taim PNG tim i bin go pilal long mini Saut Pasifik gem long Pago Pago, Westen Samoa long Ogas dispela yia.

"Taranupl em i bin wanpela gutpela ministri tru. Long sotpela taim bilong em long opis, em i bin wok wantaim mi long painim moni long wokabaut bilong ol pilala bilong mipela long Pago Pago," Dawanincura tok.

Mutrus Bogenvil pilal i bin pinis wantaim bikpela lotu

Bikpela Mutrus Bogenvil pilal i bin pinis wantaim bikpela lotu long Fraide las wik stat long siks klok apinun i go inap long 10 klok long nait.

Dispela pilal we i bin bungim planti manmeri long olgeta hap bilong trabel aian bilong Bogenvil i bin pinis wantaim bikpela amamas na sore. Ol manmeri, yangpela na lapun wantaim i bin kam bung long witesim wanpela bikpela na trabel tri pilal bihain long 9-pela yia.

"Taim pilal i bin pinis long Fraide, ol manmeri sekan, holimpas na kraf wantaim long spim sori na wari bilong ol. Planti bilong ol dispela manmeri i no bin lukim ol yet klostu tempela yia," Otto Noruka, darekta bilong komyuniti sevis long Arawa tok.

"Taim pilal i bin pinis long Fraide, olgeta manmeri i bin bung long nait long bikpela lotu we olgeta sios long Bogenvil i bin ranim," Otto tok.

Ol manmeri long Siwai, Wakunai na Nakobis stat long i go long plas long rot. Ol manmeri long Sentrel Bogenvil tu tusim Arawa long Sande morning na go bek long asples bilong ol gen.

Otto tok olsem long dispela taim, planti paitman bilong BRA kam joinim ol ami bilong Nu Silan na Ostrelia na ol i bin pilal. Ol lain husat i stap long Trus Monitoring Grup i bin pilaim sampela gem tu egensim ol tim bilong Buka long basketbal, soka na volibol. Ol ami bilong PNG tu i bin kamap wantaim wanpela tim bilong ol na salensim ol tim bilong Bogenvil.

Gavman bilong Ostrelia i bin givim Arawa lokal level gavman K25,000 long stretim plus long holim dispela pilal. Na tu nosenel memba bilong Sentrel Bogenvil, Sam Akolait i bin givim K13,000 long yusim long dispela taim.

"Mipela ol lain long Arawa Lokal Level gavman laik givim bikpela tok tenkyu bilong mipela i go long memba Akolait na gavman bilong Ostrelia long bikpela helpin ol i bin givim mipela long ranim dispela bikpela spot tonamen we i bin bungim planti manmeri long dispela provins," Otto tok.

Ol yangpela long Buka Passage i bin kamap sempion bilong dispela tonamen. Ol i bin winim moa medal long arapela lain long hap bilong Bogenvil.

Long boksing, ol lain long Sentrel Bogenvil i bin kamap sempion. Ol tim long olgeta hap bilong Bogenvil i bin gat sans long winim wanwan pilal.


Otto tok olsem ol tingting long kamapim wankain pilal neks yia sapos ol pahim inap moni. Tasol nau yet, Otto tok olsem ol bal-train long strongim olgeta epul mekem bilong Bogenvil bai ol i ken pilal insait long sampela nosenel sempionsip insait long kantri.



KRISMAS SAPTU

Gutnius bilong PNG em bel-isi i stat kamap long Bogenvil

Krismas toktok i kam long Asbisop bilong Mosbi, Asbisop Brian Barnes



"GLORI i go long God long heven, na bel-isi i ken stap long graun." Ol planti enjel bilong God i singsing long ol wasman bilong sipsip long Krismas nait. Na dispela song bilong ol em gut nius bilong ol na olgeta pipel - taim Mama Maria i karim Kraus, Sevia na Lod long Betlehem long Judia. Em i gutpela nius long ol pipel long dispela taim na tu long yumi tude.

Em i tru olsem yumi long PNG i nidim gutnius na sampela askim bilong amamas. Long mipela, 1997 em i bin, na nau yet i bin wanpela yia bilong hevi. Em i wanpela yia i gat planti hevi, sampela bilong ol i no pinis yet.

Dispela disisen bilong gavman long kisim ol outsait paitman i kam long stretim hevi long Bogenvil i mekim ol pipel i kirap na kros na go egens long plen bilong gavman.

Dispela bikpela taim bilong san i bringim hevi long plant hap bilong kantri, na em i wanpela samting o hevi we i bikpela tru na planti bilong yumi i no lukim bipo long dispela kantri. Planti tausen pipel bilong yumi i stap hangre na sot tru long kaikai na wara. Planti i kisim taim tru bikos ol lain long Nesenel Draut Rilif Komit i wok isi tumas. Siman bilong dispela komiti i rausim wanpela man, husat i bin stap kodineta na bringim gutpela wok tru na i gat bilip long Papua Niugini. Dispela siaman tasol i bin i bin tok egens long Australia long taim em i laik kisim helpim long ol narapela kantri. Australia i bin givim planti bikpela prektikol helpim. Ol pipel bilong mipela tu i mas amamas long ol yet bikos ol i wok hat long helpim ol yet na on husat narapela i stap long hevi.

Long nau yet, mipela i stap namel long moa bikpela hevi - hevi long gutnem bilong mipela. Nesenel lida bilong mipela i bin bungim planti bikpela toktok long paol wok bilong em na tu long sait bilong raskol pasin, tasol em i no larim pablik wok painim-aut i kamap long stretim nem bilong em. Dispela eskus olsem em i stap long kontrol bilong bia na mekim toktok i no gutpela tumas long kain man husat i stap long bikpela posisen antap olsem em. Dispela singaut bilong em long askim ol narapela lida long sanap na pait

• Asbisop Brain Barnes.

egens korapsin o paul pasin long gavman i no gutpela tumas. I luk olsem olgeta de yumi harim wanpela lida ol i rausim na senisim, ol politikal pati i bruk, pogiv, ol pati i senis na planti ol lida i muv i go kam long sait bilong palamen. I luk olsem mipela i gat gavman we i no lukautim pipel. Ol pipel i no amamas na i tingting planti tumas. Olgeta dispela samting i kamap taim yumi wok long redi long Krismas.

Gutnius bilong PNG em olsem bel-isi i wok long kamap long Bogenvil.

Bikpela luksave i mas go long ol pipel, husat i pasim tok wantaim na wanbel bihain long bikpela bruk i kamap long long sait bilong politik na ol man i lusim laip. TASOL pasin bilong pogivim narapela na wanbel i bikpela samting moa. Ol pipel yet i mekim dispela samting i kamap. Ol kantri long wansolwara i wok long givim gutpela halivim.

Olgeta manmeri long Papua Niugini i wok long hp na pre olsem dispela Krismas bai gutpela na i gat bel-isi long Bogenvil.

Mipela i amamas long kam bilong Jisas Kraus namel long mipela. Em i stap wantaim mipela long tok, long Sios na long taim bilong Holi Eukaris. Namel long ol hevi yumi wan wan i gat, yumi painim strong na amamas na gutpela tingting long save bilong was na laikim bilong em long yumi olgeta. Yumi pre long blesing bilong bel-isi long yumi yet, femili bilong yumi na ol frens long dispela Krismas na ol ansa bilong ol hevi bilong mipela bai i kamap ples klia na trupela long 1998.

God i blesim yupela olgeta.

Krismas toktok i kam long Baibel haus

JISAS i bin bon sampela 2000 tausen yia ago pinis. Long taim Jisas i bon Augustin i bin stap Empera bilong Romen Empaia.


Jisas i bin bon long Bethlehem long provins ol i kolim long Judea. Dispela provins em i hap bilong nau kantri istap Israel. Long dispela taim Israel i bin stap aninit long rul bilong Romen gavman. David, husat i bin king bilong ol Israel tu i bin bon samting olsem 1000 yia pastaim long Jisas.

Long taim Jisas i bon, King Herot i stap olsem rula or gavana bilong dispela provins bilong Judea. King Herot i wokim wanpela bikpela tempel tru bilong ol Jewis pipel we ol i ken go na lotu long en. Ol bikman bilong ol Jewis pipel em ol sif pris na ol tisa bilong lo tasol ol rula tru em ol Romen.

Long dispela taim i bin gat wanpela pris nem bilong em Zekaria. Zekaria i stap wantaim meri bilong em Elisabet na maski tupela i lapun pinis tupela i bihainim gut olgeta toktok bilong Papa Got.

Tasol wanpela samting i rong long tupela olsem tupela i nogat wanpela pikinini, olsem na tupela i wari tru. Tasol tupela ino save isi long prea bai Got i ken givim tupela wanpela pikinini. Wanpela taim Zekaria wok stap na engel bilong Got i kam long em na tokim em olsem Got bai givim em wantaim meri bilong em wanpela pikinini.

Zekaria wantaim Elisabet bai gat wanpela pikinini man na em



bai kamap wanpela bikman tru. Em bai John bilong Baptis na em bai kam long stretim rot bilong Jisas, husat bai kam long kisim bek Israel olsem propet Isaia i tok pinis sampela yia i go pinis. Jisas i bin bon long kain taim olsem nau we pipel i nidim pis long hat bilong

ol olsem tu hop, strong na pasin bilong amamas long rausim wanem samting nogut i kamap long laip bilong yumi ol man.

Mekim dispela Krismas i bringim amamas, hop na pis long wanwan man, meri na pikinini insait long Papua Niugini.

BIRTH OF A SAVIOUR

The Promise to Mary.



Once God sent the Angel Gabriel to a Town in Galilee named Nazareth. The Angel had a message for a girl whose name was Mary. Mary was promised in marriage to a man named Joseph, who was a descendant of King David.

The angel came to Mary and said, "Rejoice! The Lord is with you and has given you a great Honour." Mary was very troubled by the angel's message, and wondered what his words meant. The angel said to her, "Do not be afraid, Mary. This is the great Honour that God has given you: You will become pregnant and will have a baby son, and you will name him Jesus. He will be a great man and will be known as the Son of the Most High God. The Lord God will make him King like his ancestor David was. He will be king over the people of Israel forever. His reign will never end."

Jesus is Born

Roman Emperor Augustus gave an order that everyone must go to his own town to have his name written in the



government records. So Joseph went from the town of Nazareth in the province of Galilee to the town of Bethlehem in the province of Judea. This was the town where King David has been born. Joseph had to go there because he was a descendant of David. He went there with Mary, who was promised to him in marriage. Mary was going to have a baby, and while she and Joseph were in Bethlehem, the time came for the baby to be born.

There was no room for them in any of the inns there. So they went to a shed which was used for feeding animals, and there Mary gave birth to a son, her first child. She wrapped him in strips of cloth and placed him in a feed box.

Shepherds and the Angels

That night some shepherds were in the fields taking care of their sheep. An angel from the Lord appeared to them, and a bright light from the Lord shone down on them. They were very frightened, but the angel said to them, "Don't be afraid! I have good news, which will make all people very happy. Today your Saviour was born in




Bethlehem. He is Christ the Lord! You will find him wrapped in blankets and lying in a feed box. That is how you will know that what I say is true!" So they went quickly, and found Mary and Joseph and saw the baby lying in the box. When they saw him, they told Mary and Joseph what the angels had said about the baby.



Bible Society of Papua New Guinea
P.O. Box 335 Port Moresby
P.O. Box 1017 Lae.

"Taim bilong tingting bek na wokim nupela gen"



OLGETA lain bilong mi long Papua Niugini, mi kisim dispela taim long makim femili bilong mi long salim bikpela Krismas griting i go long yupela olgeta. Krismas em taim bilong tingim bek ol samting we i bin kamap na tu long mekim plen bilong ol nupela samting long kamap bihain. Taim bilong lukluk bek na tok, "Neks yia, wantaim helpim bilong God, bai mi mekim gut"

Mi bai amamasim Krismas bilong mi wantaim praim minista bilong Solomon Ailan wantaim ol narapela lain Papua Niugini manmeri long ailan long Bogenvil.

Taim mi lukluk bek long ol samting i kamap long dispela yia, mi ting olsem i moa gutpela long mi long stap long Bogenvil, insait long dispela taim bilong bel-isi na gutpela sindaun namel long ol pipel.

Dispela yia, i bin lukim gutpela - na - nogut - long kantri bilong yumi. Mipela i statim yia wantaim dispela wok bilong kisim ol autsait paitman husat i tok long stretim hevi bilong Bogenvil wantaim gan na bom.

Mipela i ken tok tenkyu long God tasol long gutpela tingting long stap na ol dispela autsait paitman i lusim kantri na go na hap bilong K50 milion tasol i bin lus.

Pasin bilong bel-isi o pis long taim mi kamap olsem praim minista i bin bihainim pasin wanbel, toktok wantaim, rispekt na bilip long narapela o trast. Narapela bikpela samting em long larim

Krismas na Niu Yia gritings i kam long Praim Minista bilong Papua Niugini

ol Bogenvil yet i mekim ol plen long bringim bel-isi namel long ol yet. Em i wanpela bikpela pinis bilong dispela yia moa long stat bilong en.

Mipela i bilip olsem 1998 bai yia bilong trupela restoresin, taim bilong tok sori na bringim bek gutpela sindaun long ailan. Mi kisim dispela taim tu long makim olgeta pipel long Papua Niugini long tingim ol sevis bilong ol lain ami na plisman bilong yumi husat i stap nau long Bogenvil. Long ol manmeri husat bai ino inap stap wantaim femili bilong ol long dispela Krismas, mipela i serim amamas wantaim yupela na amamas long gutpela wok bilong yupela long bringim bel-isi na gutpela sindaun long ailan.

I tru olsem, Bogenvil i no wanpela hevi tasol we i bungim kantri bilong yumi. Mipela i bungim wanpela bikpela taim bilong san tru we yumi ken tingim.

Noken ting olsem dispela liklik ren sampela ol eria i kisim i min olsem dispela taim bilong bikpela san i pinis. Nogat, em i no pinis.

Tupela bikpela dem o ples bilong pasin wara em Yonki na Sirinumu i bungim taim nogut long wara level i daunbilo tru. Ok-Tedi i stap pas yet stat long las wok na ol ekspot indastri bilong yumi i wok long bungim bikpela taim stret.

Mipela olgeta mas luksave long Krismas na tingim olsem planti ol pipel bilong mipela i stap long hevi yet bikos long bipela taim bilong san. I gat planti pipel, bilong Papua Niugini na tu frens bilong ovasis husat bai ino inap stap wantaim ol lain femili bilong ol long Krismas bikos ol i helpim long mekim wok long givim aut ol kaikai long ol manmeri long rilif operesin.

Mi tok tenkyu long yupela olgeta na amamas long wok bilong yupela. Long ol pipel long viles husat i bungim dispela taim nogut, mipela i ofarim prea na tingting long yupela long dispela Krismas. Go het long helpim yupela yet na gohet long mekim wok long graun bilong yupela.



1998 i promis olsem narapela hatpela yia. Em bai wanpela yia we bai lukim mipela i go wantaim ekonomi bilong wol na dispela taim bilong bikpela san bai mekim bikpela samting long prais bilong ol kaikai na ol sevis yumi i kisim.

Olsem na gavman i kisim dispela disisen long Novemba long dabolim ol skul fi subsidi, na dispela disisen i mas gohet.

Long mun Mas, 1998 insait long palamen, mi bai putim aut anti-korapsin bil (lo bilong mekim save long ol lida wokim paul pasin) wanpela namba wan lo long palamen long dispela nupela yia.

Ol dispela politisen husat i tingting strong tru long ol milien kina kantri bilong yumi i lusim long ol kain dil olsem POSF Cairns konsevetori bai vot long dispela bikpela bil. Ol dispela lain husat i laik pilai politiks bai gohet yet long sakim tok bilong mi, na yusim ol kain kain rot long bagarapim nem bilong mi wantaim ol pipel husat i no kisim wanem ol i laikim long gavman bilong mi,

Wanem ol samting i kamap long ol wok i go pinis i min olsem dispela taim bilong tingim bek long mi em bikpela samting tru long mi long dispela Krismas.

Mi askim yupela olgeta long pogivim husat long femili bilong yu na husat long wok-ples bilong yu long wanem samting yupela i mekim long dispela yia. Kamapim bel-isi olsem femili na mekim strongpela wokbung wantaim long 1998 wantaim laik bilong God na pogivnes olsem was bilong yu.

Mi kisim dispela taim gen long tok gutpela na hepi Krismas na hepi Niu Yia.

Meri Krismas !

KRISMAS em i taim bilong ol femili na long olgeta hap bilong wol planti pipol i save mekim ol kainkain samting long amamasim wantaim ol femili na pren bilong ol.

Yumi no save tumas olsem wanem tru na Disemba 25 i kamap olsem Krismas dei. Tasol wanpela buk oli kolim "New Book of Knowledge" (Nupela Buk Bilong Save) i tokim yumi olsem long bipo tru dispela dei i no stap olsem bikpela dei bilong ol Kristen sios. Samting tru, ol bikman bilong sios long dispela taim i gat tingting olsem pasin bilong hamamasim ol betdei i pasin nogut.

Pasin bilong amamasim krismas ino bin stap inap samting olsem 300 yia bihain long taim Mama i karim Jisas.

Nupela testamen tu i no gat rekot long betdei bilong Jisas. Bilip i stap olsem ol hatwok bilong ol kristen long bikpela siti long Rom i bin senisim ol pasin na kastom bilong ol haidei (ol lain husat ino save bilip long God). Disemba 25 i bin kamap olsem dei bilong amamasim betdei bilong Kraist insait long 4th sentari AD (300 AD).

Bilip istap olsem tu dispela dei i kamap olsem bikos long kalenda bilong dispela taim Disemba 25 emi taim bilong kol na ol dei long dispela taim in save longpela moa. Ol pege pipol husat i save lotu long san i makim dispela dei olsem promis bilong tain bilong spring bai kamap.

I no planti kastom bilong Krismas i gat stat wantaim sios. Wanpela tasol. Dispela em long kastom o stori bilong krismas krib. Dispela i save kamap long krismas nait na emi i stori bilong ol saveman man i painim Jisas na givim presen long em.

Santu Francis bilong Assisi i bin sanapim wanpela so long Greccio, Italy long 1223, we planti pipol i bin luksave long kamap bilong Jisas. Tude bai yu painim ol piksa na stasu bilong holi femili na ol saveman man i nildaun long givim presen long bebi Jisas long planti haus lotu na haus bilong ol Katolik pipol.

Long Italy, dispela krismas krib ol i kolim long presepe, em i min "mensa" o bokis kaikai bilong ol sipsip we bebi Jisas i bin slip long em. Long Frans oli kolim long krippe. Long Spen na namel long ol long kantri long Saut Amerika husat i save tokples Spenis oli i kolim long "nacimiento" o "karim bilong Jisas". Dispela kastom i bin kamap long Ingran na Amerika tasol ino bikpela tumas long ol Katolik kantri.

Krismas musik

Krismas musik i save nais na planti pipol i save laik harim na singim ol long olgeta yia. Ol planti long ol dispela singim olsem ol Krismas kerol i bin kamap olsem danis we ol man i stap long Ingran i save mekim.

Pasin bilong paitim belo long taim bilong Krismas em i stap olsem wanpela kastom bilong taim bilong Krismas. Zurik, Switzerland em i wanpela ples we long taim bipo yet i save gat ol naispela belo. Long olgeta Krismas ol man i save paitim ol dispela belo long singautim ol femili igo long lotu. Ol belo tu i save gat gutpela ming tingting ol i hangamap antap long Krismas tri.

Ol krismas tri na ol bilas bilong krismas

Krismas tri em i wanpela sain bilong ol gutpela spirit. Ol pipol bilong Jemani long bipo tru i bin save katim ol nupela diwai na karim igo insait long haus bilong ol. Ol dispela diwai ino save dai na ol pipol i kisim sain olsem ol ino nap long dai. Ol Kristen i senisim dispela kastom igo long pasin bilong onarim Kraist.

Ol pipol bilong Denmak, Swiden, na Nowei we i gat planti gripela bus i bin kisim dispela kastom tu na ol i save katim ol nupela diwai na karim igo insait long ol haus bilong ol.

Long Ingran pasin bilong karim tri igo insait long haus i stat long taim wanpela Jeman prins Albert ov Coburg-Gotha i maritim Kwin Victoria. Prins Albert i bin bilasim Windsor Kesol wantaim Krismas tri long yia 1841.

Pasin bilong krismas tri i bin kamap long Amerika taim ol Hesien soldia i statim long yia 1776, long taim bilong revolusineri wo. Bihain ol pipol i kam long Jemani i karim dispela pasin na yusim long planti hap bilong Amerika.

Tude long Amerika ol pipol i save laik bilasim gut krismas tri long arasat long haus na lusim stap olsem displei.

Ol planti ol narapela bilas bilong Krismas i bin stat olsem ol bilas bilong ol pege pipol. Ol Romen i save usim

Ol pasin o kastom bilong krismas long wol



• Ol liklik pikinini long Sunny Bunny i palai bihainim stori bilong krismas, Jisas na wasman bilong sipsip.

plaua na ol lip diwai long ol taim bilong makim bikpela dei. Ol rekot istap i soim olsem ol pipol bilong dispela hap i bin save yusim holi, aivi, na bei long ol lotu bilong ol. Ol narapela lain i bin save hangamapim misolto long haus bilong ol. Long kastom bilong ol, sapos tupela birua i bung aninit long dispela misolto, tupela imas putim daun ol samting bilong pait na sekhan. Pasin bilong ol manmeri i save kis aninit long ol dispela misolto i kamap long dispela.

Ol presen na amamas

Sampela femili i save opim ol presen bilong ol long Krismas nait na sampela i save wet igo inap long Krismas dei yet bai oli ken opim ol Krismas presen bilong ol.

Sampela pikinini i save painim ol presen bilong ol insait long ol socks ol i save hangamapim long ples bilong paia i ave go aut. Sampela save painim ol presen aninit long Krismas tri. Long Frans, Mexico na ol kantri long Saut Amerika olsem Ajentina na Brazil ol pikinini i save painim ol Krismas presen bilong ol insait long ol su bilong ol.

Long ol haus bilong ol planti katolik pipol Krismas krib i save kamap moa long Krismas tri. Ol pikinini bilong ol Latin Amerika i save holim krismas pati i mas gat pinata, dispela emi i wanpela jag oli wokim long graun o wanpela enimol na ol bai pulapim em long ol swits. Ol pikinini bai bung na bai kisim ten long train na paitim dispela pinata. Sapos wanpela i no nap longpundau-nim pinata narapela bai train en igo inap taim wanpela pikinini i pundaunim dispela pinata. Em nau olgeta pikinini bai serim ol swits istap insait long dispela pinata.

Long Netherlands, Belgium, na ol sampela hap bilong Jemani, ol pikinini i save kisim ol presen bilong ol long Disemba 6. Dispela em i pisdei bilong Santu Nikolas husat i was santu bilong ol pikinini. Santu Nikolas i bin wanpela Bisop bilong Mrya long yia 300 AD na em i wanpela man bilong givim ol samting.

Long Ingran oli kolim em long Fada krismas, long Netherlands oli kolim em long Sinta Klaas.

Dispela nem tasol ol Dutch i bin karim igo long Amerika tasol ol Inglis pikinini i harim olsem Santa Klos na dispela i kamap olsem nupela nem bilong em long Amerika. Ol piksa bilong Santa Klos i soim olsem em i werim hat, ol trausas i nap long skru na i simukim paip oli wokim long graun. Long yia 1863, wanpela katunis (o man bilong droim piksa) Thomas Nast i wokim piksa bilong santa Klos i werim retpela set na trausas na simukim paip.

Ol pikinini long Frans i save hamamasim kam bilong Pe're Noel long taim bilong krismas. Long Jemani ol pikinini i save wetim Krius Kringle husat i save karim ol presen i kam. Long Sweden ol

presen bilong Krismas nait i save kam long wanpela patpela man oli kolim long Jultomte. Em save gat ol helpim bilong em na oli olsem ol liklik man, oli kolim ol long tomtar.

Tasol ino olgeta Krismas petron i save kam olsem ol man. Sampela i save kam olsem ol meri, Long Italy ol presen bilong ol pikinini i save kam wantaim meri na oli kolim em La Befana. Ol gutpela pikinini save redi

long kisim ol presen i kam long La Befana tasol ol mama i save tokim ol pikinini bilong ol olsem sapos ol i no bin gutpela tumas La Befana bai kam na putim ol sip bilong paia long ol.

Long Switzerland Santu Lucy i na Fada Krismas i save kisim ol presen i kam. Long Greece Saint Basil i save karim ol presen i kam. Long Poland ol presen i save kam long Father Frost na long Hungary bilip i stap olsem ol krismas presen i save kam long ol angelo.

Bung bilong ol famili

Krismas emi taim bilong bung bilong ol famili and i save gat planti kaikai i mas redi istap. Planti kaikai tu imas stap. Sampela spesol kaikai bilong krismas em olsem teki, ros bif na panti ol narapela kaikai na dring we ol man i save laikim tumas.

Long ol sampela kantri long Yurop pasin bilong rostim pikinini pik wantaim epol long maus bilong em i stap yet.

Long Jemani na Netherlands i gat wanpela spesol dis em long rosted pato igat ol samting insait long em. Teki em i wanpela kaikai bilong krismas tu namel long ol pipol bilong Frans na ol Inglis. Ol Sauten Italians i save laikim wanpela dis oli kolim long capitone, dispela em malio ol i praim. Ol i save kaikai tu kakaruk, o teki i gat ol naispela samting insait. Long Austria na Czechoslovakia ol krismas kaikai i save gat pis tu. Long Norway na Sweden kaikai bai stat wantaim ol pototo. Long Spain i gat wanpela krismas stiu oli kolim long puchero olla.

Long olgeta krismas swits i gat wanpela emi i bikpela stret em long plum pudding and mince pai. Long ol planti kantri ol pipol i save bekim plan-

ti na kaikain kek tu long kaikai long krismas:

Ol krismas kat

Wanpela atis husat i bin kamapolsem namba wan man long mekim ol krismas kat em John C Horsey, wanpela memba bilong Royal Academy long London. Sir Henry Cole in bin askim em long mekim ol kat, Taim em i pinisim samting olsem 1000 kat ol i bin salim ol. Long sem taim tu i bin gat wanpela narapela atis William Egley husat i bin mekim sampela krismas kat tu na salim igo long ol poro bilong em wantaim dispela hap tok, "Meri krismas na hepi niu yia."

Wanpela Jeman printa, Loius Prang i bin mekim ol krismas kat long Massachusetts long 1874. I no long taim na stua bilong em i mekim planti moa krismas kat.

Tude pasin bilong salim Krismas kat i kamap olsem wanpela bikpela indastri na long olgeta hap bilong wol planti pipol i yusim ol kat long salim griting bilong krismas.

Planti long ol dispela pasin o kastom bilong Krismas i stat olsem long Europ na kamap long yumi. Long Australia na New Zealand Krismas tu i olsem long ol narapela hap bilong graun.

Long Papua Niugini yet, ol dispela pasin tu i stap. Taim pasin bilong putim ol Krismas tri, salim kat na bilasim haus i stap long ol man i stap long ol taun, ol plesman i save strongim krismas wantaim pasin bilong go long lotu long biknait na bihainim wantaim ol krismas kaikai.

Long PNG planti pipol i save mekim mumu wantaim pik or sampela kakaruk na planti ol narapela kaikai olsem kaukau, kon, pamkin, taro m na ol kumu tu. Ol kaikai bilong solwara tu olsem pis, toresel, kindam na kuka bai pulap long taim bilong krismas. Sampela lain save mekim mumu na babakui tu na i save gat planti dring long dring na amamas.



MG & SS

SECURITY SERVICES



24 HOURS - 7 DAYS

Providing Quality Services to:-

- CORPORATE CLIENTS.
- RESIDENTIAL.
- TRADERS.
- BANKS.
- GOVERNMENT DEPARTMENTS.
- PRIVATE ENTERPRISES.

Budget Rates on:-

- STATIC GUARDS.
- SPOT CHECKS.
- FAST RESPONSE UNIT.
- SECURITY CONSULTANCY AND INVESTIGATION.
- SPECIAL SECURITY ASSIGNMENTS.

Back up by:-

- 24 HOURS POLICE RADIO LINK.
- 24 HOURS SUPERVISORY MANAGEMENT UNIT.
- CRIMINAL INVESTIGATION EXPERTISE.
- BETTER KNOWLEDGE ON PAPUA NEW GUINEA CRIMINAL LAWS PROCEDURES.

Why pay
too much or too little
for what we can do
better

Call:

LEO DION (QPM) or
ALLAN ORRIS

Security Operation Manager, Kokopo
on Telephone: 982 8554
Fax: 982 8444

WE SIMPLY CARE !!



A CHRISTMAS SPECIAL

from **Telikom**

Valued customers, Telikom PNG is offering **HUGE REDUCTIONS** in call charges this Christmas.


From **MID NIGHT 23rd to MID NIGHT 26TH** December 1997, STD calls within PNG and IDD calls to South Pacific (Band 1) countries will be, **MUCH, MUCH CHEAPER!!**

❖ All STD calls will be slashed by a **MASSIVE 70%**, off the normal charges.

❖ All IDD call to Band 1 countries will be cut by **20%**, off the normal charges, and **20%**, off the off - peak charges.

So take advantage of this **SPECIAL OFFER** and phone your greetings this Christmas.

It's so easy to wish your loved ones and friends a very Merry Christmas, by **PHONE**.



TELIKOM PNG

Now we're really talking!



Olsem wanem dispela nem Krismas i kamap

KRISMAS em i wanpela bikpela de na taim we ol Kristen manmeri i save tingim taim mama i karim Jisas Krai.

Dispela nem Krisma si kamap long olpela Inglis ol i save kolim Christen Maesse, ol misa bilong Krai. Ol i stat yusim spellin bilong dispela nem Krismas long 16th Jenuari. Olgeta Kristen sios i save tingim dispela dem mama i karim Jisas long Disemba 25.

Tasol ol Armenian i no save lukluk long dispela. Dispela de i no bin kamap long wes inap namel long 14 Jenuari na long Is wanpela Jenuari bihain. Ol Armenian i save bihainim olpela lsten kastom long honarim taim mama i karim Jisas long Januani 6. Dispela de i stori long tripela king i bringim ol presen long Jisas. Long Is dispela em taim bilong tingim baptismo bilong Jisas.

Sampela sios i save amamasim ol bikpela de bilong ol long Januani 6, na long hap bilong Amerika, dispela de ol i save kolim "Olpela Krismas" o "Liklik Krismas".

Stat tru bilong Krismas

As tok tru long kamapim Disemba 25, olsem Krismas i wok long hat yet, tasol planti ol bikpela save man bilong lotu long wol i save tok olsem ol i makim dispela de long go wantaim ol bikpela de bilong ol manmeri husait i no save bilip long God o ol pegen.

Dispela bikpela de i save kamap long taim bilong winta taim ais i kamap na ples i kol. Long dispela taim dei i save stap longpela taim long amamasim "nupela kamap bilong san."

Ol pipel long Noten Yurop is save amamasim festival sif bilong Yul long taim bilong Winta long tingim nupela kamap bilong Satunalia (wanpela festival long tingim Satun).

Ol i bilip olsem Satun em i God bilong egirikalsa na i save kamapim nupela pawa bilong san). Dispela i save kamap long wankain taim na ol sampela Kristen kastom ol i ting i go wantaim dispel olpela pegen selebresin.

Sampela bikman bilong lotu long bipo i ting olsem kamap bilong Krai olsem "Lait bilong Wol" i go wantaim kamap gen bilong san. Dispela i putim ol Kristen i go wantaim ol dispela pegen lain.

Planti ol kain kristen bilong bipo i save kolo, dispela ol amamas bilong Krismas as strong bilong ol pegen i go wantaim Roman Satunalia. Ol is ave tingim taim mama i skarim Jisas olsem wanpela bikpela de tru.

Tasol long stat yet ol lain Kristen manmeri i lukim Krismas olsem wanpela de we i holi na tu olsem holi de o taim bilong malolo.

Long taim mama i karim Jisas Krai i bringim nupela spirit na amamas i kam long ol manmeri long wol.

Long taim ol i stat gen long kaurim taim stret mama i karim Jisas na ol bikpela de long amamasim dispela, ol manmeri i kamap wantaim samting, i no maus tasol long wok bilong at, song, danis na ol drama-pilai na tu ol i kamapim ol kaikai long makim dispela bikpela de.

Kastom bilong planti ples i bung wantaim insait long hamas Jenuari i go pinis long kamap wantaim dispela bikpela festival long wol, nau ol i kolm Krismas.

Developmen bilong ol kastom

Ol Inglis i bin bungim planti ol olpela kastom long go wantaim Krismas bilong ol. Long ol Midel Ejes, English Christmases em taim bilong bikpela amamas na bikpela

kaikai i save kamap long amamasim dispela de.

Em long dispela taim nau Lod bilong Misrul i kamap wantaim bikpela tingting bilong em.

Ol man nating na ol wokman bilong bikpela lod ol i makim ol long kamap wantaim rul bilong ol yet long taim bilong Krismas, na planti taim dispela ol rul i save bringim planti ol kain tingting olsem ol man i nating tasol.

Dispela ol kain kastom i bin stat long taim bilong Satunalia taim ol wokman i kamap wantaim olsem ol masta bilong ol.

Kukim Yul diwai i kam long Inglis kastom long olpela Skandanavia pasin bilong wokim bikpela paia long long makim dispela longpela de bilong winta.

Dispela aidia bilong yusim ol grinpela kala samting tu i bin kam long Inglen bipo long taim bilong Kristen bilip long noten Yurop. Ol lain Seltik na Teutonik i save onarim ol dispela diwai long taim bilong longpela de bilong winta festival olsem sait bilong longpela lait. Ol Druids i putim dispela wantaim ol kain kain mejik lo i go long ol dispela grinpela liklik rop bilong bus.

Ol i honarim dispela grinpela diwai olsem promis long wetim kambek bilong san. Sampela tok tu olsem dispela rop ol i putim long het bilong Jisas Krai tu i kam long dispela grinpela rop bilong bus.

Tumbuna stori i tok olsem ol pikinini bilong dispela diwai i wait, tasol ol taim ol i putim dispela rop i gat nil long het bilong Jisas blut bilong em i mekim dispela ol pikinini diwai i go red olgeta. Sampela i bilip olsem dispela ol, bilas bilong Krismas i bin kam long dispela stori tasol.

Martin Luther stat pas long yusim Krismas tri

Ol narapela bikpela Krismas kastom i kamap long planti narapela hap tu. I gat planti aidia long kamap bilong Krismas tri (diwai) tasol planti i bilip olsem Martin Luther i statim dispela kastom long Jemani. Ol dispela ol sain bilong grinpela kala diwai i mekim em i amamas taim em i save lukim. Olsem na em i putim wankain diwai em i bilasim gut wantaim ol kande long haus bilong em.

Sampela ol bikpela save man bilong lotu i tok dispela ol grinpela diwai i makim laif long ol man i no save bilip o ol pegen. Tasol bihain em i kamap olsem wanpela mak bilong Sevia o Jisas Krai na dispela i kamap olsem wanpela bikpela samting long amamas taim mama i karim em.

Krismas Karol (song)

Wanpela kastom bilong Krismas planti manmeri i save laikim em singsing Krismas Karol.

Dispela nem o wed "karol" tu stat long wanpela kain danis we ol pipel long Asia Minor i save singsing wantaim. Long 13m Senturi kantri Itali i bin kamapim tru dispela singsing Krismas Karol, na Santu Francis bilong Asisi husait i save go pas long singim ol preis song bilong Jisas i papa tru long stat bilong singsing Krismas Karol.

Santu Francis tu bin namba wan man long statim ol krits, ol liklik eia long haus lotu we ol liklik pikinini i save stap.

Em i statim tu dispela kastom bilong wokim ol kain liklik krits we ol i kamapim long katim ol diwai wokim long liklik man long makim Maria. Josep na liklik Jisas long haus bilong sipsip. Dispela wok bilong wokim ol dispela piksa long ol diwai planti taim i save kisim longpela taim stret.



• Yangpela meri ya i gat ol kainkain krismas presen i pulap long haus bilong ol.

Ol Pensilvania Dats na tumbuna bilong ol bilong Bohemian na Moravan husat nau i go stap long Amerika bihain long ol i lusim ples bilong ol long Yurop dispela kain ol bilas long haus lotu ol i save kolim Puts.

Santa Klaus (Fada Krismas)

Wanpela samting planti manmeri na pikinini i save laik lukim long taim bilong Krismas em Santa Klaus. Santa em dispela fatpela, na bikpela bel man husat i gat longpela watpela gras na i save werim ol bikpela retpela klos.

Kastom bilong Santa Klaus i bin stat long taim bilong Santu Nicholas. Santu Nicholas i kolim Santa bihain long wanpela Kristen bisop bilong Asia Minor, husat planti manmeri i save laikim bikos long gutpela wok bilong em.

Dispela aidia bilong gimiv ol presen i bin stap wantaim Santu Nicholas na bihain i bin go olsem long ol ples long Asia Minor na Yurop.

Bihain sampela lain manmeri i karim i go long Amerika (USA).

Wanpela raita bilong USA, Wasington Irving i bungim aidia bilong Santu Nicholas olsem wanpela man o pipel i ken laip long en long taim bilong holi de.

Long 1822, Clement Moore i raitim wanpela singsing - bilong em Visit from St Nicholas ("Twas the night before Christmas") wantaim stori na ol bilas bilong Santa Klaus. Tasol ol bilas na klos bilong Santa Klaus insait long ol bikpela klos i bin kamap strong long USA wantaim Thomas Nast long 1863.

BUKA TOWN COMMISSION

The festive season of Christmas reminds us all Christians of everlasting peace and good tidings brought into this world through the birth of Jesus Christ, Prince of Peace, Saviour and Redeemer.

In our country specifically our Beloved Island of Bougainville, this Christmas will be special because it will be the first time the event will be celebrated without the ever frequent rattle and gun-powder smell from the barrel of the gun after almost nine years.

The staging of the Good Will Bougainville Mutrus Games at Arawa which closes on Saturday 20th December 1997 is clearly an indication that peace is available to those who genuinely seek it deep within their hearts.

The Bougainville Mutrus Game theme is:-

"Peace Reconciliation and Unity"

Truly how very fitting these words are considering the scars and wounds of the past years which had tormented us greatly.

This Christmas the children of Bougainville will once again celebrate the true spirit of Christmas without fear, intimidation and without restrictions on their own land.

This is God's Special Gift to our People.

In joining our brothers and sisters in marking this special event, the Management & Staff of the Buka Town Commission would like to wish everyone:-

A Merry Christmas & a Happy New Year.
God Bless Bougainville

'YES THERE IS NO PLACE LIKE IT'

JULIUS TONGA
Town Manager
BUKA TOWN COMMISSION

NIUPELA RILIS KASETS



**STAP NAU
BILONG
SALIM!!**



*Meri Krismas
na Hepi Niu yia*

igo long olgeta
manmeri long PNG i kam long

PACIFIC GOLD STUDIOS
P.O. Box 4470,
Boroko, NCD,

Telephone:

325 9644

Facsimile:

325 9395





THE
INVESTMENT CORPORATION OF
PAPUA NEW GUINEA

WISHES IT'S
SHAREHOLDERS A

**Merry
Christmas**

AND A

Happy 1998

From the Board, the Management
and the Staff of Investment Corporation of
Papua New Guinea

WE SHARE AND CARE NATIONWIDE.

WENCESLAUS MAGUN i raitim

Krismas em i taim bilong tenkim God

"Yumi litimapim nem bilong Bikpela, God bilong Isrel. Em i kam helpim yumi manmeri bilong en, na em i baim bek yumi." Sekaraia i mekim tok profet long Luk sapta 1.

Krismas em i taim bilong yumi ol Kristen na olgeta pipol bilong God long singim dispela song bilong Sekaraia. Bilong wanem? Krismas em i taim Maria i karim Jisas. Yumi ken painim dispela stori long Luk sapta 2, lain 1-7.


"Long dispela taim Sisa Ogastas i putim wanpela lo long ol i mas kisim nem bilong olgeta manmeri. Dispela em i namba wan

taim ol i kisim nem, na Sairinias i stap namba wan gyman bilong Siria. Olsem na olgeta manmeri ol i go long as ples bilong ol, bilong putim nem bilong ol. Josep em i bilong lain na blut bilong Devit. Olsem na em i lusim taun Nasaret long Galili, na em i go long Judia long taun bilong Devit, ol i kolim Betlehem. Em i go wantaim meri bilong en Maria, bai ol i putim nem bilong tupela. Na Maria i gat bel. Tupela i stap yet long dispela ples, na taim i kamap bilong Maria i karim pikinini. Na em i karim namba wan pikinini man bilong en, na i karamapim em long laplap,

na i slipim em insait long bokis kaikai bilong ol bulmakau. Long wanem haus pasindia em i pulap pinis."

I gat planti skul yumi inap kisim long dispela laip stori. Yu yet inap tingting long sampela gutpela skul. Long stori yumi harim pinis, yumi painim aut wanem ples na taim Maria i karim Jisas. Tasol dispela rit i no tok klia sapos Jisas em i pikinini tru bilong God. Olsem na ating i moa beta yumi surik i go bek liklik long Luk sapta 1:26-35, na painim aut.

"Long namba 6 mun God i salim ensel Gebriel i go long wanpela taun bilong Galili, nemb bilong



long Maria. Pasin tumbuna bilong ol Judaman klostu i wan kain long planti hap long Papua Niugini.

Long taim Maria i gat bel, em i no slip wantaim Josep. Olsem na long ai bilong ol Judaman sapos ol i bin save long dispela, ol bai ting Maria i kisim pikinini long rot. Dispela em i no liklik samting. Na ol inap kilim Maria long ston sapos Josep i tokaut olsem tru tumas em i no slip wantaim Maria bipo long Maria i gat bel.

Baibel i no tok klia sapos Maria i tokim Josep dispela samting. Tasol stori i stap long Baibel olsem Josep i maritim Maria na kisim em i go long ples bilong ol wanlain bilong em long Betlehem.

Dispela i soim yumi olsem Josep tu i daunim em yet. Em i karamapim sem bilong em na maritim Maria. Ating em wanpela tasol wanpela Iisabeth kandere bilong Maria na Zekeraiah i save long dispela samting.

Maria i save olsem taim em i tok yesa long God em bai mekim Josep i wari tru. Dispela ol disisen Maria na Josep i mekim inap skulim yumi ol Kriseñ husat i marit na i no marit pasin bilong pogiv. Pasin bilong sori. Pasin bilong daunim yumi yet. Pasin bilong tok yesa long God. Pasin bilong laikim arapela. Pasin bilong bel gut. Pasin bilong lukautim arapela long gutpela taim na long taim nogut.

Mi laikim long dispela Krismas yumi ol famili i glasim wan wan marit bilong yumi. Sekim sapos ol kain pasin olsem i stap insait long famili laip bilong yumi o nogat. Sapos nogat, asua i stap long we? Na inap yumi stretim? Mi ting em i gutpela yumi stretim na redim yumi yet long selebretim pestode bilong Krismas. Stori bilong Maria i karim Jisas i no gutpela tu long harim. Maria i no karim Jisas long wanpela gutpela haus. Em i karim Jisas long haus bilong ol bulmakau. Na i slipim Jisas long bokis kaikai bilong ol bulmakau.

Askim yu yet. Yu laikim mama bilong yu i karim yu long haus bilong bulmakau o pik na slipim yu insait long bokis kaikai bilong ol?

Planti taim yumi save laikim biknem na gutpela samting long laip. Dispela stori bilong Maria i karim Jisas pikinini bilong God i mas skulim yumi long Krismas long daunim yumi yet. Em i no min, yumi mas kamap ol les man na noken lukautim ol meri bilong yumi bikos baibel i tok Maria i karim Jisas long haus bilong ol bulmakau. Nogat. Yumi mas lukautim gut ol meri na pikinini bilong yumi na mekim olgeta samting yumi inap long mekim. Ol meri tu i mas luksave olsem ol i gat bikpela wok bilong lukautim ol long gutpela taim na long taim nogut.

Antap long olgeta dispela samting, yumi mas luksave olsem Jisas, pikinini bilong God i lusim heaven na i kam daun. Em i kamap man. Em i daunim em yet na i kam bilong kisim bek yumi. Mama i no karim em long wanpela bikpela siti o taun. Em i no kamap long famili bilong ol bikman na ol lain i gat namba. Em i kamap long wanpela famili long ples. Olsem na long Krismas yumi mas tenkim God long dispela. Marimari bilong God em i bikpela tru. Long dispela yumi ken amamas.

• Ol pikinini i soim spirit bilong krismas long skul bilong Sunny Bunny.

en Nasaret. Em i go long wanpela yangpela meri ol i bin makim bilong maritim wanpela man, nemb bilong en Josep. Em i bilong lain bilong Devit. Na nem bilong yangpela meri em Maria. Gebriel i go long em na i tok, 'Gude, meri. God i bin blesim yu. Bikpela i stap wantaim yu.'

Maria i harim dispela tok, na em i kirap nogut na i ting, 'Dispela em i wanem kain tok?' Na ensel i tokim em, 'Maria, yu no ken pret. Bel bilong God em i gutpela long yu. Harim, bambai yu kisim bel na yu karim wanpela pikinini man. Na yu mas kolim nem bilong en Jisas. 'Em bai i stap bikpela man. Na bai ol i kolim em Pikinini bilong God Antap Tru. Na God bai i putim em i stap king olsem tumbuna bilong en Devit. Em bai i stap king bilong lain bilong Jekop oltaim. Na kingdom bilong en bai i no pinis.'

Maria i tokim ensel, 'Dispela bai i kamap olsem wanem? Mi no marit yet long wanpela man.'

Na ensel i bekim tok long em, i spik, na strong bilong God Antap Tru bai i karamapim yu. Olsem na dispela pikinini bihain bai yu karim, ol bai kolim em holi, na Pikinini Bilong God." Taim ensel i pinis long tokim Maria dispela nius yu ting Maria i mekim wanem? Maria i no sakim maus bilong ensel. Em i no tok nogat. Em i daunim em yet na tok yesa long God. Na yumi ken ritim tu dispela long Luk sapta 1:46-55.

"Na Maria i tok,

'Bel bilong mi em i litimapim nem bilong Bikpela. Na spirit bilong mi em i amamas long God, helpim bilong mi. Mi wokmeri bilong em, mi samting nating, tasol em i marimari long mi. Nau na bihain tu bai olgeta lain manmeri ol i tok long God i bin givim bikpela amamas long mi. God i gat olgeta strong, em i bin mekim bikpela samting long mi, na nem bilong em i stap holi...Harim, Kandere bilong yu Iisabet em i lapun pinis, tasol em i gat pikinini man long bel. Bipo ol i save tok em i no inap karim pikinini. Tasol nau em i gat bel, na 6-pela mun bilong em i go pinis. I no gat wanpela samting God i no inap mekim.

Na Maria i tok, 'Harim, mi wokmeri bilong Bikpela. Em i ken mekim long mi olsem yu tok.' Orait, ensel i lusim em na i go."

Sapos yu save long pasin tumbuna bilong ol Judaman, yu bai wari tru

**The Chairman,
Board of Trustees
and the
Management & Staff
wish all
our valued members a
Merry Christmas
and a Prosperous
New Year.**

Why are we Special...

- * Fully Computerised Fund Administration Service which provides instant access to Member Account Information.
- * The Best Retirement Fund providing enormous benefits to members both short term and long term.
- * Life Cover for Member and Spouse until Age 60.
- * Funeral Expense reimbursement for Member, Spouse and Children
- * Natural Parent's Life Cover.
- * The only Medicare cover in PNG that pays Over-the-Counter
- * Medical Repatriation (Medivac)

Workers Most Progressive Retirement Fund

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.